

Ashaen'cho Génesis

Na'su tisema in'jaensi Moisésja cinco Ashaen'cho Chiga Teven'jenma tevaen. O'tie tsu Ashaen'cho o Génesisma tevaen'jen. Tsanga tsu andeve agattoen'choma condapa a'i can'jemba egae tsincon'choma'qqe conda. Tsomba a'i egae tsincomba atapa'fasi Chiga tise'pama nepiamba Noémeñi ccushaen. Tsane condapa tsu omboe Chigave in'jan'chondeccune conda. Nane aindeccu'ye Na'su Chigaja Abraham aindeccuma attufaemba tise'pai'ccu injancco'fa'chove afa. Tsa'ma majan ñotsse pañambipa cansesi Na'suja Israel aindeccuma attufaen tiumbeve. Jai'ngae tsendeccu poi'ccu Egipto andeni japa can'jen'fa.

Agattoen'cho

¹ Me'ttia'ye Chigaja sefacco, andeve'qqe agattoen. ² Me'ttia'ye agattoensi andeja ñotssimbiqqia'caen jincho. Nane pa'cco sinttiopa tsu na'enca'en jincho. Tsa'ma Chiga Qquendya'paja tsambe ombani can'jemba pa'cco tsama zivaen'jen. ³ Tsa'caen ñoñamba Chigaja su: “A'tatssia've daja.”

Chiga tsa'caen su'ninda pa'cco a'tatssia've da. ⁴ Pa'cco a'tatssia've dapa ñotssisi Chigaja attepa in'jamba avujatssi. Avujatssipa Chigaja a'tatssia'ma attufaen sinttia'ye. ⁵ Sinttia'ye attufaemba a'tatssia'ma a'tave inisian. Toya'caen sinttiamajan coseve inisian. Tsa'caen inisiansi cosepa a'tapa primer a'ta tsu.

⁶ Tsonsi Chigaja su: “Sefacco'su qquendya'pave attianjan na'en'su tsa'ccuma unjimba'ye attufaeñe.”

⁷ Tsa'caen supa Chigaja sefacco'su qquendya'pave ñoña. Ñoñasi tsa'caen tsu da. Sefacco'su qquendya'pambe ombani tsu unjimbaja jin. Sefacco'su qquendya'pambe tsosiccuni tsu na'en'su tsa'ccuja jin. ⁸ Tsonsi tsu Chigaja qquendya'pama sefaccove inisian. Nane cosepa a'tapa segundo a'ta tsu.

⁹ Tsonsi Chigaja su: “Na'en'su shave'pa fae'ttinga bosi san'ame attianjan.”

Tsa'caen susi tsa'caen tsu da. ¹⁰ Tsa'caen dasi Chigaja san'ama andeve inisian. Tsa'caen na'en fa'enga bo'choma'qqe marve inisian.

Inisiamba pa'ccoma cambia ñotssisi attepa avujatssi. Avujatssipa ¹¹ su: “Ande'ye shoshovive sho'yoja. Toya'caen te'ta tise'pa chove'qqe sho'yoja. Nane anqqe'su teta'cho'qqe sho'yopa tise'pa naqqe'suve tsu naña'cho. Nane nanda tsu chove an'biaña'cho tsai'ccu atapaye.”

Tsa'caen susi tsa'caen tsu da. ¹² Nane shoshovi ande'ye sho'yosi te'ta tise'pa chove'qqe sho'yo'fa. Anqqe'su teta'cho'qqe tise'pa naqqe'suve tsu na'fa. Na tsu chove an'bian tsai'ccu atapaye. Tsa'caen dasi Chigaja attepa avujatssi. ¹³ Cosepa a'tasi tercer a'ta tsu.

¹⁴ Tsonsi Chigaja su: “Sefaccone chanjun-qqe'su a'tatssia've chanjunjan cuintsu a'taja cose'ye joqquitssiye. Tsa'caen chanjumba tsu a'tave, canqqe'fave'qqe canjaeña. Osha'cho naiteve'qqe tsu canjaeña. ¹⁵ Toya'caen tsa'caen sefacconi chanjumba tsu andema attiaña.”

Tsa'caen susi tsa'caen tsu da. ¹⁶ Nane Chigaja dos rande chanjunqqe'suve agattoemba ti'tsse randemajan coe'jeve ancaen cuintsu a'tave attiañe. Bove'cco'a'ma tsu ancaen cuintsu coseve attiañe. Toya'caen o'feve'qqe agattoemba ancan'caen. ¹⁷ Tsa'caen agattoemba sefaccongá ancaen cuintsu andenga attiamba ¹⁸ a'ta, cosema'qqe canjaeñe. Tsa'caen canjaemba tsu a'ta, cose'ye joqqutssi'choma canjaen. Tsa'caen dasi Chigaja attepa avujatssi. ¹⁹ Cosepa a'tasi cuarto a'ta tsu.

²⁰ Tsonsi Chigaja su: “Na'eñe osha'cho cansian jincho'chove attianjan. Toya'caen sefacconi'su qquendya'pa'ye osha'cho chhiririave attianjan cuintsu ande omba'ye chhaje'faye.”

²¹ Tsa'caen supa Chigaja osha'cho rande na'en'su cansian jincho'chove agattoen. Nane osha'cho na'eni canse'pa jacanqqe'suma ccaningandeqquiave agattoen. Toya'caen osha'cho sefacconi chhajeqqe'su chhiririama'qqe ccaningandeqquiave agattoen. Chigaja tsa'caen agattoemba attepa avujatssi.

²² Avujatssipa tise'pama ñotsse afapa su: “Ñotsse canse'pa atapa'faja cuintsu na'en on'batssiye. Chhiriria'qqe atapapa poi andeni can'jen'faja.”

²³ Tsa'caen susi cosepa a'tasi quinto a'ta tsu.

²⁴ Tsonsi Chigaja su: “Andeni osha'cho cansian jincho'cho ccaningandeqquiave attianjan. Nane aiña'cho vaura'can, andenga manguqqe'su, tsampini canseqque'su'qqe ccaningandeqquiave attianjan.”

Tsa'caen susi tsu tsa'caen da. ²⁵ Nane Chigaja osha'cho tsampini canseqque'suma

ccaningandeqquiave agattoemba osha'cho aiña'cho vaura'can'ma ccaningandeqquiave agattoen. Osha'cho andeni manguqqe'suma'qqe ccaningandeqquiave agattoen. Tsama agattoemba attepa avujatssi. ²⁶ Avujatssipa su: “Jinge a'ive agattoeñe. Nane ingi'caeñi agattoeña'cho cuintsu tiseja na'en'su avuma, sefani'su chhiririama, aiña'cho vaura'can'ma'qqe mandaye. Nane pa'cco andema, osha'cho andeni manguqqe'suma'qqe mandaye.”

²⁷ Chigaja tisu'caeñi a'ive agattoen.

Nane Chiga'caeñi tsu Chigaja a'ive agattoen.

Tsandie, pushesuve tsu a'ive agattoen.

²⁸ Agattoemba tise'pama ñotsse afapa su:

“Ñotsse canse'pa atapa'faja cuintsu pa'cco ande on'batssiye.

Nane pa'cco andeni can'jemba osha'choma pat-supama manda'faja.

Na'en'su avu, sefani'su chhiriria, osha'cho andeni canseqque'suma'qqe patsupama manda'faja.”

²⁹ Toya'caen tsu Chigaja su: “Que canjan, tayo gi que'inga pa'cco teta'choma afe. Pa'cco tsu tise'pa choma an'bian tsai'ccu atapaye. Poi quini'ccoma'qqe tise'pa nanga atapoenqqe'su choi'ccu gi tayo afe. Tise'pa najan que'i anqqe'su tsu. ³⁰ Toya'caen poi'ccu va andeni cansian jincho'chonga gi inzia shoshovima afe tise'pa anqqe'suve. Nane sefani'su chhiririanga, andenga manguqqe'sunga osha'cho majan qquendya'jeqqe'sunga'qqe gi inzia shoshovima afe tise'pa anqqe'suve.”

Tsa'caen susi tsu tsa'caen da. ³¹ Chigaja osha'choma attepa avujatssi. Cosepa a'tasi sexto a'ta tsu.

2

¹ Tsa'caen tsu Chigaja pa'cco sefacco andeve'qqe agattoemba osha'cho tsani jincho'chove nanitssse agattoen. ² Nanimba septimo a'tave dasi tsequi a'ta pa'cco tise sema'bama nanimba ño'fa. ³ Tsa'camba “Septimo a'taja ña ñotssi a'ta tsu” qqwen supa Chigaja “Tsa a'taja sema'ma'quia a'ta tsu” qqwen su. Nane tsequi a'ta Chigaja osha'cho agattoen'cho sema'bama nanimba ño'fapa tsa'caen su.

Edéni'su jombachoccu

⁴ Qquen tsu Chiga agattoen'choja, ma'caen tiseja ande sefaccoma'qqe agattoen:

Na'su Chiga tsa'caen ande, sefaccove'qqe agattointeja ⁵ toya tsu ande'su te'ta, ande'su shoshovi'qqe sho'yombi. Nane Na'su Chiga toya unjima moembisi tsu toya sho'yombi. Toya'caen a'i'qqe toya can'jembi andema semañe. ⁶ Tsa'ma ccuttopa'si ande'ye sombopa ansundepa surunome dapa pa'cco andema tssipoen. ⁷ Tsa'caen tssipoensi Na'su Chigaja andema mandyiccoemba a'ive ñoña. Ñoñamba tsofatunga tise qqwendya'pama ufapa tisema qqwendyaen. Tsa'caen qqwendyaen a'imajan.

⁸ Tsomba Na'su Chigaja coejchiga sombo'jeni Edén andenga osha'cho ñotssiam a jombachocunga jon. Jomba tseni tsu Tise agattoen'cho a'ima ccutsian. ⁹ Tsomba

ande'ye Chigaja osha'choma shoyo'yaen. Nane osha'cho ñotsse atteqqe'su quini'cco majama ñotssia anqqe'suma shoyo'yaen. Toya'caen jombachoccumbe enttingenga tsu tiseja Cansiaña'cho Quini'ccoma sho'yaen. Faesu quini'ccoma'qqe tseni sho'yaen. Tsa quini'ccoma an'da majan ñotssia, majan egave atesuya'cho.

¹⁰ Edén andene tsu na'enjan sombo jombachocuma tssipoeñe. Sombopa tsu cuatro na'eme da. ¹¹ Fae'ccoma tsu Pisónme inisian. Tsaja pa'cco Havila andema shoquendí ja'je'cho. Cori tsu jin tsa andeni. ¹² Tsa corija ñotssi tsu. Toya'caen bedelio patu, ónice patu'qqe tseni jin. ¹³ Faesu na'emanda tsu Gihónme inisian. Tsaja pa'cco Cus andema shoquendí ja'je'cho. ¹⁴ Faesu na'ema tsu Tigrisve inisian. Tsa na'en ja'je'choja Asiria jocani chiga sombo'jefa tsu. Toya'caen faesu na'ema tsu Eufratesve inisian.

¹⁵ Tsonsi Na'su Chigaja a'ima Edéni'su jombachocunga ccutsian cuintsu tsama semamba coiraye. ¹⁶ Ccutsiamba a'ima su: “Poiyi'cco jombachoccu'su tetachoma qui añe osha. ¹⁷ Tsa'ma tsa ñotssia, egama atesuya'cho quini'cco'su tetachomajan anjama. Nane maqui a'ta tsama an'da qui paya.”

¹⁸ Tsomba Na'su Chigaja asi'ttaemba in'jan: “Ñotssimbi tsu tsandie tisuyi can'jeñe. Tisema fuite'suve gi ñoñaña tisia'can'me cuintsu tisei'ccu fae'ngae canseye.” ¹⁹ Tsa'caen in'jamba Na'su Chigaja tayo andema osha'cho ande'ye jacanqqe'su, sefa'ye chhajeqqe'su

chhiririave'qqe ñoña'choma tsandienga i. Ipa tsandiema manda cuintsu osha'chove inisiañe. Tsa'cansi osha'cho tsu tsandie tise'pama inisianqquia'caen tsangae jincho. ²⁰ Nane tsandie tsu poi'cco aiña'cho vaura'can'ma sefani'su chhiririama, tsampini canseqque'suma'qqe inisian. Tsa'ma ñoa'me tsandiei'ccu fae'ngae cansepa fuite'suve me'i'on. ²¹ Tsa'cansi Na'su Chiga tise ma anaesi tsandieja ana. Ana'jensi Chigaja tsandie utuccu'su tsu'ttama somboemba ttonoi'ccu changoma picco. ²² Utuccu'su tsu'ttama Na'su Chigaja pushesuve ñoña. Ñoñamba tsandienga afe. ²³ Afesi tsandieja pushesuma atepa su: “¡Va tsu ñoa'me ña tsu'ttai'ccu, ña ttonoi'ccu ñama'caen ñoña'cho! Tisemanda gi inisiaña pushesuve. Nane Chigaja tsandie'suma tise've isusi 'pushesu' tsu.”

²⁴ Tsa'cansi tsu ja'ño tsandieja tise yaya, tise mama catipa tise pushei'ccu can'jen'faya. Nane tsa dos tsu fae a'ia'caeñi da'faya.

²⁵ Toya'caen tsa'caen ñoñasi tsandie, pushesu'qqe chu'cco can'jen'fa. Tsa'ma tsa'caen can'jen'ma ansangembe'yi can'jen'fa.

3

A'i egae tson'fa'cho

¹ Nane canjansi tsu poi Na'su Chiga agattoen'cho tsampini canseqque'suma ti'tsse injama'pa'can. Canjansija jipa pushesuma iñajampaña:

—¿Ñoa'me ti Chigaja jombachoccu'su quini'cco nama aña se'pi?

² Iñajampañasi pushesuja su:

—Jombachoccu'su quini'cco namajan aña gi osha'fa. ³Tsa'ma tsa jombachoccumbe enttinge'su quini'cco nameñi tsu Chigaja aña se'pi. Ni ppo-raeña'qqe tsu se'pi. Nane tsa'caen tson'da gi pa'faya.

⁴Tsa'ma canjansija pushesuma su:

—Ñoa'me paya'bi qui. ⁵Nane Chiga tsu atesu que'ija tsama an'da qui ñotsse injiengepa Chiga'caen osha'cho majan ñotssia, majan egave atesu'faya.

⁶Pushesuja tsama pañamba quini'ccoma cambia ñotssi tsu qqen in'jan. Toya'caen tsambe na ñotssia anqqe'susi an'da ñotssiave toya'caen egave'qqe atesuye qqen in'jamba nama pishopa an. Amba faesuma pishopa tise tsa'ndunga afe. Afesi tise'qqe an. ⁷Amba, tso'fe fettayeqquia'caen, injama'choni tisupa chu'cco can'jen'choma in'jamba ansange'fa. Ansangepa higuera ccaquejema anchon setsaemba tise'pa ai'vonga tandamba picco'fa.

⁸Tsonsi sime tayo tumbiansi Na'su Chiga Quitsaja andenga andepa jombachoccu'ye tsui ja'je. Tsandie, pushesu tise ma pañamba jombachoccu sheque'chombe enttingenga a'tu'fa, Na'su Chiga tise'pama attesa'ne. ⁹Tsa'ma Na'su Chiga Quitsaja tsandiema ttu'sepa su:

—¿Mani qui can'jen?

¹⁰Tsandieja su:

—Que jombachocunga pasia'je'choma pañamba gi chu'cco can'jemba dyopa a'tu'fa.

¹¹Tsonsi Chigaja su:

—¿Majan tsu que'inga conda chu'cco can'jen'chove? ¿An'fa ti qui ña se'pi'cho quini'cco'su tetachoma?

¹² A'ija pañamba su:

—Que ñanga afe'cho pushesu tsu tsa quini'cco'su nama ñanga afesi gi an.

¹³ Tsonsi Na'su Chiga Quitsaja pushesuma iñajampaña:

—¿Jongoesie qui tsa'caen tson?

Pushesuja su:

—Canjansi ñama afopoensi gi an.

¹⁴ Tsonsi Na'su Chigaja canjansima su:

—Queja tsa'caen egae tsincomba qui poi'cco aiña'cho vaura'can'ma, poi'cco tsampini canse'chondeccuma bove me'detsse vanaña. Nane tisu injamáccui'ccu qui mangú jacamba andema amba canseya. ¹⁵ Toya'caen queja pushesui'ccu chi'gaccopa iyicco'fasi tsu que dushundeccu'qqe tise dushundeccui'ccu chi'gaccopa iyicco'faya. Nane tsambe du'shu tsu que tsove'ye tsui sapiaña. Tsa'ma queja tise tsutuccu'choma sinttuya.

¹⁶ Tsomba Chigaja pushesuma su:

—Ja'ño gi ti'tsse quema vanaña cuintsu vanamba du'shuma isuye. Nane ti'tsse aiye'jepa qui dushundeccuma isuya. Tsa'ma que tsa'nduma ñotsse in'jamba qui tisema pañaña. Tise tsu quema mandaya.

¹⁷ Tsomba Chigaja tsandie, Adánma su:

—Queja que pushema pañamba ña se'pi'cho quini'cco'su nama ansi gi quema'qqe vanaña. Nane andema egae tsonsi ñotsse sho'yombisi qui paya'ngae vanamba semamba que

anqqe'suma taipa año. ¹⁸ Ñoa'me tsu nopa'siyi atapaya. Tsa'cansi qui vanamba tta'ttapa aqquia sho'yo'cho tetachoma taipa an'faya. ¹⁹ Poipa'sui'ccu quian'me semamba qui que cui'ccuma cu'ifaya. Nane papa queve ñoña'cho andeve ccase daya'ngae qui tsa'caen vana'jeña. Nane andema ñoña'chopa qui ccase andeve daya.

²⁰ Tsonsi tsandie, Adán, tise pushema inisian Evave. Nane tiseja poi a'imbe chaña'si tsa'caen inisian. ²¹ Tsomba Na'su Chiga Quitsa tise'pama ondiqqian. Nane ttonoma ondiccu'jeve ñoñamba tsandie, tise pushema'qqe ondiqqian. ²² Ondiqqiamba asi'ttaemba su:

—Ja'ño tsu a'ija ingi'caeñi da. Nane pa'cco ñotssia, pa'cco egave tsu atesu. ¿Jongoesu tsu tisema se'piya tsa Cansiaña'cho Quini'cco'su nama'qqe año? Tsama an'choecan'da tsu tsangae cans-eye'can.

²³ Tsa'caen asi'ttaemba Na'su Chigaja a'ima Edéni'su jombachoqqie tteyamañamba manda tise've ñoñaqqe'su andema semañe.

²⁴ Tsandiema tteyamañamba dos Chiga sefacconi'su sundarondeccuma ccutsian Edéni'su jombachoccu sombo'ttinga. Nane tseni Edénima chiga sombo'jefanga tise'pama ccutsiamba si'nge matichima'qqe manda cuintsu ccafa ccafa ccafa jaye majan tsa Cansiaña'cho Quini'cconga já catsesa'ne.

4

Caín Abelma fi'tti'cho

¹ Tsomba tse'i Adán tise pushe, Evai'ccu ccuisi Evaja surie dapa tsandie du'shuve isu. Tisema inisian Caínme. Evaja Caínma isupa su: “Na'su Chiga ñanga afesi gi tsandieve isu.” ² Omboe tsambe quinshin, Abelve isu. Nane coemba Abelja oveja coira'suve da. Caínjan andema nasipave sema'su tsu.

³ Can'jemba jai'ngae Caínjan andenga sho'yoqqe'su nama taipa Na'su Chiganga afeye i. ⁴ Toya'caen Abelja tseyi isu'cho oveja du'shuma fi'ttipa yayapatssi nama ipa afe. ⁵ Tsa'caen afe'fasi Chigaja Abelma in'jamba tise afe'choma'qqe in'jan. Tsa'ma Caínma ni tise afe'choma'qqe tiseja in'jambi. Tsa'cansi Caín iyicca'yesi ⁶ Na'su Chigaja tisema su:

—¿Jongoesie qui iyicca'ye? ⁷ Nane que ñotsse tson'ninda gi queve ñotsse in'jaña. Tsa'ma ñotsse tsombi'ta —injama'tse, ñoa'me tsu egae tsincon'cho quema qqeñañe tson'jen. Nane quema patsuye tsu in'jan. Tsa'ma queja egae tsincon'choma patsuya'cho.

⁸ Tsomba tse'i fae a'ta Caínjan tise quinshin Abelma ttu'se nasipani pasia'ngaye. Tsomba nasi-pani can'jemba Caínjan iyicca'yepa jangipa tise quinshin Abelma fi'tti. ⁹ Tsa'caen fi'ttipa jisi Na'su Chigaja Caínma iñajampaña:

—¿Mani tsu que quinshin, Abelja?

Caínjan su:

—¿Ma'caen gi atesuya? ¿Ñanda ti gi ña quinshinma coira'su?

¹⁰ Tsonsi Na'su Chigaja su:

—¿Jongoesie qui tsa'caen tson? Que quinshimbe anjampa tsu andenga tssamba ñama fundopa

ttu'se ccane'qqe quema fi'ttiye. ¹¹ Tsa'cansi qui ja'ñojan ti'tsse vana'ma va ande'ye teyamoeñemba ñotsse isuya'bi. Nane andeja, aya'fama sharuqquia'caen que quinshin anjampama que tive'ye cu'ipa tsu quenga afeye se'piya. ¹² Ja'ño andema dyan'dyapa jon'ni'qqe tsu sho'yaene se'piya que jongoesuma taisa'ne. Ñoa'me qui biani injanga jacamba poiya'ccoma dyopa ccuyin ja'suve daya.

¹³ Tsa'caen susi Caínjan Na'sunga su:

—Ñoa'me gi oshambi tsa'caen canseye. Panshaen qui ñama vanae. ¹⁴ Ja'ño qui ñama tteyamoeña va ande'ye. Biani poiya'ccoma dyopa ccuyin japa injanga jacan'suve dasi majan ñama atte'ta tsu fi'ttiya. Ni quema gi ccase ateya'bi.

¹⁵ Tsonsi Na'su Chigaja tisema su:

—Tsa'caña'bi tsu. Nane majan Caínma fi'tti'ninda gi tisema ñoa'me ti'tsse vanaeña. Siete se ti'tsse tsu vanaña.

Tsa'caen supa Na'suja canjaeña'choma Caínga afe cuintu poiya'cco majan tisema cachui'a'qqe fi'ttimbecañe. ¹⁶ Tsonsi Caínjan tzeni Na'su Chigai'ccu condase'jene sombopa Edénima chiga sombo'jefanga Nod andeni ja.

Caín omba'su dutssiyendeccu

¹⁷ Tsomba tse'i Caín tise pushei'ccu ccui'jesi surie dapa Enocve isu. Omboe Caínjan canqqueve canqquian. Tsa canqqueve canqquiamba inisian tise du'shu Enoc inisingae. ¹⁸ Enocja Irad quitsa tsu. Iradja Mehujael Quitsa. Mehujaelja Metusal quitsa. Metusalja Lamec quitsa. ¹⁹ Lamecja dos pusheve tsu pushe. Fae'ccombe iniseja Adave.

Faesuja Zila. ²⁰ Adaja Jabalve isu. Isusi tiseja poiye'cco carpani canjensundecumbe yayave tsu da. Poiye'cco tsu vaura'can'ma'qqe coirasundeccu. ²¹ Jabal quinshinjan Jubal tsu. Tsambe dushundeccu tsu poiye'cco majan gitara'cain'ccu, fendo'ccoi'ccu'qqe jeñasundeccu. ²² Toya'caen Lamec faesu pushe Zilaja Tubal-caínme isu. Tsaja coemba yoshava, cu'a yoshavama'qqe semamba osha'chove ñoña'su tsu. Tubal-caín que'tteja Naama tsu.

²³ Fae a'ta Lamecja tise dos pushendecuma ttu'sepa su:

“Ada, toya'caen Zila, que'ima gi pushe.

Ña su'choma ñotsse paña'faja.

Tsandie ñama ñaccaensi gi tisema fi'tti.

Nane tsa chu'a tsandie ñama tssaisi gi tisema fi'tti.

²⁴ Tsa'cansi majan Caínma fi'tti'suja

siete se ti'tsse vanaña'cho qqen su'chomanda

ñoa'me majan ñama fi'tti'ta setenta y siete se

tsu ti'tsse vanaña'cho.”

Adán pushe Eva faesu du'shuve isu

²⁵ Ccase Adán tise pushe Evai'ccu ccuisi faesu tsandie du'shuve isu. Tisema inisian Setve. Nane Evaja su: “Caín Abelma fi'ttisi pasi tsu Chiga Quit-saja ñanga faesu du'shuma afe.”

²⁶ Toya'caen Set'qqe coemba pushepa du'shuve an'biamba tisema inisian Enósve. Tise can'jeinte tsu aindecuja Na'suma ñajañe ashaen'fa.

5

Adán omba'su dutssiyendeccu

¹ Va tsu Adán omba'su dutssiyendecumbe inisema tevaen'cho. Chigaja a'ima agattoemba tsu tisia'caen agattoen. ² Toya'caen tsu tsandie, pushesuve agattoen. Agattoemba tise'pama ñotsse tsoña'chove afapa a'ive inisian.

³ Adánjan ciento treinta canqqe'fave an'bian'ni tise dutssi'ye Setve isu. Ñoa'me tsu tiseja tise yaya Adán'cañi. ⁴ Omboe Adánjan faesu ochociento canqqe'fave can'jemba ti'tsse tsu tsandie, pushesu du'shuve an'bian. ⁵ Nane noveciento treinta canqqe'fave can'jemba tsu pa.

⁶ Setja ciento cinco canqqe'fave an'bian'ni tise dutssi'ye Enósve isu. ⁷ Omboe Setja faesu ochociento siete canqqe'fave can'jemba ti'tsse tsu tsandie, pushesu du'shuve an'bian. ⁸ Nane noveciento doce canqqe'fave can'jemba tsu pa.

⁹ Enósja noventa canqqe'fave an'bian'ni tise dutssi'ye Cainánme isu. ¹⁰ Omboe Enósja faesu ochociento quince canqqe'fave can'jemba ti'tsse tsu tsandie, pushesu du'shuve an'bian. ¹¹ Nane noveciento cinco canqqe'fave can'jemba tsu pa.

¹² Cainánjan setenta canqqe'fave an'bian'ni tise dutssi'ye Mahalaleelve isu. ¹³ Omboe Cainán faesu ochociento cuarenta canqqe'fave can'jemba ti'tsse tsu tsandie, pushesu du'shuve an'bian. ¹⁴ Nane noveciento diez canqqe'fave can'jemba tsu pa.

¹⁵ Mahalaleelja sesenta y cinco canqqe'fave an'bian'ni tise dutssi'ye Jaredve isu. ¹⁶ Omboe Mahalaleelja faesu ochociento treinta canqqe'fave can'jemba ti'tsse tsu tsandie, pushesu du'shuve

an'bian. ¹⁷ Nane ochociento noventa y cinco canqque'fave can'jemba tsu pa.

¹⁸ Jaredja ciento sesenta y dos canqque'fave an'bian'ni tise dutssi'ye Enocve isu. ¹⁹ Omboe Jaredja faesu ochociento canqque'fave can'jemba ti'tsse tsu tsandie, pushesu du'shuve an'bian. ²⁰ Nane noveciento sesenta y dos canqque'fave can'jemba tsu pa.

²¹ Enocja sesenta y cinco canqque'fave an'bian'ni tise dutssi'ye Matusalénme isu. ²² Enocja ñoa'me Chiga in'janqquia'caen canse. Matusalénme isusi Enocja faesu tresciento canqque'fave tsa'caen can'jemba ti'tsse tsu tsandie, pushesu du'shuve an'bian. ²³ Nane Enocja tresciento sesenta y cinco canqque'fave can'jen. ²⁴ Tsa'ma Chiga in'janqquia'caen cansesi Chigaja tisema anga. Nane pambe'yi tsu metsse da.

²⁵ Matusalénjan ciento ochenta y siete canqque'fave an'bian'ni tise dutssi'ye Lamecve isu. ²⁶ Omboe Matusalénjan faesu seteciento ochenta y dos canqque'fave can'jemba ti'tsse tsu tsandie, pushesu du'shuve an'bian. ²⁷ Nane noveciento sesenta y nueve canqque'fave can'jemba tsu pa.

²⁸ Lamecja ciento ochenta y dos canqque'fave an'bian'ni tise dutssi'yeve isu. ²⁹ Isusi tisema inisian Noéme. Nane Lamecja su: “Na'su Chiga andema egae tsonsi ñotsse sho'yombisi gi paya'ngae vanamba sema'jen'fa. Tsa'ma va du'shuja ingima ño'faen'su tsu ingi tive quimbisa'ne,” qqquen supa du'shuma inisian Noéme. ³⁰ Noéme isusi Lamecja faesu quiniento noventa y cinco canqque'fave

can'jemba ti'tsse tsu tsandie, pushesu du'shuve an'bian. ³¹ Nane seteciento setenta y siete canqque'fave can'jemba tsu pa.

³² Noéjan quiniento canqque'fave an'biamba du'siañe ashaemba tise dutssiyendeccu Sem, Cam, toya'caen Jafetve isu.

6

Aindeccuja egae tsincon'fa

¹ Aindeccuja poi andenga atapapa pushesu du'shuve'qque an'bian'fa. ² Tsonsi Chigave in'jan'cho tsandiendeccuja in'jambindeqquiambe onquengendeccu me'detssisi in'jamba tise'pama pushe'fa majame in'jan'da. ³ Tsa'caen tson'fasi Na'su Chigaja su: “In'jambi gi aindeccu egae tsincomba tsangae canse'faye. Nane ciento veinte canqque'fave can'jemba tsu pa'je'faya'cho.”

⁴ Tsa'caen Chigave in'jan'cho tsandiendeccu faesu aindeccumbe onquengendeccuma pushepa du'shuve isu'fasi tsu rande quin'an aindeccuja andenga attian'fa. Nane bo'tsse tsa'caen pushe'je'fasi tise'pa dushundeccuja tayopi'su ti'tsse'tssia aindeccu tsu.

⁵ Poi ande'su aindeccu egae tsincomba canse'fasi Na'su Chigaja attepa in'jan. Nane aindeccu poi a'ta injama'choni egaveyi asi'ttaemba in'jansi ⁶ attepa in'jamba ñombi'ye aindeccuve tayo agattoemba. Nane Tise agattoen'chone asi'ttaemba injama'choni ñombi'yepa ⁷ su: “Pa'cco andema gi ccuchaya poi'cco ña agattoen'cho aindeccuma sefañe. Nane a'i, osha'cho cansepa andenga

jacanqqe'su, andenga manguqqe'su, sefani chhajeqqe'suma'qqe gi ccucha fi'ttiya. Ñombi'ye gi tise'pave tayo ñoñamba.”

⁸ Tsa'ma Na'su Chigaja Noéma ñotsse in'jan.

Noé rande shavove shavoña'cho

⁹ Va tsu Noéne condase'cho:

Noéjan ño'an a'isi poiyo'cco tise cansuite'su aindeccu'suma tise'veyi tsu Chigaja in'jan. Nane tiseja Chigama ñotsse pañamba canse. ¹⁰ Noéjan tres dutssi'yeye an'bian: Sem, Cam, toya'caen Jafet.

¹¹ Chigane'da poi ande tsu dañongeqquia'caen egae da. Nane a'ija iyiccopa fi'ttipa egae tsincomba canse'fa. ¹² Poi aindeccu tsa'caen egae tsincomba osha'choma dañojensi attepa Chigaja ¹³ Noéma su: “Asi'ttaemba gi in'jan poi aindecuma fi'tti sefaeña. Tise'paja egae tsincomba poi andeni jacamba fi'ttipa dañofa. Ñoa'me gi tise'pama fi'tti sefaemba pa'cco andema'qqe sefaeña. ¹⁴ Ñotssia congo'masia quini'ccoma shavoñajan rande tsa'o shavove. Tsain'bitssi cuartove ñoñajan. Toya'caen naccuma, sepaccoma'qqe ccoqqui'ccu ñotsse ccoqquijan. ¹⁵ Qquen tsu ñoñaña'cho randeve: Bia'suve ciento treinta y cinco metro. Attaja'suve veinte tres metro. Sefa'suve catorce metro. ¹⁶ Nane tres ppappaccove ñoñajan. Tsaocajepa'fa jin'fanga ventaname'qqe ñoñajan enttinge metro attaja'suve. Toya'caen faefangayi fae rande sombo'ttive ñoñajan. ¹⁷ Ñoa'me gi mandaye tson'jen cuintsu na'en ñoa'me bo'iave jipa pa'cco andema piccoye. Piccopa tsu

osha'cho cansepa jincho'choma pa'cco andengae fitti'ttiya. Nane osha'cho andeni jinqque'su tsu pa'faya. ¹⁸ Tsa'ma que'i'ccu gi qqen fae'ngae injanccoya: Rande tsa'o shavonga qui que pushei'ccu, que dutssiyendeccu'qqe tise'pa pushendeccui'ccu ca'nimba ccusha'faya. ¹⁹ Toya'caen tsu rande tsa'o shavonga poiya'cco cansepa jacanqqe'suma fae quitsa'ye, fae pushema angaya'cho. Nane tsendeccu'qqe que'ia'cañi tsu ccusha'faya. ²⁰ Fae'ngae que'i'ccu tsu poiya'cco cansepa jincho'cho'qqe dosyi ca'nimba ccusha'faya. Nane chhiriria, aiña'cho vaura'can, andenga manguqqe'su, poiya'cco tsu que'i'ccu ca'niña'cho ccushapa canseye. ²¹ Toya'caen osha'cho anqqe'suve'qqe tsu boñamba angaya'cho cuintsu que'i toya'caen canse'pa jinchoqqe'su'qqe an'jeña'chove."

²² Noéjan ñotsse pañamba pa'ccoma Chiga man-daquua'caen tson.

7

Na'en bo'iave ji'cho

¹ Omboe tsu Na'su Chigaja Noéma su: "Tsa'o shavonga ca'ni'faja que aindeccui'ccu. Nane que'iyi qui va ja'ño cansuite'su aindeccu'suma ño'amba ñama paña'fa. ² Poi anqqe'su vaura, oveja'can'ma'qqe siete quitsa'ye, siete pusheveyi poiya'cco'suma ca'niajan. Tsa'ma an'masia'ma aqquia fae quitsa'ye, fae pusheveyi poiya'cco'suma ca'niaña'cho. ³ Toya'caen osha'cho chhiririama'qqe poiya'cco'suma siete quitsa'ye, siete pusheveyi tsu ca'niaña'cho. Nane pa'cco

jincho'choma tsu ca'niaña'cho fae jincho'cho qquesa'ne. ⁴ Ñoa'me gi su siete a'tave pasasi tsu unjin tuiye ashaeña. Nane cuarenta a'ta, cuarenta cose'qqe tsu unjinjan tuiya. Pa'cco va ande'su cansian jincho'choma tsu ccuchapa fi'ttiya, pa'cco ña agattoen'choma.”

⁵ Na'su Chiga mandaqquia'caen tsu Noéjan tson. ⁶ Na'en tsa'caen andenga bo'iave ji'jeni Noéjan seisciento canqque'fave an'biamba ⁷ shavonga ca'ni. Tise pushe, tise dutssiyendeccu, tise'pa pushendeccu'qqe tsu poiya'cco Noéi'ccu fae'ngae ca'ni'fa na'eñe ccushaye. ⁸ Cansian jincho'cho, majan anqque'su, majan an'masia, majan chhajeqqe'su, majan manguqqe'su ⁹ Noéi'ccu fae'ngae ca'ni'fa. Nane dos, dosveyi, quitsa'yeja tise pushei'ccu tsu Chiga mandaqquia'caen ca'ni'fa. ¹⁰ Siete a'ta pasasi na'enjan andema piccoye ashaen. ¹¹ Nane Noéjan seisciento canqque'fave an'biansi segundo ccovu, a'ta diez y sietení tsu pa'cco ande'su tsa'ccu sombo'je'ttija fettaye cuintsu ande tsosini'su tsa'ccu somboye. Toya'caen sefacconi'qqe fettayeqquia'caen tsu sefacconi'su tsa'ccu amppi. ¹² Nane cuarenta a'ta, cuarenta cose'qqe tsu tsa'caen tui'je. ¹³ Tsa'caen unjin tuiyaqui a'ta tsu Noé, tise dutssiyendeccu, Sem, Cam, Jafet'qqe ca'nisi Noé pushe, dutssiyendeccumbe pushendeccu'qqe ca'ni'fa. ¹⁴ Tsendeccu toya'caen poiya'cco cansian jincho'cho, poiya'cco vaura'can, poiya'cco andenga manguqqe'su poiya'cco chhiriria'qqe tsu ca'ni'fa. ¹⁵ Noéi'ccu dos, dosveyi poiya'cco cansian jincho'choja quitsa'ye tise pushei'ccu Chiga

mandaqquia'caen ca'ni'fa. ¹⁶ Poiyi'cco ca'nisi Na'su Chigaja sombo'ttima picco.

¹⁷ Cuarenta a'ta tsu na'enjan bo'iave ji. Bo'iave jipa tsa'o shavoma sufottoen. ¹⁸ Ti'tsse, ti'tsse tsu tsa'ccuja ji. Tsa'ma tsa'o shavoja ombanga sufotto. ¹⁹ Nane tsa'ccu jipa pa'cco biani'su ande'su se'fatssia ccotta'ccoma'qqe picco. ²⁰ Pa'cco ccotta'ccoma piccopa toya tsu tsa'ccuja faesu siete metrove ji. ²¹ Tsa'caen jisi poiyi'cco andeni can'jen'cho aindeccuja pa'fa. Chhiriria, osha'cho vaura'can, tsampini canseqque'su, andenga manguqqe'su'qqe pa'fa. ²² Pa'cco va andeni cansian jincho'cho tsu pa'fa. ²³ Nane Noéni, tisei'ccu tsa'o shavonga ca'ni'chondeccuyi tsu ccushapa canse'fa. Poiyi'cco cca'indeccuja pa'fa —a'i, vaura'can, sefani'su chhiriria, andenga manguqqe'su'qqe pa'fa. ²⁴ Na'enjan tsa'caen jipa ciento cincuenta a'ta sambambe'yi andema picco.

8

Na'en samba'cho

¹ Tsomba tse'i Chigaja Noé, poiyi'cco tisei'ccu tsa'o shavoni can'jen'cho cansian jincho'choma'qqe injan'jemba fingiama mandamoen cuintsu andema samboeñe. Fingiansi na'enjan sambaye ashaen. ² Nane ande tsoini'su tsa'ccu sombo'je'tti piccoyepa sefacconi'su unjin'qqe piccoyequia'caen panshan. ³ Ti'tsse, ti'tsse tsu na'enjan samba. Ciento cincuenta a'ta pasasi tayo sambaji. ⁴ Nane septimo ccovu a'ta diez y sieteni tsu tsa'o shavoja andenga pporopa Ararat ccotta'ccongga ccui.

⁵ Tsa'caen ccuisi toya tsu na'enjan ti'tsse sambaji. Nane decimo ccovu, primer a'ta tsu pa'cco ccotta'cco'su piyiccuja sombopa atteye.

⁶ Faesu cuarenta a'ta pasasi tsu Noéjan tise ñoña'cho ventanama fettapa ⁷ seña'bama fettamaña. Fettamañasi tsaja chhaje jacan ande sambaya'ngae. ⁸ Omboe ppuppuju'choma fettamaña, na'en sambaji'chove atesuye. ⁹ Tsa'ma ppuppuju'choja mani andepa dyaiya'chove attembipa toequi tsa'o shavonga ji. Nane na'en tsu toya pa'cco andema picco'cho. Tsa'caen jisi Noéjan tise tivema yasapa ppuppuju'choma indipa tsa'o shavonga ca'nia.

¹⁰ Faesu siete a'ta pasasi ccase tsu Noéjan ppuppuju'choma fettamaña tsa'o shavo'ye. ¹¹ Fettamañasi japa sime toequi ji. Jipa olivo ccaque cunama tsetto'choi'ccu isi Noéjan atepa in'jan ande tayo sambayeji'choma. ¹² In'jamba faesu siete a'tave ron'dapa ccase ppuppuju'choma fettamaña. Tsa'caen fettamañasi toequi tiseni jimbi.

¹³ Noéjan seisciento uno canqque'fave an'bian'ni, primer ccovu, primer a'ta tsu andema picco'je'cho na'enjan tayo samba. Tsa'cansi Noéjan shavo tsa'oma fettapa can ccutsu. Can ccutsupa atte ande samba'choma. ¹⁴ Segundo ccovu, a'ta veinte y sieteni tsu pa'cco andeja samba. ¹⁵ Tsonsi Chigaja Noéma su: ¹⁶ “Tsa'o shavo'ye sombo'faja que pushei'ccu, que dutssiyendeccu'qqe tise'pa pushendeccui'ccu. ¹⁷ Toya'caen que'i'ccu can'jen'cho poiya'cco cansian jincho'choma somboenjan. Nane

chhiriria, andenga jacanqqe'su, andenga manguqqe'suma'qqe somboenjan cuintsu pa'cco andenga japa dundutssia've atapaye.”

¹⁸ Tsonsi Noéjan sombo. Nane tise pushe, tise dushundeccu, tise'pa pushendeccu'qqe fae'ngae tisei'ccu sombo'fa. ¹⁹ Toya'caen poiya'cco vaura'can, tsampini can'jenqqe'su, andenga manguqqe'su, chhiriria'qqe tsa'o shavo'ye sombo'fa.

²⁰ Tsonsi Noéjan Na'su Chiganga afeye oque'je'chove ccutsiamba osha'cho anqqe'su vaura, oveja'can'ma, osha'cho anqqe'su chhiririama'qqe isupa oquepa Na'su Chiganga afe. ²¹ Tsa'caen oque oraensi ansundesu Na'su Chigaja avujapa asi'ttaemba su: “Ccatsse gi andema tsa'caen egae tsoña'bi a'i egae tsincon'chone. Nane tsaveqqe'su tsu a'ija chuitepie tsa'caen egaveyi in'jañe. Toya'caen ccatsse gi poiya'cco cansian jincho'choma tsa'caen fi'ttiya'bi, ña ja'ño tsonqquia'caen.

²² Nane ande toya jin'ninda joña'cho taiya'cho'qqe pasaya'bi. Chan'dia, coe'je'qqe pasaya'bi. Coejefa, sanfan'qqe pasaya'bi. A'ta, cose'qqe pasaya'bi.”

9

Noéi'ccu fae'ngae injancco'fa'cho

¹ Chigaja Noé, tise dutssiyendeccuma'qqe ñotsse tsoñe in'jamba qqen su: “Pa'cco andeni japa can'jemba atapa'faja. ² Toya'caen tsu poiya'cco va andeni canseqque'su, sefani

chhajeqqe'su chhiriria, andenga manguqqe'su, marni'su avu'qqe que'ima dyoe'sui'ccu in'jan'faya. Nane ña que'inga afesi qui poi'cco tsendeccuma manda'faya. ³ Toya'caen pa'cco cansian jincho'cho tsu que'i anqqe'su. Nane ande'ye sho'yoqqe'su tetachoma anqqe'suve que'inga afeqquia'caeñi gi osha'cho cansian jincho'choma'qqe que'inga afe cuintsu amba canse'faye. ⁴ Tsa'ma aña'cho na toya canseqquia'caen anjampapama qui an'faya'bi. ⁵ Toya'caen poi'a'i shacama, poi cansian jincho'cho shacama'qqe gi ñajaña. Nane que'i anjampai'ccu qui afepoeña'cho. Poiyi'ccoma gi shacave ñajaña tisupapora canse'chone.

⁶ Majan faesu a'ima fi'tti'ninda

faesu a'i tsu tsama'qqe fi'ttiya.

Nane Chiga tisia'caen a'ive agattoen'choma fi'ttipa tsu tsa'caen paya.

⁷ Tsa'ma que'ija poi andenga japa

tsain'bio du'shuve isupa ñotsse atapa'faja.”

⁸ Toya'caen Chigaja Noéma, tise dutssiyendeccuma'qqe su: ⁹ “Que canjan. Que'i'ccu gi fae'ngae injanccopa toya'caen que'i omba'su dutssiyendeccui'ccu'qqe fae'ngae injancco'faya.

¹⁰ Nane poi'cco que'i'ccu tsa'o shavo'ye sombopa can'jendeccu —chhiriria, vaura'can, poi tsampini jincho'choi'ccu'qqe gi fae'ngae injancco'faya. ¹¹ Que'i'ccu cambian'masia've

fae'ngae injanccopa gi su: Ccatsse gi poi'cco cansian jincho'choma ccase na'e'i'ccu fi'ttiya'bi. Ni ccatsse gi pa'cco andema ccase na'e'i'ccu piccopa dañña'bi. ¹²⁻¹³ Uttufasima gi canjaeña

unjimbanga cuintsu que'i attepa Ña que'i'ccu ja'ño jai'ngae'qqe poi cansian jincho'choi'ccu injancco'fa'choma injan'jeñe. Tsama attepa qui in'jan'faya Ña va ande'sui'ccu injancco'fa'choma. ¹⁴ Nane ña mandasi unjimba jangisi uttufasima attepa ¹⁵ gi Ña que'i'ccu, poi cansian jincho'choi'ccu fae'ngae injancco'fa'choma injan'jeña. Ccatsse tsu na'enjan ccase andema piccoya'bi poi cansian jincho'choma fi'ttiye. ¹⁶ Nane uttufasi unjimbanga attiansi gi tsama attepa ña poi ande'su osha'cho cansian jincho'choi'ccu fae'ngae injancco'fa'choma injan'jeña. ¹⁷ Tsa uttufasi tsu ña poi ande'su osha'cho cansian jincho'choi'ccu fae'ngae injancco'fa'choma canjaen'cho.” Tsa'caen tsu Chigaja Noéma su.

¹⁸ Noé dutssiyendeccu tisei'ccu tsa'o shavo'ye sombo'chondeccu tsu Sem, Cam, toya'caen Jafet. Camjan Canaán quitsa tsu. ¹⁹ Tsa tres Noé dutssiyendeccupa tise'pa omba'su dutssiyendec-cui'ccu tsu pa'cco andenga atapa'fa.

²⁰ Noéjan andema sema'su tsu. Tise tsu o'tie ofa tsajama joñe ashaen. ²¹ Jomba tsa nasi nama taipa vinome cupaen. Vinome cupaemba cu'ipa ccusi. Ccusipa chu'cco ccui tise carpa tsaoni. ²² Tsa'caen ccuisi Cam, tsa Canaán quitsa, tise yaya chu'cco ccui'choma atte. Attepa sombopa tise antiandeccoma conda. ²³ Pañamba Sem, Jafeti'ccu sarupama sepaccofanga indipa sepaccopayi carpa tsa'onga ca'nimba tise'pa yaya chu'cco ccui'choma picco'fa. Nane ccanima cambia tise'pa yaya chu'cco ccui'choma atte'fambi.

²⁴ Ccusipa pasasi qquendyapa Noéjan in'jan tise du'shu chu'a tisema tson'choma. ²⁵ In'jamba su:

“Egae tsu tsoña Canaánga.

Nane tise antiandeccu tisema mandasi me'detssia sema'suve tsu daya.”

²⁶ Toya'caen tsu Noéjan su:

“Na'su ña Chiga tsu Semnga ñotsse tsoña.

Nane Sem tsu Canaánma semoeña.

²⁷ Chiga anttesi Jafetja ñoa'me atapaya.

Atapapa Semi'ccu fae'ngae can'jemba tise'qqe Canaánma semoeña.”

²⁸ Na'en tsa'caen pa'cco andema piccopa sambasi Noéjan ti'tsse tresciento cincuenta canqque'fave can'jen. ²⁹ Nane noveciento cincuenta canqque'fave an'biamba pa.

10

Noé omba'su dutssiyendeccu

¹ Va tsu Noé dutssiyendeccu Sem, Cam, Jafet omba'su dutssiyendeccu. Na'en andema piccopa sambasi vandeccoma isu'fasi canse'fa.

² Jafet dutssiyendeccu tsu Gomer, Magog, Madai, Javán, Tubal, Mesec toya'caen Tiras.

³ Gomer dutssiyendeccu tsu Askenaz, Rifat toya'caen Togarma. ⁴ Javán dutssiyendeccu

tsu Elisa, Tarsis, quiteondeccu toya'caen rodaneondeccu. ⁵ Tsendeccuja Jafet

dutssiyendeccu tsu mar ofafani can'jen'fa. Poiyi'cco tsu tisupa andeni can'jemba tisupa aya'fangae afa'je'fa.

⁶ Cam dutssiyendeccu tsu Cus, Mizraim, Fut toya'caen Canaán. ⁷ Cus dutssiyendeccu tsu

Seba, Havila, Sabta, Raama toya'caen Sabteca.

Raama dutssiyendeccu tsu Seba toya'caen Dedán. ⁸ Cus tsu Nimrod quitsa. Nimrodja aishe ñoa'me va ande'su joccapitssia a'i tsu. ⁹ Na'su Chiga anttesi tiseja tsampini jacamba ñotsse panzaye atesu. Tisene tsu qqwen su'cho ashaen: “Tsaja Nimrod'caen Na'su Chiga anttesi tsampini jacamba ñotsse panzaye atesu.” ¹⁰ Tise manda'je'cho canqqe tsu Babel, Erec, Acad toya'caen Calne. Poiyi'cco tsa canqqe tsu Sinar andei'ccu pporotsse jincho. ¹¹ Nane Sinar ande'ye tsu Asurja sombopa faesu canqqeve canqquan. Tise tsu Nínive canqqe, Rehobot-ir, Cala toya'caen tsa rande Resén canqqeve canqquan. ¹² Resén tsu Nínive, Cala enttingeni.

¹³ Mizraimjan Ludeo aindecumbe yaya tsu. Toya'caen anameondeccu, lehabitandeccu, naf-tuhitandeccu, ¹⁴ patruseondeccu, casluhítandeccu toya'caen caftorítandecumbe yaya tsu. Filisteondeccu tsu caftorítandeccu'ye sombo'fa.

¹⁵ Canaánjan Sidón quitsa tsu. Tsaja tise dutssi'ye coenza. Tise faesu dutssi'yeja Het tsu. ¹⁶ Toya'caen tise tsu faesu aindecu'su yaya. Nane jebuseondeccu, amorreondeccu, gergeseondeccu, ¹⁷ heveondeccu, araceondeccu, sineondeccu ¹⁸ arvadeondeccu, zemareondeccu toya'caen hamateondeccu tsu tise omba'su dutssiyendeccu. Omboe tsu tsa cananeondeccuja biani japa can'jen'fa. ¹⁹ Nane cananeondeccu ande tsu Gerar andeni já shoquendi Gazani. Toya'caen Sidón canqqueni já shoquendipa Sodoma, Gomorra, Adma, Zeboimma pashamba Lazani nepi. ²⁰ Tsendeccuja Cam omba'su

dutssiyendeccu tsu. Poiyi'cco tsu tisupa andeni can'jemba tisupa aya'fangae afa'je'fa.

²¹ Semjan Jafet quindya tsu. Tise'qque du'shupasi tise omba'su dutssi'ye tsu Heber.

²² Nane Sem dutssiyendeccu tsu Elam, Asur, Arfaxad, Lud toya'caen Aram. ²³ Aram

dutssiyendeccu tsu Uz, Hul, Geter toya'caen Mas. ²⁴ Arfaxadja Sala quitsa tsu. Salaja Heber quitsa

tsu. ²⁵ Tse'i tsu Heberja dos dutssiyendeccuve an'bian. Fae'cco tsu Peleg. Nane tisema isusi

poiysi'cco aindeccu attufaccosi tsu tsa'caen tisema inisian. Tise quinshin tsu Joctán. ²⁶ Joctán

dutssiyendeccu tsu Almodad, Selef, Hazar-mavet, Jera, ²⁷ Adoram, Uzal, Dicla, ²⁸ Obal, Abimael,

Seba, ²⁹ Ofir, Havila toya'caen Jobab. Poiysi'cco tsendeccu tsu Joctán dutssiyendeccu. ³⁰ Tise'pa

andeja Mesa andeni já shoquendi Sefar andeni. Tsa tsu chiga sombo'jeni'su ccotta'cco'su ande.

³¹ Tsendeccuja Sem omba'su dutssiyendeccu tsu. Poiysi'cco tsu tisupa andeni can'jemba tisupa aya'fangae afa'je'fa.

³² Poiysi'cco tsendeccu tsu Noé omba'su dutssiyendeccu. Nane tise dutssiyendeccumbe

dushundeccuma agattopa tevaen'cho tsu. Tise'pa can'jen'cho andema tevaen'cho tsu. Nane na'en

andema piccopa sambasi tsu tsa'caen atapapa poi andenga japa attufa'fa.

11

Babel'su sefa'tssia tsa'o

¹ Nane tsendeccu can'jeinteja poiysi'cco a'i tsu fae aya'faveyi afa'je'fa. ² Tsomba majan

a'i chiga sombo'jene sombopa Sinar andeni japa fae'ngatssia andema atte'fa. Attepa tse'tti can'jen'fa. ³ Fae a'ta fae'ngae condaseccopa su'fa: "Jinge apichama ladriyove ñoñamba si'ngel'ccu ta'etssia've oque'faya." Patu me'i'onsi tsesui'ccu tsao'ña'fa. Toya'caen tsu breave an'bian'fa ladriyoma setsaeñe. ⁴ Omboe tsu su'fa: "Jinge rande canqqueve canqquiamba ñoa'me se'fatssia tsa'ove'qqe tsao'ñañe sefacconi pporotsse. Tsa'caen tsao'ña'ninda tsu poi'yi'cco cca'indeccuja ingima in'jan'faya joccapitssia've. Toya'caen tsa'caen tsomba gi biani attufambe'yi fae'ngae can'jen'faya."

⁵ Tsa'ma Na'su Chigaja a'i ñoña'cho canqquema atteye ande. Toya'caen tsu a'i ñoña'cho se'fatssia tsa'oma atteye in'jan. ⁶ Attepa Na'su Chigaja asi'ttaen: "Tsendeccuja fae a'iyi tsu. Nane fae aya'fangae tsu afa'je'fa. Tsa'camba fae'ngae in'jamba tsu qqwen tsoñe ashaen'fa. Aqquia ashaen'cho tsu. Nane osha'chove in'jan'da tsu tsa'caen tson'faya. ⁷ Jinge andepa tise'pa aya'fama ccaningae cambiamba qqueñañe cuintsu poi'yi'cco tisupapora ñotsse pañambe'yi can'faye."

⁸ Tsa'caen supa tsu Na'su Chigaja poi'yi'cco a'ima attufaemba maña poi andeni. Attufaensi tise'pa canqqueve ñoña'jen'choma antte'fa. ⁹ Nane tsa'caen Na'su Chiga tise'pa aya'fama ccaningae cambiansi tsa canqquema inisian'fa Babelve "aya'fa qqe'fa'cho" qqwen su'chove. Tsene Na'su tise'pama somboensi poi andeni japa cca'tti cca'tti can'jen'fa.

Sem dutssiyendeccu

¹⁰ Qquen tsu Sem dutssiyendeccu: Na'en andema piccopa sambasi dos canqque'fa pasasi Semjan cien canqque'fave an'bian'ni tsu tise dutssi'ye Arfaxadve isu. ¹¹ Omboe Semjan faesu quiniento canqque'fave can'jemba ti'tsse tsu tsandie, pushesu du'shuve an'bian.

¹² Arfaxadja treinta y cinco canqque'fave an'bian'ni tise dutssi'ye Salave isu. ¹³ Omboe Arfaxadja faesu cuatrociento tres canqque'fave can'jemba ti'tsse tsu tsandie, pushesu du'shuve an'bian.

¹⁴ Salaja treinta canqque'fave an'bian'ni tise dutssi'ye Heberve isu. ¹⁵ Omboe Salaja faesu cuatrociento tres canqque'fave can'jemba ti'tsse tsu tsandie, pushesu du'shuve an'bian.

¹⁶ Heberja treinta y cuatro canqque'fave an'bian'ni tise dutssi'ye Pelegve isu. ¹⁷ Omboe Haberja faesu cuatrociento treinta canqque'fave can'jemba ti'tsse tsu tsandie, pushesu du'shuve an'bian.

¹⁸ Pelegja treinta canqque'fave an'bian'ni tise dutssi'ye Reuve isu. ¹⁹ Omboe Pelegja faesu dosciento nueve canqque'fave can'jemba ti'tsse tsu tsandie, pushesu du'shuve an'bian.

²⁰ Reuja treinta y dos canqque'fave an'bian'ni tise dutssi'ye Serugve isu. ²¹ Omboe Reuja faesu dosciento siete canqque'fave can'jemba ti'tsse tsu tsandie, pushesu du'shuve an'bian.

²² Serugja treinta canqque'fave an'bian'ni tise dutssi'ye Nacorve isu. ²³ Omboe Serugja faesu dosciento canqque'fave can'jemba ti'tsse tsu tsandie, pushesu du'shuve an'bian.

²⁴ Nacorja veinte y nueve canqque'fave an'bian'ni tise dutssi'ye Taréve isu. ²⁵ Omboe Nacorja faesu ciento diez y nueve canqque'fave can'jemba ti'tsse tsu tsandie, pushesu du'shuve an'bian.

²⁶ Taréja setenta canqque'fave an'bian'ni tise dutssiyendeccu Abram, Nacor toya'caen Haránme isu.

Taré dutssiyendeccu

²⁷ Qquen tsu Taré dutssiyendeccu: Tiseja Abram, Nacor toya'caen Haránme yaya. Haránjan Lot quitsa tsu. ²⁸ Taré toya canse'ni tsu Haránjan pa Caldea ande'su Ur canqqueni. Nane tsuma isu'cho canqqueni tsu pa.

²⁹ Abramjan Saraima pushe. Nacorja Milcama pushe. Nane Milcaja Harán onque'nge tsu. Harán faesu dutssi'ye tsu Isca. ³⁰ Saraija du'shuve isuye oshambipa du'shuve me'cco canse.

³¹ Taréja Canaán andeni jaye in'jamba Caldea ande'su Urne sombopa ja. Tisei'ccu tsu tise dutssi'ye Abram'qqe ja. Toya'caen tsu tise du'shu Lot, tise china Sarai'qqe jaja'fa. Canaán andeni jaye in'jan'ma Harán canqqueni nepipa tse'tti can'jen'fa. ³² Taréja dosciento cinco canqque'fave an'biamba pa Harán canqqueni.

12

Chiga Abramma ttu'se'cho

¹ Fae a'ta tsu Na'su Chigaja Abramma su: “Que andema catipa ña quenga can'jeña'cho andenga jaja. Nane que antiandeccu, que yaya tsa'oma'qqe catipa jaja. ² Quema ñotsse tsomba

gi que dutssiyendecui'ccu ti'tsse'tssi a'ive tsoña. Nane quei'ccu ña poi'cco a'ima ñotsse tsonsi tsu poi'cco a'i que inisema ñotsse afa'faya. ³ Majan quema in'jamba ñotsse afa'ninda gi tise'pama ñotsse tsoña. Tsa'ma majan quema afase'ninda gi tise'pama egae tsoña. Nane quei'ccu tsu poi ande'su aindeccuja Ña ñotssiamama isu'faya.”

⁴ Tayo setenta y cinco canqque'fave an'bian'ni Na'su Chiga Abramma mandasi Haráne sombopa ja. Lot'qqe tisei'ccu fae'ngae ja. ⁵ Nane tsa'caen japa Abramjan tise pushe Saraima, toya'caen tise quinshimbe du'shu Lotma'qqe anga. Toya'caen pa'cco tise'pa Haráni can'jemba isu'cho andu'choma, tseni an'bian'cho semasundecuma'qqe angapa Canaán andeni jaye ashaen'fa. Canaánni nepipa ⁶ tsa ande enttingeni japa Siquem canqqueni nepi'fa. Nane Siquemni tsu More roble quini'ccoccuja jin, tsa chigama iñajan'jen'tti. Cananeondeccu tsu tsa canqqueni can'jen'fa. ⁷ Abram tseni can'jensi tsu Na'su Chigaja tisenga attiamba su: “Va andema gi que dutssiyendecunga afeya.”

Tsa'caen tisenga attiamba susi Abramjan Na'su Chiganga afeye oque'je'chove tse'ttinga ccutsian. ⁸ Omboe tsene sombopa Betel canqquema chiga sombo'jefa'su ccotta'ccongá japa tise carpama ccutsian. Tseni can'jen'ninda tsu Betel canqqueja chiga amppi'jefani. Toya'caen chiga sombo'jefani tsu Hai canqque. Abram tseni can'jemba faesu Chiganga afeye oque'je'chove ccutsian Na'su Chigama iñajañe. ⁹ Omboe ccase jaye ashaemba cca'tti cca'tti canjen'ñacca ja Néguev andeni nepiye.

Abram Egiptoni can'jen'cho

¹⁰ Tsonsi tse'i tsu qquipoesuiteve da poi Canaán andeni. Nane añá'cho me'i'onsi Abramjan sombopa Egiptoni jaye ashaen tseni japa can'jeñe.

¹¹ Egiptoni pan nepijipa tsu tise pushe Saraima su: “Que canjan. Atesu gi queja me'detssia pushesusi.

¹² Nane Egiptondeccu quema atte'ta tsu su'faya: ‘Va pushesu tsu va tsandiembe pushe.’ Tsa'caen in'jamba tsu ñama fi'ttiya quema canseveyi itsapa an'biañe. ¹³ Tsa'caen dasa'ne chigáne queja ña que'tte qquen suja cuintsu tsa'caen in'jamba ñama ñotsse tson'faye.”

¹⁴ Tsomba Abram Egiptoni nepisi poi Egiptondeccuja Saraima attepa me'detssisi in'jan'fa.

¹⁵ Toya'caen Egipto ande na'su faraónma shondosundeccu'qqe tise ma attepa tise ne na'sunga conda'fa. Conda'fasi faraónjan manda cuintsu Saraima i'faye tise tsaoni.

¹⁶ I'fasi na'su faraónjan Saraima ñotsse in'jamba Abramnga ñotsse tson. Nane oveja, vaura, sema'su tsandiendeccu, sema'su pushesundeccu, boro, toya'caen cameyo tsain'bitsse afe Abramnga.

¹⁷ Tsa'ma tsa'caen Saraima itsa'fasi tsu Na'su Chigaja na'su faraón, tise tsa'osundeccuma'qqe osha'cho paqqe'sui'ccu da'ño. ¹⁸ Tsonsi faraónjan in'jamba Abramnga ttu'sepa tise ma su: “¿Jongoesie qui tsa'caenjan ñama tson? ¿Mingapa qui ñanga tansintsse condambi va pushesuja que pushe qquen? ¹⁹ Nane que que'tte qquen susi gi ti'tssecan'da tise ma pusheye'can. Ja'ñojan va'tti tsu que pushe. ¡Junde tise ma angapa jaja!”

²⁰ Tsa'caen supa faraónjan tise tsandiendeccuma

manda cuintsu Abram, tise pushe, pa'cco tise an'bian'choma'qqe junde Egiptone somboeñe.

13

Abram, Loti'ccu attufaen'fa'cho

¹ Abramjan tise pushei'ccu, pa'cco tise an'bian'choi'ccu Egipto ande'ye sombopa toequi Néguév andeni ja'fa. Tise quishimbe du'shu Lot'qqe fae'ngae tise'pai'ccu ja. ² Abramjan ñoa'me rico. Nane cori, totoacori, tsain'bia vaura'can'ma'qqe an'bian. ³ Néguévni japa cca'tti cca'tti can'jemba Betel canqqueni nepi'fa. Nane toequi tise'pa tayoe can'jeni japa can'jen'fa. Tsaja Betel, Hai canqque enttingeni. ⁴ Tse'ttinga tsu tayoeja Chiganga afeye oque'je'choma ccutsian. Tsa'camba tsu toe'ttingayi Na'su Chigama ñajan.

⁵ Toya'caen Lot'qqe ñoa'me rico. Nane tise ton'ton Abram'caen osha'cho vaura, ovejama'qqe an'bian. Toya'caen tsain'bio a'i tisei'ccu can'jen'fa. ⁶ Tsa'cansi tsu Abram, Loti'ccu can'jen'ttija ñoa'me on'ba'o. Nane shoshovi shacasi tsain'bio vaurama tseni fae'ngae o'fiañe oshambi. Tsa'camba ti'tsse tsa'caen fae'ngae can'jeñe osha'fambi. ⁷ Toya'caen Abram vaurama coirasundeccuja Lot vaurama coirasundeccui'ccu sepiccopa tssetssecco'fa. ⁸ Tsa'cansi fae a'ta Abramjan Lotma su: “Quei'ccuja antiandeccu gi. Tsa'cansi tsu ingi iyiccoyeja ega. Ni ingimbe coirasundeccu'qqe tsa'caen iyicco'faye ega tsu. ⁹ Tsain'bitssi ande tsu jin manima in'jan'da ingi isuya'cho. Chigáne ña'ñe joqquitssija. Que tansinfanga ja'ninda gi ñajan pavefanga jaya.

Tsambi'ta que pavefanga ja'ninda gi ñajan tansinfanga jaya.”

¹⁰ Tsa'caen susi Lotja pa'cco Jordán na'en'su andema cambia tsama in'jan. Nane Zoar canqquepi tsu tsain'bio tsa'ccu jin. Nane ñoa'me ñotssia jombachoqquiacan'omba tsu Egipto andian'caëni attian. Lot tsa'caen cambia in'jainteja toya Na'su Chiga Sodoma canqque, Gomorra canquema joqquitssian catimbi'te tsu. ¹¹ Tsa'caen in'jamba Lotja Jordán na'en'su andeni jaye qquen supa tise'pa can'jen'tti'ye sombopa chiga sombo'jefanga ja. Tsa'caen tsu Abram, Lot'qque attufacco'fa. ¹² Abram toya Canaán andeni can'jensi Lotja Jordán na'en jini'su canqueni can'jeñe ja. Nane Sodoma canqque pporotsse tsu can'jen. ¹³ Tseni'su aindeccuja ñoa'me egae in'jamba Na'su Chigama chi'gapa osha'cho tson'choi'ccu egae tsincon'fa.

¹⁴ Lot tsa'caen jasi, Na'su Chigaja Abramnga su: “Que can'jene ñotsse canjan. Nane tansinfanga, pavefanga chiga sombo'jefanga, chiga amppi'jefanga'qque cambia in'janjan: ¹⁵ Quenga gi afeya pa'cco que cambia atte'cho andema. Tsangae qui queja, que omba'su dutssiyendeccu'qque va andema an'bian'faya. ¹⁶ Ña anttesi tsu tsendeccuja ande'su sisipa'caen tsain'bitssia've da'faya. Nane sisipafo'choma agattoye oshambiqquia'caen tsu que dutssiyendeccuja agatto'ma'sia've da'faya. ¹⁷ Tsa'cansi jangipa pa'cco ande bia'sunga attaja'sunga'qque jacamba canjan ña quenga afe'cho andema.”

¹⁸ Tsa'caen susi Abramjan pa'cco tise

an'bian'choma ñoñamba Hebrón canqque pporotsse japa ccotta'cco'su roble quini'ccoccuni can'jen. Tseni'su na'suja Mamre tsu. Tseni can'jemba Abramjan Chiganga afeye oque'je'choma ccutsian Na'su Chigama ñajaña.

14

Abram Lotma ccushaen'cho

¹ Tsaite tsu Amrafelja Sinar canqque na'su. Ariocja Elasar canqque na'su tsu. Quedorlaomerja Elam canqque na'su tsu. Toya'caen Tidalja Goim canqque na'su tsu. ² Tsendeccu tsu fae'ngae in'jamba faesundeccui'ccu geraen'fa. Nane Beraja Sodoma canqque na'su tsu. Birsaja Gomorra canqque na'su tsu. Sinabja Adma canqque na'su tsu. Semeberja Zeboim canqque na'su tsu. Tsendeccui'ccu geraemba toya'caen Bela canqque'su na'sui'ccu'qqe geraen'fa. Tsa Bela canquema tsu Zoarve inisian'fa. ³ Tsa cinco canqque'su nasundeccu tsu tise'pa sundarondeccui'ccu Sidim ande'su sinjunccuni bo'fa. Tsa sinjunccu tsu ja'ño a'taja Pa'cho marve da. ⁴ Nane doce canqque'fave tsu na'su Quedorlaomerja tise'pama patsu. Patsusi somboye in'jamba tsu canqque'fa trece tsa cinco nasundeccuja bo'fa Quedorlaomerja catiye na'suve. ⁵ Faesu canqque'fa tsa Quedorlaomerja tisei'ccu fae'ngae in'jan'cho nasundeccui'ccu jipa faesu aindeccuma patsu'fa. Nane Astarot-karnaim andeni japa refaitandecuma patsu'fa. Toya'caen Ham andeni japa zuzitandecuma patsu'fa. Tsomba

Save-quiriataim andeni japa emitandeccoma patsu'fa. ⁶ Tsomba Seir ccotta'cconi japa horeondeccuma patsupa omboen'fa Parán'su fae'ngatssia andeni. Tsa fae'ngatssia ande tsu a'i meniai'ccu pporotssi. ⁷ Tsa'caen patsupa toequi shandapa jipa Quedorlaomer, tisei'ccu fae'ngae geraen'fa'chondeccu'qqe En-mispatni nepi'fa. Tsa canqquembe faesu iniseja Cades. Tseni nepipa pa'cco amalecitandeccu andema da'ñomba sefaen cati'fa. Toya'caen tsa'caeñi tsu tson'fa amorreondeccumbe Hazon-tamar andema'qqe. ⁸⁻⁹ Tsa'caen faesuma patsusi tsu Sodoma, Gomorra, Adma, Zeboim, toya'caen Bela canqque'su nasundeccu tsa Sidim sinjuncuni bo'fa'cho. Tsa'caen bopa tsu tsa cinco nasundeccu tise'pa sundarondeccui'ccu na'su Quedorlaomeri'ccu geraen'fa. Quedorlaomeri'ccu fae'ngae tsu fuite'fa Tidal, Amarafel toya'caen Arioc. Tsendeccuja cuatroyi'cco tsu Elam, Goim, Sinar toya'caen Elasar canqque'su nasundeccu. ¹⁰ Nane tsa Sidim sinjuncuni tsu tsain'bio rande chango sheque, brea jincho. Quedorlaomer tise'pama patsusi tsa Sodoma, Gomorra nasundeccuja ccuyin japa majanda tsesu changonga amppi ca'ni'fa. Cca'indeccuja ccotta'ccongá ccuyin ja'fa.

¹¹ Tsomba tsu patsusundeccuja Sodoma, Gomorra canqquenga japa pa'cco anqque'su, toya'caen osha'cho bare'choma'qqe taipa jaja'fa. ¹² Nane Lot, Abram antianmbe du'shuja, Sodomani can'jensi tisema'qqe indipa anga'fa pa'cco tise an'bian'choma'qqe. ¹³ Tsa'ma fae'cco tseni'su a'ija ccushapa sombopa Hebreo a'i

Abramnga conda'su ji. Nane Abramjan toya tsa Amorreo a'i Mamrembe roble quini'ccocconi can'jen. Mamre antiandeccu Escol, toya'caen Aner'qqe Abramma fuitesundeccu tsu.

¹⁴ Jipa condasi Abramjan paña tise antianmbe du'shu Lotma indipa anga'choma. Pañamba poiyo'cco tise'be semasundeccoma ttu'se. Nane tsendeccu chuitepie Abrami'ccu can'jensi Abramjan tise'pama ñotsse atesu. Nane poiyo'ccota tsu tresciento diez y ocho tsandiendeccu. Tsendeccu'ccu tsu Abramjan tsa Quedorlaomer aindeccoma mandian'fa Dan canqqueni. ¹⁵ Tseni nepipa tise aindeccoma dos naccuve attufaemba a'tutsse can'jemba cose tsa nasundeccoma patsupa biani mandian'fa. Nane Damasco canqquema panshamba ti'tsse joccani japa Hoba canqqueni tise'pama mandian'fa. ¹⁶ Tsa'caen patsupa pa'cco tise'pa itsapa anga'choma itsa'fa. Tsa'caen tsu Abramjan tise antianmbe du'shu Lotma ccushaen. Pa'cco Lotmbema itsa'choma'qqe atte'fa. Toya'caen pushesundeccoma, cca'indeccuma'qqe ccushaen'fa.

Melquisedec Abramma ñotsse afa'cho

¹⁷ Abram tise ma fuite'su nasundeccu'qqe Quedorlaomerma patsupa jiña'fasi Sodoma canqque'su na'suja sombopa tise'pama cachui Save sinjunccuni. Tsa Save sinjunccumajan “Ande na'sumbe sinjunccu” qqen tsu su'fa. ¹⁸ Toya'caen Melquisedec tsa Salem canqque'su na'su'qqe tise ma cachuiye ji. Tiseja Sefacconi'su

Joccapitssia Chigama afa'supa pan, vinoma'qqe ipa ¹⁹ Abramma ñotsse afapa qqen su:

“Cuintsu Sefacconi'su Joccapitssia Chiga sefacco, andema'qqe agattoen'su quema ñotsse tsoñe.

²⁰ Nane Sefacconi'su Joccapitssia Chiga ñotsipa quema fuitesi quema iyiccayesundecuma patsu'ta tisema ñotsse afa'faja.”

Tsa'caen susi Abramjan tise patsupa itsapa angaji'choma fae chonga'ccoeyi Melquisedecnga afe. ²¹ Tsa'caen afesi omboe Sodoma na'suja Abramnga su:

—Que ña aindecuma ccushaen'choma ñanga afepa pa'cco osha'cho que itsa'choma que'iyi isu'faja.

²² Tsa'ma Abramjan tisenga su:

—Nane Na'su Sefacconi'su Joccapitssia Chiga sefacco, andema agattoen'su paña'jen'ni gi su:

²³ Quememajan isuya'bi gi, fae iro, ni sapato tandan'faveyi'qqe, queja que afesi ñajan ricove da qqen su'fasa'ne. ²⁴ Nane ñajan tayo ña aindecu an'fa'chosi jongoesuveyi'qqe ti'tsse isuya'bi gi. Tsa'ma ñama fuitesundeccu, Aner, Escol, toya'caen Mamre tsu ingi itsa'choma attufaemba isu'faya.

15

Chiga Abrami'ccu injancco'fa'cho

¹ Tsama omboe Na'su Chigaja Abramnga attimamba tisema su:

—Dyombe canjan Abram. Ña gi quema fuite'su. Ña quenga afeya'choja ñoa'me injan'tssiya tsu.

²⁻³ Tsa'ma Abramjan tisema su:

—Na'su Chiga, ¿jongoesune tsu bare ña osha'choma injan'tsse isuye? Ñajan dutssi'yeye me'choa gi. Nane Queja ñanga du'shuma afembisi me'cco pa'ninda tsu tsa Damasco canqque'su Eliezer-ñambe sema'su a'i-pa'cco ña an'bian'choma isuya.

⁴ Tsa'ma Na'su Chigaja tisema su:

—Que an'bian'choma isuya'choja ñoa'me quem-betsse dutssi'yeya tsu. Nane Eliezer isuya'bi tsu.

⁵ Tsa'caen supa Na'suja Abramma tsoteni an-gapa su:

—Sefacconima ñotsse cambia o'fema agattocan-jan; da osha've'se qui. Nane tsa'caen tsu que dutssiyendeccuja agattoye oshambi'tsse atapaya.

⁶ Na'su Chiga tsa'caen susi Abramjan tise su'choma ñotssi pañamba in'jan. Tsa'caen in'jansi Na'su Chigaja “Abram tsu ño'an” qqquen su.

⁷ Toya'caen tsu Chigaja Abramnga su:

—Ña gi Na'su. Quema gi Caldea ande'su Ur canqquene somboemba vani i, va andema quenga afeye que an'biañe.

⁸ Tsonsi Abramjan ñajampaña:

—Na'su Chiga, ¿ma'caen gi atesuya va andeja ñambeve?

⁹ Tsa'caen ñajampañasi Chigaja su:

—Ñani ija fae vaura pushema tres canqque'fave an'bian'choma. Toya'caen chivo pushema, quitsa'yema'qqe ija tres canqque'fave an'bian'choma. Toya'caen fae manambe, fae ppuppuju'choma'qqe ija.

¹⁰ Abramjan pa'ccoma Chiga mandaqquia'caen Chigani ipa enttinge'ye gettipa isevetsse isevetsse

ccuiña. Tsa'ma sanccopapamajan gettimbe'yi ccuiña. ¹¹ Tsa'caen ccuiña'chonga ccompanajan ande'fa. Tsa'ma Abramjan tsa ccompanama dyoña'jen. ¹² Tayo cose jisi Abramjan ñoa'me anae'supa pa'ye'e ana. Tsa'caen ana'jen'ni pa'cco tise ccui'tti sintsse dasi Abramjan ñoa'me dyo. ¹³ Tsa'caen dyosi Na'suja tisema su:

—Atesuya'cho tsu que dutssiyendeccu faesu andeni can'jemba tsenima acquiatsse ganambe semasundeccuve da'faya'choma. Tsa'caen dapa tsu cuatro ciento canqqe'fave me'detsse vana'faya. ¹⁴ Tsa'ma tise'pama vanaesundec-cumbe injama'choma gi somboeña. Nane tsa andema gi vanaeña que dutssiyendeccuma ccushaeñe. Ccushapa sombopa tsu osha'cho ñotssia bare'choma an'bian'faya. ¹⁵ (Tsa'ma queja coenza ccashe'yeye dapa qui opatsse papa que tayopi'su coenzandecconi jaya.) ¹⁶ Cuatro ciento canqqe'fave tsa andeni can'jemba tsu que omba'su dutssiyendeccuja ccase vani ji'faya. Nane toya tsu amorreondeccuja nanitsse egae tsincon'fambi ña tise'pa andema itsaya'chove.

¹⁷ Tsonsi chiga amppipa tayo si'en dasi oro'je'cho si'ngema angaqqe'su api, si'nge anchanda'je'cho'qqe attiamba tsa gettipa ccuiña'cho enttinge'ye panshan'fa. ¹⁸ Tsa'caen tsu tsequi a'ta Na'su Chigaja Abrami'ccu injanccopa tisema su:

—Va andema gi que omba'su dutssiyendec-cunga afeya. Egipto'su naene pa'cco tsa Eufrates na'en jimpi. ¹⁹ Nane tsa andeta tsu ja'ñojan, ceneondeccu, cenezeondeccu, cadmoneondeccu, ²⁰ hititandeccu, ferezeondeccu, refaitandeccu,

21 amorreondeccu, cananeondeccu, gergeseondeccu toya'caen jebuseondeccu ande.

16

Agar Ismaelve isu'cho

¹ Abram pushe Saraija du'shuve isuye oshambi. Tsa'ma tise'be sema'su pushesuve an'bian, egipto'su pushesu, Agar, qquen inisecho'choma.

² Tsa'caen an'biamba asi'ttaemba Abramnga su:

—Que canjan, Na'su Chiga se'pisi gi ñajan du'shuve me'cho. Tsa'camba gi in'jan que ña sema'su pushesui'ccu can'jen'ninda tsu osha'ta ñambe du'shuve isuya'bi.

Tsa'caen susi Abramjan Sarai suqquia'caen in'jan. ³ Tsonsi Abram pushe Saraija Egipto ande'su pushesu Agarma tise tsa'ndu Abramnga afe cuintsu tisei'ccu fae'ngae can'jeñe. Tsa'caen afesi tsu Abramjan diez canqque'fave Canaán andeni can'jen. ⁴ Abram tsa'caen Agari'ccu can'jensi surive da. Tsa'caen dapa Agarja tise na'su Saraima patsu qquen in'jamba quinsepoemba can'boen. ⁵ Tsa'caen in'jansi atepa Saraija Abramnga su:

—Que qui shacapa Agar ñama patsu'chone. Nane ña gi tisema quenga afe fae'ngae can'jeñe. Tsa'ma ja'ño surie dapa tiseja ñama patsu qquen in'jan. Tsa'cansi Na'su Chiga tsu atesu majan tsu shacapa—que, tsambi'ta ña.

⁶ Tsama pañamba Abramjan su:

—Que canjan, va pushesuja quembe sema'su tsu. Tisema ma'caen tsoñe in'jan'da tsa'caen tsonjan.

Tsa'caen susi Saraija Agarma tsain'bitsse egae tsincoñe ashaen. Tsa'caen tsinconsi Agarja ccuyin ja. ⁷ Tsa'ma Na'su Chigama sefacconi'su shondo'suja pushesu a'i menia jayipa Shur tsaiqui'su tsa'ccu sombo'je'ttini can'jen'choma cachuipa ⁸ ñajampaña:

—Agar, Saraimbe sema'su, ¿mane qui ji? Toya'caen, ¿mani qui jayi?

Agarja pañamba su:

—Ña na'su Saraine gi ccuyapa jayi.

⁹ Tsonsi Na'su Chigama shondo'suja su:

—Toequi que na'suni japa tisema ñotsse pañajan.

¹⁰ Toya'caen tsu Na'su Chigama shondo'suja su:

“Tsain'bitsse gi atapoeña que dushundecuma.

Nane majañi'qqe agattoye osha'faya'bi tsu.

¹¹ Tayo qui suri. Tsandie du'shuve isupa qui Ismael qqen inisiaña.

Nane Na'su Chiga que inajen'choma pañamba in'jansi qui tsa'caen inisiaña.

¹² Tiseja tsampi'su cavayoa'caen injansuya tsu.

Cca'indeccuma iyicca'yesi tsu ccane'qqe tisema iyicca'ye'faya.

Nane tise antian se'pi'ni'qqe toya tsu tiseja tise'pa utufani can'jeña.”

¹³ Tsonsi Agarja Na'su Chigama afapa su: “Chiga tsu atte'su.” Nane tayo Chigai'ccu condasepa tsu tiseja su: “Chiga ñama atte'ni'qqe gi toya canse.” ¹⁴ Tsa'caen tsonsi tsu tsa tsa'ccu posoma inisian'fa Lajairoi poso, “Ñama atte'su Cansian Chigambe poso” qqen su'chove. Tsa posoja Cadesne Beredni ja'je'cho enttingeni.

¹⁵ Can'jemba Agar Abram du'shuve isusi Abramjan tisema inisian Ismaelve. ¹⁶ Abramjan ochenta y seis canqque'fave an'bian'ni tsu Ismaelma isu.

17

Injancco'fa'chove canjaen'cho

¹ Tsomba Abram noventa y nueve canqque'fave an'bian'ni Na'su Chigaja tisenga attiamba su:

—Ña gi Chiga Osha'choma Oshacho'cho. Ña in'janqquia'caen shacave me'cho canseja.

² Tsa'caen cansesi gi ñajan quei'ccu injanccopa tsain'bitssi dushundeccuve quei'ccu atapoefia.

³ Tsama pañamba Abramjan andenga puntssan ccui. Puntssan ccui'ni'qqe toya tsu Chigaja afapa su:

⁴ —Ña quei'ccu injanccoya'choja qqwen tsu: Que qui tsain'bitssi aindecumbe quitsaya.

⁵ Tsa'cansi tsu ti'tsse Abram qqwen quema su'faya'bi. Tsa'ma ja'ñonda tsu quema inisian'faya Abrahamme. Nane tsain'bitssi aindecumbe yayasi tsu tsa'caen su'faya.

⁶ Ñoñaña gi que dutssiyendeccu tsain'bitsse atapa'faya'chove. Nane tise'pa'ye tsu nasundeccuja sombopa tsain'bio andema manda'faya.

⁷ Ñajan quei'ccu injanccopa gi tsangae que Chigave da. Toya'caen que omba'su dutssiyendeccu'ccu injanccopa gi tsangae tise'pa Chigave daya. ⁸ Quenga, toya'caen poi'cco tsendecunga gi pa'cco Canaán andema afeya. Nane que'i ja'ño can'jen'cho andema gi tsangae que'inga afepa tsangae que'i Chigave daya.

⁹ Toya'caen tsu Chigaja Abrahamma su:

—Tsa'ma queja, poiyi'cco que omba'su dushundeccu'qqe ña que'i'ccu injancco'fa'choma injan'jen'faya. ¹⁰ Nane qqen tsu ña que'i'ccu injanccopa manda'choja: Poiyi'cco tsandiendeccu tsu que'suja tise'pa ttonoma chhiyi tevaen'faya'cho. ¹¹ Nane shondusu'cho tsutopa'su ttonoma tsu chattuya'cho ña que'i'ccu injancco'fa'choma canjaeñe. ¹² Ja'ño ashaemba tsangae tsu tsa'caen tsoña'cho. Poi tsandie du'shuma tsu que'i'suja tsa'caen chhiyi tevaeña'cho ocho a'tave nepisi. Nane ñoa'me que'i aindeccu toya'caen faesunima chavapa sema'suve an'biandecumbe du'shuma'qqe tsu tsa'caen tsoña'cho. ¹³ Poiyi'ccoma tsu fae'ngatsse tsa'caen tsoña'cho. Tsa'caen tevaemba qui pa'cco que'i canse'cho canqqe'fa ña que'i'ccu injancco'fa'choma injan'jen'faya. ¹⁴ Tsa'ma majan tsa'caen tevaembi'choaja que'i'ccu can'jeñe oshambi. Nane ña que'i'ccu injancco'fa'choma chi'gapa tsu que'i'ccu can'jeñe oshambi.

¹⁵ Toya'caen tsu Chigaja Abrahamma su:

—Que pushe Saraima'qqe ti'tsse tsa'caen su'faya'bi. Nane ja'ño ashaemba tsangae tsu Sarave inisian'faya. ¹⁶ Ñajan tisema ñotsse tsoñe in'jamba gi du'shuve tisenga afeya. Ju, ñoa'me gi tisema ñotsse tsoña. Tise tsu tsain'bitssi aindeccumbe mamaña. Nane tise omba'su dushundeccu tsu tsain'bio ande'su nasundeccuve dapa manda'faya.

¹⁷ Tsonsi Abrahamjan ccase andenga puntssan ccuipa qqen asi'ttaemba feña: “¿Oshaya ti fae tsandie cien canqqe'fave an'bian'cho du'shuve

an'biañe? Toya'caen ¿oshaya ti Sara'qqe noventa canqque'fave an'bian'cho du'shuve isuye'ta?"

¹⁸ Tsa'caen asi'ttaemba Chiganga su:

—Isha tsu Ismaelja que ñotsse tsoña'choi'ccu canseya.

¹⁹ Tsa'caen susi Chigaja su:

—Tsa'ma Ñanda gi su que pushe Sarata tsu tsandie du'shuve isuya. Tsonsi qui inisiaña Isaacve. Tisei'ccu gi Ña quei'ccu injancco'fa'choma a'tatsse canjeña. Toya'caen tise dutssiyendeccui'ccu gi tsangae tsama canjeña.

²⁰ Toya'caen tayo gi paña que Ismaelne in'jan'choma. Tsane'qqe gi ñotsse tsoña. Tisei'ccu'qqe gi tsain'bitssi du'shuve atapoëña. Tise omba'su dutssiyendeccu'qqe tsain'bitssi'faya tsu. Nane Ismael tsu doce ti'tsse'tssia nasundeccumbe quitsaya. Tisei'ccu gi fae rande ande'su aindeccuve atapoëña.

²¹ Tsa'ma ña injancco'fa'chomanda gi Isaac dushundeccui'ccuyi injan'jeña. Nane fae canqque'fa pasambi'te tsu Saraja tsandie du'shu Isaacve isuya.

²² Chigaja tsa'caen Abrahamnga supa ansundin ja. ²³ Ansundin jasi tsequi a'ta Abraham poi'cco tise tsaoni can'jen'cho tsandiendeccumbe shondusu'cho tsutopa'su ttonoma cha'ttu. Nane tise du'shu Ismael, poi'cco tisei'ccu can'jen'cho semasundeccuma'qqe Chiga suqquia'caen tsa'caen chhiyitevaen. ²⁴ Abraham noventa y nueve canqque'fave an'biansi tsa'caen tisu ttonoma chhiyitevaenge. ²⁵ Tise du'shu, Ismael, trece canqque'fave an'biansi ttonoma

chhiyitevaenge. ²⁶ Nane fae a'ta tsu yaya Abraham, tise du'shu Ismael'qqe fae'ngae ttonoma chhiyitevaenge'fa. ²⁷ Toya'caen tise tsaoni isu'chondeccu, cca'inima chavasi can'jendeccu'qqe tsequi a'tayi tise'pa na'sui'ccu fae'ngae ttonoma chhiyitevaenge'fa.

18

Abraham dutssi'yeve condase'cho

¹ Tsonsi Na'su Chiga ccase Abrahamnga attian Mamrembe roble quini'ccocconi. Enttinge a'ta a'que'osi Abrahamjan tise carpa tsa'o'su sombo'ttini dyai. ² Dyaipa asuccocamba tres tsandiemate tse'tti pporotsse ccutsu'fa'choma. Tise'pama attepa carpa'ye butto jangipa chigambiañe catse. Buttopa japa tise'panga catsepa tise tsovema andenga puntssamba ccuipa ³su:

—Ña na'su, chigáne va'tti re'riccone dyaiccaja.

⁴ Quema shondo'su gi. Que in'jan'ninda gi tsa'ccuve iñajamba afeya que'i tsu'ttema cashiye. Cashipa quini'cco'su tumbianccuni dyaicca'faja.

⁵ Que'i tsa'caen ño'fa dyai'ninda gi panma iya cuintsu que'i an tteppuye. Nane va quema shondo'su tsaoni jipa qui tsa'caen an tteppupa ti'tsse jaya.

Tsa'caen susi tise'paja Abrahamnga su'fa:

—Ñotssi tsu. Tsa'caen tsonjan.

⁶ Tsonsi Abrahamjan carpanga ca'nimba Sarama su:

—Uta'tsseyi ñotssia harinama cuarenta librave isupa panme ñoñajan.

7 Tsa'caen supa Abrahamjan vaura ttuccuni buttopa japa bove ñotssia vaura du'shuma indipa tise'be sema'sunga afe cuintsu fi'ttipa sho'ccoeñe. 8 Tsonsi sho'ccoen nanimba chocho, quesoma'qqe ipa pasiasundecunga afe vaura nai'ccu añe. Tsendeccu quini'cco tumbianccuni dyaipa an'jen'fasi Abrahamjan tise'pama shondo'je.

9 An nanimba Abrahamnga su'fa:

—¿Mani tsu que pushe Saraja?

Iñajampañasi Abrahamjan su:

—Carpani tsu can'jen.

10 Tsonsi fae'cco tsendeccu'suja su:

—Fae canqqe'fa panshansi gi ccase queni jiya.

Ña jisi tsu que pushe Saraja tsandie du'shuve isuya.

Tsa'caen su'je'choma Saraja Abraham sepacofae a'tutsse carpani pañá ccutsu.

11 Nane Abrahamjan, Sara'qqe coenza. Saraja coenza ccasheve dapa tayo samboen'cho.

12 Tsa'camba Saraja pañamba feña. Nane feñamba asi'ttaen: “¿Ñoa'me ti gi tsa'caen avujaya? Ña, ña tsa'ndu'qqe coenzata, ¿ma'caen?” 13 Tsa'ma Na'su Chigaja tise asi'ttaen'choma in'jamba Abrahamnga su:

—¿Micomba tsu Saraja feñamba “¿Ñoa'me ti gi coenza ccasheve dapa du'shuve isuya?” qqen su? 14 ¿Oshambi ti Na'su Chigaja osha'choma oshapa tsa'caen tsoñe? Nane ñoa'me fae canqqe'fa pasasi ña ccase jisi tsu Saraja tsandie du'shuve isuya.

15 Tsa'caen susi pañamba Saraja dyopa a'tiembra su:

—Me'in, feñambi gi.

Tsa'ma Na'su Chigaja su:

—Atte gi que feña'choma.

Sodomama ccusheñe iñajan'cho

16 Tsa'caen condasepa an nanimba pasiasundeccu jangipa Sodoma canqqueni jaye ashaen'fa. Abrahamjan camoeñe in'jamba re'riccoe tise'pai'ccu fae'ngae ja. 17 Tsonsi Na'su Chigaja qqen asi'ttaen: “Ñotssi tsu ña tsoña'choma Abrahamnga condaye. 18 Nane tiseja tsain'bitssi a'ive atapasi joccapitssia aindeccuve tsu da'faya. Tisei'ccu gi poi ande'su aindeccuma ñotsse tsoña. 19 Nane tiseja gi in'jan cuintsu tise mandasi tise dushundeccu, tise omba'su dutssiyendeccu'qqe ña su'choma pañamba ñotsse canse'faye. Tsa'caen tson'ninda gi pa'cco ña su'choma tsoña.” 20 Tsa'caen asi'ttaemba Na'su Chigaja su:

—Sodoma canqque'su aindeccu, Gomorra canqque'su aindeccu'qqe ñoa'me dyo'oe egae tsincon'fa. Tsa'caen tsincon'choma poi ande'su aindeccu in'jamba condasecco'fasi gi paña. 21 Tsane gi japa atesuya tise'pa ña pañaquua'caen tsincon'choma. Attepa gi in'jaña.

22 Tsa'caen su'je'ni tsa faesu dos pasiasundecuja Sodomani jaye ja'fa. Tsa'ma Abrahamjan toya Na'su Chigai'ccu ccutsupa 23 ti'tsse catsepa iñajampaña:

—¿Ñoa'me ti qui egae tsinconundeccui'ccu fae'ngae ño'andeccoma'qqe fi'ttiya? 24 ¿Nane

cincuenta ño'andeccu tseni can'jen'ni'qqe ti qui poi'cco tsa canqquesundecuma fi'ttiya? Tsambi'ta, ¿ño'andecuma ccushaeñe ti qui antteya? ²⁵ Ñoa'me qui oshambi tsa'caen ño'andecuma egae tsinconsundecui'ccu fae'ngae fi'ttiye. Nane tsendecuja fae'ngae egae tsincon'fambi. Me'in, tsa'caen qui tsoña'bi. Nane queja poi aindeccu injama'choma somboen'su, ¿poi'ccoma ñotsse in'jan'da ti qui ñotsse tsoña?

²⁶ Pañamba Na'suja su:

—Cincuenta ño'andecuma tseni atte'ta gi poi'cco tsa canqque'su aindeccuma ccushaeña.

²⁷ Toya'caen tsu Abrahamjan su:

—Queja Chiga. Ñajan aqquia a'i gi. Tsa'ma ña injanga qqen afasi ñama iyicca'vejama. ²⁸ ¿Cinco ño'andeccu cincuentave nepiya'cho shaca'ni'qqe ti qui poi'cco tsa canqque'suma fi'ttiya?

Tsonsi Na'suja su:

—Cuarenta y cinco ño'andecuma atte'ta gi poi'ccoma ccushaeña.

²⁹ Toya'caen Abrahamjan su:

—Da, ¿cuarenta ño'andecuma tseni atte'ta—?

Tsonsi Na'suja su:

—Cuarenta can'jen'ninda gi antteya.

³⁰ Ccase Abrahamjan su:

—Ñama iyicca'vejama. Tsa'ma, ¿aqquia treintaveyi atte'ta—?

Na'suja su:

—Treintave atte'ta gi antteya.

³¹ Ti'tsse tsu Abrahamjan su:

—Ñoa'me opa gi ya'caen ña Na'suma afaye. Tsa'ma, ¿veinteveyi atte'ta ti qui antteya?

Na'suja su:

—Ju, veinteveyi atte'ta gi tsa canqqe'su a'ima fi'ttiya'bi.

³² Toya'caen Abrahamjan su:

—Chigáne, ña Na'su, ñama iyicca'yejama. Tsa'ma ti'tsse fae seyi gi afaya. ¿Mingae qui tsoña aqquia diez ño'andecuma atte'ta?

Tsonsi Na'suja su:

—Nane ñoa'me ño'andecuma diezve atte'ta gi tsa canqqesundecuma fi'ttiya'bi.

³³ Na'suja tsa'caen Abrahami'ccu afa nanimba ja. Abraham'qqe toequi tise carpa tsaoni shanda.

19

Chiga Sodoma, Gomorra'su aindeccuma fi'tti'cho

¹ Tayo cosesi tsa dos Chigama sefacconi'su shondosundecuja pasiasundeqquia'caen Sodoma canqquenga nepi'fa. Lot, Abraham antianmbe du'shu, tseni can'jemba canqqe ttuccu sombo'tti'su atandunduni dyai. Dyaipa pasiasundecuma attepa jangipa tise'pama cachui'su ja. Cachuipa tise cambia'juma andenga puntssamba chigambiamba ² qqen su:

—Nasundeccu, chigáne ña tsaoni ji'faja. Tseni que'i tsu'ttema cashipa, ana qqquendyapa qui tu'i sinte'yi ccase tsaiqui'ye ja'faya.

Tsa'ma tise'paja su'fa:

—Me'in. Vani atandundunga gi ana'faya.

³ Tsa'caen susi Lot toya ti'tsse iñajansi tsu japa Lot tsa'onga ca'ni'fa. Tseni ca'ni'fasi Lotja anqqe'suve sho'ccoemba cupana'cco me'choa

panme matssamba tise'pama o'fian. O'fiansi an'fa.

⁴ Tsomba toya anañe ccuimbi'te tsu poi'cco tsa Sodoma'su tsandiendeccu, nane chu'a, coenza'qqe Lot tsa'oma shoquendipa ⁵ qqen fundondo'e Lotma afaye ashaen'fa:

—¿Mani tsu tsa dos tsandie, que tsa'onga ja'ño cose ca'ni'chondeccuja? Tise'pama somboenjan ingi tise'pai'ccu ccui'faye.

⁶ Tsonsi Lotja afaye sombopa sombo'ttima ñotsse picco cca'i ca'nisa'ne. ⁷ Tsa'caen sombopa su:

—Chigáne ña amigondeccu, tsa'caen egae tson'fajama. ⁸ Nane an'bian gi dos onque'ngeve, toya tsandiema atesumbindeqquiama. Tsendeccuma gi somboemba que'inga afeya cuintsu que'i in'janqquia'caen tise'pai'ccu tsoñe. Tsa'ma va tsandiendeccuma pporaen'fajama. Nane ñajan tise'pama coira'su gi.

⁹ Tsa'ma aindeccuja su'fa:

—¡Joqquitssija! Queja vani'sumbi qui. ¿Ma'caen qui ingima manda'je? Ja'ño gi tise'pama tsoñe in'janqquia'caen quema ti'tsse tsa'caen tson'faya.

Tse'faei'ccuyi Lotma dañe ashaemba tsa'o sombo'ttinga catse'fa u'ccapa ca'niñe. ¹⁰ Tsa'ma pasiasundeccuja sombo'tti'ye yasapa Lotma indipa tsa'onga ca'niamba ccushaen. Tisema ca'niamba sombo'ttima piccopa ¹¹ aindeccuma binime tson'fa. Tsa'caen poi'cco, chu'a, coenzandeccu'qqe binime dapa sombo'ttima atteye oshambipa quimbipa antte'fa. ¹² Tsonsi pasiasundeccu Lotma ñajampaña:

—¿Faesu que antiandeccuta ti vani can'jen'fa? Nane que dutssiyendeccu, que onquengendeccu, dushundeccu, toya'caen poiya'cco que'imbema angapa vane joqquitssipa biani jaja'faja. ¹³ Ñoa'me gi va canqquema sefaen catiya. Nane va canqque'su aindeccu tsain'bitsse egae tsincon'fasi tsu Na'su Chigaja shacama isuqquia'caen tise'pama sefaen catiya'chove ingima manda.

¹⁴ Tsa'caen susi Lotja tise dusundeccunga japa conda. Nane tayo tsu antteye su cuintsu tsendeccu tise onquengendeccuma pusheye. Tise'pama su:

—Jangipa va'ttie joqquitssipa ja'faja. Ñoa'me tsu Na'su Chiga va canqquema sefaen catiye tson'jen.

Tsa'ma tise dusundeccu pañambipa feña'fa. ¹⁵ Tayo a'taye tson'jensi sefacconi'su shondosundeccuja Lotma quian'me su'fa:

—Uta'tsseyi jangipa que pushe, que onquengendeccuma'qque angapa ja'faja va canqque'su aindeccui'ccu fae'ngae pasa'ne.

¹⁶ Tsa'ma Lot jaye in'jambiqquia'caen vasia've ñoña'jensi sefacconi'su shondosundeccu tise tivema indipa qquitssapa somboen'fa. Nane Na'su Chiga tisema in'jamba mende'ye. Toya'caen Lot pushe, tise onquengendeccuma'qque qquitssapa somboen'fa tise'pama ccushaeñe. ¹⁷ Tsomba canqque'ye somboemba sefacconi'su shondosundeccu tise'pama su'fa:

—Buttopa jaja'faja tisuma ccushaeñe. Sepacconima can'fajama. Ni va sinjunccuni can'jen'fajama. Nane ccotta'ccongga jaja'faja tisuma ccushaeñe in'jan'da.

¹⁸ Tsa'ma Lotja su:

—Me'in, nasundeccu. ¹⁹ Que'i ñama ñotsse tsomba mende'yepa ccushaen'fa. Tsa'ma oshambi gi ccotta'ccongga buttoye. Nane ña toya nepimbi'te Chiga Sodomama sefaen cati'ninda gi paya. ²⁰ Que can'faja. Joni tsu ñoa'me chipiri canqque. Biambi'cco tsu. Tseni gi buttoya nepiye osha tisuma ccushaëñe.

²¹ Tsonsi fae'cco shondo'su tsu su:

—Quema pañamba gi tsa'caen antte. Tsa, que su'cho canquema sefaen catiya'bi gi. ²² Uta'tseyi tseni japa ca'nijan. Nane que toya tseni nepimbi'ta Na'su Chiga mandaqquia'caen tsoñe osha'fambi gi.

Tsa canqqueja chipirisi tsu inisian'fa Zoarve.

²³ Coejechiga tayo sombosi tsu Lotja Zoarni nepi. ²⁴ Tseni nepisi tsu Na'su Chigaja unjima tuiñaqquia'caen si'ngema asufrei'ccu amppian moe Sodoma toya'caen Gomorra canquenga. ²⁵ Tsa'caen ju'rusi tsu tsa canquema sefaen catipa tseni can'jensundeccuma'qqe fitti'tti. Nane poiye'cco majan tsa Jordán na'en sinjuncuni can'jen'da tsu pa'fa. Osha'cho sho'yoqqe'su'qqe tsu pa'fa. ²⁶ Tsa'ma Lot pushe Lotma omboe jiñamba sepacconima piyicamba ansimeñi da ccutsu.

²⁷ Ccaqui a'ta sinte'yi Abraham ccase tise Na'su Chigai'ccu ccutsupa condase'je'ni japa ²⁸ can Jordán na'en'su sinjuncunima, toya'caen Sodoma, Gomorranima. Camba onfen'bama atte. Nane pa'cco sinjuncu tsu si'nge ju'ruqquia'caen oro'je. ²⁹ Tsa'caen tsu Chigaja tsa Jordán na'en sinjuncu'su canquema sefaen cati. Abraham

antianmbe du'shu Lot tseni can'jen'choma Na'su Chigaja Abrahamma in'jamba Lotma ccushaen.

Moabitandeccu, amonitandeccu

³⁰ Omboe Lotja dyojo ti'tsse Zoarni can'jeñe. Tsa'caen dyojopa ccotta'cconi japa tise dos onquengendeccu'ccu tseni fattocco changoni can'jen'fa. ³¹ Can'jemba fae a'ta sheshe'yeja tise que'ttenga su:

—Ingi yayaja ñoa'me coenza ccashe'yeye da. Toya'caen vani me'i'on tsu majan ingima pushesi du'shuma isuye. ³² Tsa'camba jinge tse'tse'pama cui'ñamba yayama ccusiañe cuintsu ingija tisei'ccu ccuipa du'shuve isuye ingi aindeccu sefasa'ne.

³³ Tsequi cose tise yayanga tse'tse'pama cui'ñamba ccusiamba sheshe'yeja tise yayai'ccu ccui. Tise yayaja ñoa'me ccusipa atesumbi tise ccui'cho ni tise jangi'choma. ³⁴ Ccaqui a'ta sheshe'yeja tise que'ttenga su:

—Que canjan. Cose ña yayai'ccu ccuiqquia'caen qui ja'ño cose ccase tisema tse'tse'pai'ccu ccusiañ'a'cho que'qqe tisei'ccu ccuipa du'shuve isuye ingi aindeccu sefasa'ne.

³⁵ Tsequi cose'qqe ccase tise yayanga tse'tse'pama cui'ñamba ccusian'fa. Ccusiamba que'tte tsu tise yayai'ccu ccui. Tsa'ma tise yayaja ñoa'me ccusipa atesumbi tise ccui'cho ni tise jangi'choma. ³⁶ Tsa'caen tsomba Lot dos onquengendeccu surie da'fa tise'pa yayambeyi. ³⁷ Sheshe'yeja tsandie du'shuve isusi tisema inisian'fa Moabve. Tsambe omba'su dutssiyendeccu tsu ja'ño can'jen'cho moabitandeccu. ³⁸ Toya'caen que'tte'ye'qqe

tsandie du'shuve isusi tisema inisian'fa Benamime. Tsambe omba'su dutssiyendeccu tsu ja'ño can'jen'cho amonitandeccu.

20

Abraham, Abimelec iyicco'fa'cho

¹ Tsonsi Abraham tise can'jen'cho'ye sombopa Néguév andeni ja. Tseni japa Gerar canqqueni ca'nimba can'jen. Gerar tsu Cades canqque, Shur canqque enttingeni. ² Tseni can'jemba Abrahamjan tise pushe Sarama tise que'tte qqen poi'ccongá conda. Tsa'caen condasi tsa canqque'su na'su Abimelecja manda cuintsu Sarama isi tise pusheve daye. ³ Tsa'ma tsa'caen tsomba cosesi Abimelecja anamba ayo'o. Ayo'osi Chiga tisenga attiamba su: “Queja paye qui tson'jen. Nane que i'cho pushesuja faesumbe pushe tsu.”

⁴ Tsa'ma Abimelec toya Sarai'ccu ccuimbipa Chiganga su: “Ña Na'su, ¿queta ti qui egae tsincombi'choama fi'ttiya? ⁵ Abraham tsu su tsa pushesuja tise que'tte. Pushesu'qqe Abrahamjan tise quindya qqen tsu su. Tsa'caen su'fasi gi afopombi qqen in'jamba atesumbipa pushesuma i. Tsa'ma egae tsincombi qqen gi asi'ttaen.”

⁶ Tsonsi Chiga ayo'oni tisema su: “In'jan gi queja atesumbipa tsa'caen tson. Tsa'cansi gi que in'jama'choma in'jaemba se'pi que tise'ccu ccuipa ñama egae tsinconsa'ne. ⁷ Tsa'ma ja'ño tsa pushesuma tise tsa'ndunga afeja. Nane tise tsa'nduja ñane afa'su tsu. Tise que'ine ñama iñajan'ninda qui ccusha'faya. Tsa'ma tise pushema afembi'ta qui ñoa'me que, que aindeccu'qqe pa'faya.”

⁸ Tsa'caen ayo'opa sinte'yi jangipa Abimelecja poi'cco tisema shondosundecuma ttu'sepa pa'tssi tise ayo'o'choma conda. Tsama pañamba poi'cco dyo'fa. ⁹ Omboe Abimelecja Abrahamma ttu'sepa su:

—¿Mingae qui inginga tson? ¿Jongoesui'ccu gi quema egae tsonsi qui tsa'caen ñama tson cuintsu va egae tsincon'cho ñanga, ña aindecunga'qqe shacave daye? Nane ñoa'me tsa'caen faesunga tsoñe ega tsu. ¹⁰ ¿Jongoesu qqen asi'ttaemba qui ingima tsa'caen tson?

Tsa'caen tsu Abimelecja Abrahamma su.
¹¹ Tsonsi Abrahamjan su:

—Ñajan 'Vani'su a'i Chigave in'jambipa ñama fi'ttipa ña pushema itsa'faya' qqen in'jamba gi tsa'caen tson. ¹² Tsa'ma afopoembi gi. Ñoa'me tsu tiseja ña que'tte. Nane ña yaya onque'nge tsu. Tsa'ma ña mamambembi. Tsa'cansi gi tisema pusheye osha. ¹³ Toya'caen Chiga mandasi ña yaya tsaone sombopa cca'tti cca'tti jacamba gi tisema su cuintsu mani jacan'an'qqe ñajan tise quindya qqen suye.

¹⁴ Tsonsi Abimelecja Abrahamnga tise pushe Sarama afe. Toya'caen tsu oveja, vaura, sema'su tsandiendeccu, sema'su pushesundecuma'qqe Abrahamnga aqquia afe. ¹⁵ Afepa su:

—Que canjan pa'cco ña andema. Ma'ttima ñotssiave atte'ta tseni can'jenjan.

¹⁶ Toya'caen Saranga su:

—Ña que tsa'ndunga afe'cho tsu mil totoacori corifin'dive bare. Tsa'caen afepa gi poi'cco

quei'ccu jacansundecunga canjaen queja ñotssia.
Nane quema afaseye osha'fambi tsu.

17-18 Tsonsi Abrahamjan Abimelecne Chigama iñajan. Iñajansi Chigaja Abimelec, tise pushema'qqe ccushaen. Poiyi'cco tise'pambe sema'su pushesundecuma'qqe ccushaen cuintsu ccase surie da'je'faye. Nane Abimelec Sarama tsa'caen itsasi tsu Na'su Chigaja poiyi'cco tseni'su pushesundecuma pporaen cuintsu survive dambe'yi canse'faye. Tsa'ma ccushaensi ccase surie da'je'fa.

21

Isaacma isu'cho

¹ Na'su Chiga Abrahamnga suqquia'caen Sarama pporaen cuintsu tise suqquia'caen daye.
² Tsa'caen tsonsi surie dapa tsandie du'shuve isu. Nane Abraham tayo coenzasi tsu Saraja tise'be du'shuve isu. Chiga su'cho a'ta tsu tsama isu. ³ Sara isusi Abraham tise dutssi'yema atepa Isaacve inisian. ⁴ Toya'caen du'shu ocho a'tave an'bian'ni tsu Abrahamjan Chiga mandaqquia'caen tise du'shumbe shondusu'cho ttonoma chhiyitevaen. ⁵ Abraham cien canqque'fave an'bian'ni tsa'caen Isaacma isu.
⁶ Tsonsi Saraja asi'ttaen: “Chiga ñama in'jaensi gi avujapa feña. Nane poiyi'cco majan ña du'shuma isu'chone paña'da tsu ñai'ccu fae'ngae feña'faya.
⁷ Majan ya'caen tson'chove paña'choecan'da tsu Abrahamnga ‘Saraja isuye oshambi’ qquen suye'can. Tsa'ma tiseja coenza ccashe'yeye dasi gi tsandie du'shuma tisenga afe.”

Agarma, Ismaelma'qqe joqquitssian'cho

⁸ Du'shu Isaacja coemba chochoma antte. Chochoma antte'cho a'ta Abrahamjan poiya'cco a'ima ttu'sepa boñasi fiestaen'fa. ⁹ Tsa'ma Abraham faesu dutssi'ye, tsa egipto'su pushesu Agar du'shu, Isaacma fe'ñasi Saraja attepa injama'choni iyicca'ye. ¹⁰ Iyicca'yepa Abrahamnga su: “Va sema'su pushesu, tise du'shuma'qqe joqquitssianjan. Nane va sema'su pushesumbe du'shuja fae'ngae ña du'shu Isaacui'ccu dutssi'ye osha'choma isuqquia'caen isuya'bi.”

¹¹ Tsama pañamba Abrahamjan ñoa'me ñombi'ye. Nane Ismael'qqe tise dutssi'ye tsu. ¹² Tsa'ma Chigaja tisema su: “Ñombi'yejama que du'shune ni que sema'su pushesune. Tsa'ma Sara injamba iñajanqquia'caen tsonjan. Ñoa'me Isaacne que omba'su dutssiyendecuve atapasi gi agattoya. ¹³ Toya'caen sema'su pushesumbe du'shu'qqe quembesi gi tise omba'su dutssiyendecuve tsain'bitsse atapoensi tise'pa'qqe joccapitssia a'ive da'faya.”

¹⁴ Chiga tsa'caen susi ccaqui a'ta sinte'yi Abrahamjan panma Agarga afepa ttono botiyanga'qqe tsa'ccuma on'boemba tise opipa'chonga ottaen. Tsomba du'shui'ccu tisema joqquitssian moe tise tsa'o'ye. Tsa'caen joqquitssiangepa Agarja Beerseba'su a'i menia jacan. Mani jaya'chove atesumbipa injanga jacan. ¹⁵ Ttono botiyani an'bian'cho tsa'ccuma sefaemba tsaqque'supa Agarja du'shuma cati quini'ccosi tsosicunga. ¹⁶ Catipa biaccaccatsse japa dyai,

du'shu paye tson'jen'choma caña'jeñe in'jambipa. Du'shu i'nañe ashaensi ¹⁷ Chigaja pañamba tisema sefacconi'su shondo'suma moe. Sefaccone tsu Chigama shondo'suja Agarma ttu'sepa su: “¿Micomba qui tsa'caen dyai, Agar? Dyombe canjan. Tayo tsu Chigaja paña du'shu tseni ccuipa ina'jen'choma. ¹⁸ Jangipa du'shunga japa tise tivema indipa tisema jangianjan. Ñoa'me gi tisema ccushaemba fuiteya cuintsu tise dutssiyendeccu joccapitssia aindecuve da'faye.”

¹⁹ Tsa'caen supa Chigaja Agarma canjaen tsa'ccu posoma. Tseni japa ttono botiyanga tsa'ccuma on'boen. Toya'caen Ismaelma cui'ña. ²⁰ Tise suqquia'caen Chigaja du'shu Ismaelma fuite. Fuitesi quin'anme dapa a'i menia can'jen. Battittianccui'ccu battiañe ñotsse atesupa canse. ²¹ Nane Parán a'i menia can'jemba tise mama anttesi egipto'su pushesuma pushe.

Abraham, Abimelec injancco'fa'cho

²² Tsa'caen tsonsi Abimelec, tise sundaro na'su, Ficoli'ccu Abrahamni can'su jipa tisema chigambiamba su:

—Chiga quema fuite'je'choma gi poiyi'cco in'jan'fa. ²³ Tsa'cansi ingi vani can'jensi Chiga pa'ccoma paña'jen'ninda, ingi'ccu fae'ngae injancco'faja. Chigáne, ñama egae tsonjama, ni ña dushundeccoma, ni ña omba'su dutssiyendeccoma'qqe egae tsonjama. Nane ña quema ñotsse tsonqquia'caen ccane'qqe ñama, ña ande'su a'ima'qqe ñotsse tsonjan.

²⁴ Tsonsi Abrahamjan su:

—Chiga caña'jen qqen in'jamba gi tsa'caen tsoña. ²⁵ Tsa'ma tsa'caen condasepa Abraham tise tsa'ccu posone Abimelecnga conda. Nane Abrahambema tsu Abimelecmbembe semasundecuja itsa'fa. ²⁶ Pañamba Abimelecja su:

—Ja'ño gi tsane me'ttia'ye paña. Nane que ñanga condambisi gi atesumbe can'jen. Atesumbi gi majan tsu tsa'caen tson.

²⁷ Tsonsi Abraham ovejandecuma vaurandecuma'qqe i'ngapa Abimelecnga afe. Afepa tsequi a'ta tsu fae'ngae injancco'fa. ²⁸ Tsa'ma Abraham siete oveja pushema tsa afe'cho'sumbe cca'ttinga attufaemba ccutsian. ²⁹ Ovejama atepa Abimelecja iñajampaña:

—¿Jongoesie qui tsa siete ovejama attufaemba ccutsian?

³⁰ Iñajampañasi Abrahamjan su:

—Ña afesi va siete oveja pushema isu'ta qui va posoja ña changoemba an'bian'cho qqen canjaeña.

³¹ Tseni tsa'caen tsomba tsa posomajan inisian'fa Beersebave. Nane tseni fae'ngae injancopa “injancco'fa'cho poso” qqen tsu su.

³² Tsa'caen Beersebani Abrahami'ccu fae'ngae injanccopa Abimelec, tise sundaro na'su, Ficol'qqe toequi ja'fa filisteo andeni. ³³ Ja'fasi Abrahamjan tseni tamarisco quini'jima jon. Quini'jima jomba Tsangae Canse'cho Na'su Chiga Quitsama iñajan. ³⁴ Bo'tssingae tsu Abrahamjan filisteo andeni can'jen.

22

Abrahamma mandacan'cho

¹ Omboe Chigaja Abraham tise've in'jan'chove atesuye in'jamba mandacan. Tsa'caen in'jamba tise inisei'ccu tisema ttu'sesi Abrahamjan su:

—Vani gi can'jen.

² Tsonsi Chigaja su:

—Que dutssi'ye fae'ccoa Isaacma qui ñotsse in'jan. Tisema angapa Moriah andeni jaja. Tseni japa ña quema canjaen'cho ccotta'cconga ansun-depa que du'shuma fi'ttipa oqueja ñanga afeye.

³ Ccaqui a'ta sinte'yi Abrahamjan jangipa tise boronga ñoñamba Chiga tisema conda'cho andeni ja. Tisei'ccu tsu dos tise'be semasundeccu, toya'caen tise dutssi'ye Isaac'qqe ja'fa. Si'tsima'qqe anga'fa Chiganga afe'choma oqueye. ⁴ Tres a'ta japa Abrahamjan bianima cambia tsesu ccotta'ccoma atte. ⁵ Attepa tise'be semasundeccoma su:

—Vani boroi'ccu can'jen'faja. Ña, ña du'shui'ccu gi ti'tsse joccani japa Chigama iñajamba toequi ji'faya.

⁶ Tsa'caen supa Abrahamjan Chiganga afe'choma oque'je'cho si'tsima isupa Isaacnga afe cuintsu anduye. Tsomba si'ngema, chhichhi'ccoma'qqe isupa fae'ngae Isaacui'ccu ja. ⁷ Japa Isaacja tise yayama iñajampaña:

—¡Yaya!

Abrahamjan su:

—¿Jongoesie qui in'jan ña dutssi'ye?

Isaacja su:

—Que canjan, si'tsi, si'ngema'qqe gi an'bian'fa. Tsa'ma, ¿mani tsu oveja du'shu ingi oquepa Chiganga afeye?

⁸ Iñajampañasi Abrahamjan su:

—Jaricho, Chiga Quitsa tsu ovejama afeya cuintsu ingi tsama oquepa tisenga afeya.

Tsa'caen supa fae'ngae ja'fa. ⁹ Tsomba Chiga su'cho oque'jeni nepipa Abrahamjan oque'je'chove ñoñamba si'tsima'qqe tsanga ñoña ccuiña. Tsa'caen ñoñamba tise dutssi'ye Isaacma tandamba oque'je'chonga ccuiña si'tsi ombanga. ¹⁰ Ccuiñamba chhichhi'ccoma isu tise dutssi'yema fi'ttiye. ¹¹ Tsa'ma tse'faei'ccuyi Na'su Chigama sefacconi'su shondo'su sefaccone ttu'sepa su:

—¡Abraham! ¡Abraham!

—Vani gi can'jen, —qquen tsu Abrahamjan su.

¹² Tsonsi sefacconi'su shondo'suja se'pipa su:

—Du'shuma pporaenjama. Ja'ño gi atesu que Chigave ñotsse in'jan'choma. Nane Chigama pañamba qui que du'shu fae'ccoama se'pimbi ñanga afe'je.

¹³ Tsa'caen susi Abraham piyicamba atte oveja quitsa'yema. Nane tsaja tise can'cho quini'ccosinga indiyepa ccutsu. Attepa japa ovejama indipa fi'tti. Fi'ttipa oque o'raemba Chiganga afe. Nane tise du'shuma ccushaen'su ovejama tsa'caen fi'ttipa afe. ¹⁴ Omboe Abrahamjan tsa oque'je'nima inisian “Jongoesuve shaca'ninda Chigaja afeya.” Nane toya tsu a'ija su'fa: “Jongoesuve shaca'ninda tise ccotta'ccone tsu Na'su Chigaja afeya.”

¹⁵ Tsonsi ccase tsu Na'su Chigama sefacconi'su shondo'suja sefaccone Abrahamma ¹⁶ ttu'se:

—Na'su Chigaja su: 'Queja tsa'caen tsomba que du'shu fae'ccoama'qqe se'pimbe'yi ñanga afesi gi quemá ñotsse tsoña. Nane tisu injama'choi'ccu in'jamba gi tsa'caen tsoña. ¹⁷ Que omba'su dutssiyendecuma gi tsain'bitsse ñotsse tsoña. Nane tise'pama gi atapoeña cuintsu sefacconi'su o'fema agattoye oshambiqquia'caen, marni'su sisifafo'choma agattoye oshambiqquia'caen, tise'pama'qqe agattoye osha'fambiye. Toya'caen tise'pama egae tsonsundecuma'qqe tsu patsu'faya. ¹⁸ Que omba'su dutssiyendeccu ñama ñotsse paña'ninda gi tise'pai'ccu poi ande'su aindecuma ñotsse tsoña.'

¹⁹ Tsama pañamba Abrahamjan Isaacui'ccu toequi tise'be semasundecuma catini shanda. Shandapa poi'cco fae'ngae Beersebani toequi japa Abrahamjan ti'tsse tseni can'jen.

Nacor dutssiyendeccu

²⁰ Tsa'caen tsomba omboe Abrahamjan paña tise quinshin Nacorne. Nacor pushe Milca'qqe dushundecuve an'bian'choma paña. ²¹ Nane coenza tsu Uz. Tsambe quinshin tsu Buz toya'caen Kemuel. Kemuel tsu Aram quitsa. ²² Ti'tsse omboe Milca faesu dushundeccu, Quesed, Hazo, Pildas, Jidlaf, toya'caen Betuelve isu. ²³ Tsa Betuel tsu Rebeca yaya. Nane Milca tsu Abraham quinshin Nacormbe ocho dutssiyendecuve isu.

²⁴ Toya'caen Nacor faesu pushesu Reúmai'ccu can'jemba faesu dushundecuve an'bian: Teba, Gaham, Tahas, toya'caen Maaca.

23

Sara pasi a'tu'cho

¹ Saraja ciento veinte y siete canqqque'fave an'biamba ² Quiriat-arbani pa. Tsa Quiriat-arba tsu Canaán andeni'su Hebrón canqqque. Sara pasi Abrahamjan ñombi'yepa i'na. ³ Tsa'caen i'namba omboe Abrahamjan pa'chombe ai'vo ccuine sombopa japa tsa ande'su hitita aindecui'ccu condase:

⁴ —Ñajan faesu ande'su que'i'ccu can'jemba gi asi'ttaen: Chigáne a'ima atuqqque'su fattocco changoma ñanga chavaen'faja ña pushema tsanga a'tuye.

⁵ Tsa'caen susi tsesu hitita aindecuja su'fa:

⁶ —Na'su, chigáne ingima pañajan. Queja ingi'ccu can'jemba qui ñoa'me Chiga in'jan'cho. Tsa'cansi mani in'jan'da que pushema a'tuja ingi atu'ttinga. Nane ingi bove ñotssia atu'ttinga a'tuja. Ma-jañi'qqe tsu quema se'pi'faya'bi que tsa'caen tsonsi.

⁷ Tsonsi Abraham jangi ccutsupa hititandecuma chigambiamba su:

⁸ —Que'i ñoa'me vani ña pushema a'tuye in'jan'da chigáne ñambe afa'faja Efrón, tsa Zohar dutssi'yema. ⁹ Tisema afapa iñajan'faja cuintsu tiseja tsa Macpela fattocco changoma ñanga chavaeñe. Nane tise ande'su utufani tsu tsa fattocco changoja jin. Mi'nge'tsse iñajan'ninda gi tsa'caen afepoeña. Nane tsa'caen pa'ccoma afepoemba gi tsa fattocco changombe na'suve daya.

¹⁰ Tse'i, hitita a'i, Efrón, tse'tti cca'indecui'ccu fae'ngae can'jemba pañamba Abrahamma

quian'me afa. Nane cuintsu poiyyi'cco tise antiandeccu, canqqe sombo'je'tti'ye panshansundeccu'qqe tisema paña'faye tsu quian'me afapa su:

¹¹ —Isha, ña na'su. Aqquia gi quenga afeya va ande, toya'caen tsa ande'su fattocco changoma'qqe. Poiyyi'cco ña antiandeccu tsu ña su'choma pañamba in'jan'fa tansintsse su'chove. Toya'caen canqqe sombo'tti'ye panshansundeccu'qqe tsu pañamba tansintsse su'chove in'jan'fa. Tsa'cansi injanga tseni a'tuja que pushema.

¹² Tsa'ma Abrahamjan pañamba ccase tsa canqqe'su aindecuma chigambiamba ¹³ poiyyi'cco paña'jen'ni Efrónma su:

—Chigáne ñama paña'faja. Quian'me gi quema ñajan cuintsu ande bare'cho corifin'dima isuye. Nane corifin'dima isusi gi omboe ña pushema tseni a'tuya.

¹⁴ Tsonsi Efrón pañamba su:

¹⁵ —Ña na'su, ñama pañajan. Va andeja aqquia cuatro ciento corifin'diveyi tsu bare. ¿Jongoesune gi tsa re'riccoa'ne panshaen afacco'faya? Tsa'cansi injanga tseni que pushema a'tuja.

¹⁶ Tsa'caen susi poiyyi'cco a'i caña'jen'ni Abrahamjan Efrón suqquia'cantsse corifin'dima afepoen. Nane chavaensundeccu agattoye in'janqquia'caen tsu corifin'dima agattopa afe. ¹⁷ Tsa'caen chavasi tsu Efrón ande-tsa Mamre canqqe jin'tti'su ande-nane Macpela fattocco chango, toya'caen ande, pa'cco tseni jincho quini'cco'qqe— ¹⁸ Abraham andeve da. Abraham

na'suve dasi tsu poi hititandeccu, canqqe sombo'je'tti'ye panshansundeccu'qqe pañamba tsa'caen in'jan'fa.

¹⁹ Tsa'caen chavapa Abrahamjan Sarama a'tu tsa Macpela fattocco changonga. Nane tsa fattocco chango tsu Mamre canqqeni chiga sombo'jefani. Tsa Mamre Canaán ande'su Hebrón canqqe. ²⁰ Tsa'caen tsu Abrahamjan tsa ande, toya'caen tsa fattocco changoma an'bian, hititandeccuma chavapa. Tse'ttinga tsu tise'pa'su pa'chondeccuma atu'je.

24

Pusheve tta'tta Isaacne

¹ Na'su Chiga osha'choi'ccu tisema ñotsse tsonsi tsu Abrahamjan coenza ccashe'yeve dapa canse.

² Tsa'caen dapa tsu tisema shondo'su ti'tsse coenzama ttu'se. Tsaja pa'cco tise tsa'o'suma, pa'cco tise an'bian'choma'qqe coira'su tsu. Tisema ttu'sepa su:

—Que tivei'ccu ña ttena'go tsosiccupama pporaemba ³ tansintsse su'chove afaja que ña mandaquia'caen tsoña'chove. Nane Na'su tsa sefacco, andema'qqe agattoen'su Chiga paña'jen'ni tansintsse suja. Nane antteya'bi qui cuintsu ña dutssi'ye Isaac va ña can'jeni'su Canaán ande'su pushesuma pusheye. ⁴ Tsa'ma ñama isu'cho andeni japa ña antian'su pushesundeccu'su pushesuve tta'ttaja cuintsu tsama Isaac pusheye.

⁵ Tsa'caen mandasi shondo'suja su:

—Pushesuma attesi jiye in'jambian'da ¿ma'caen gi tsoña? ¿Que dutssi'ye Isaacma ti gi angaya tsa que sombo'cho andeni?

⁶ Tsonsi Abrahamjan su:

—Isha, ¡ña dutssi'yema tseni angajama! ⁷ Na'su Chiga tsu quema o'tie tisema sefacconi'su shondo'suma moeña. Nane Sefacconi'su Na'su Chigaja ñama somboen ña yaya tsa'o'ye, ña antian ande'ye'qqe. Ñama somboemba tsu ñoa'me su va andema afeye ña dushundeccunga. Tsa Chiga tsu tisema sefacconi'su shondo'suma quema o'tie moeña cuintsu in'jaensi tseni'su pushesuma iye ña dutssi'ye pusheve. ⁸ Pushesuma attesi jiye chi'ga'ni'qqe qui ccushaya va mandasi tsoña'chone. Tsa'ma ña dutssi'yema tseni angajama.

⁹ Tsa'caen susi shondo'suja tise tivei'ccu tise na'su Abraham ttena'go tsosiccupama pporaen tise suqquia'caen ñoa'me tsoña qqen canjaeñe. Tsa'caen tsomba aya'fai'ccu pa'ccoma tsoña qqen tansintsse afa. ¹⁰ Tsomba tse'i shondo'suja tise na'su an'bian'cho'su osha'cho ñotssia afeya'choma isupa chonga tise na'sumbe cameyoi'ccu sombopa ja Nacor can'jen'cho canqquenga. Tsa canqque tsu Mesopotamia ande'su canqque.

¹¹ Bo'tssingae jacamba Nacor canqque utufanga nepisi tayo sime da. Nane tayo sime dasi tsu pushesundeccuja tsa'ccuve ichhoi'su ji'fa. Tseni nepipa shondo'suja manda ccuiña tise jaca'n'cho cameyondeccuma tsa'ccu poso jin'ttinga. ¹² Manda ccuiñamba Chigama iñajan: “Na'su Chiga, ña na'su Abraham Chiga, ja'ño ñama fuitapa na'su Abrahamma ñotsse tsonjan. ¹³ Que canjan. Ñajan va poso jin'tti ccutsusi va canqque'su chu'a pushesundeccu tsu vani ji'faya tsa'ccuma

ichhoiye. ¹⁴ Antteja majan pushesu vani jisi, 'Chigáne que tsoripama andiamba ñama cui'ñajan,' qquen ña susi, 'Cu'ija,' qquen supa, 'Toya'caen gi que cameyondeccuma'qqe cui'ñaña,' qquen su'ta, tsaya tsu que in'jan'cho pushesu quema shondo'su Isaac pusheve daya'cho. Que tsa'caen tsonsi gi in'jaña queja ñotsse tson ña na'su Abrahamnga.”

¹⁵ Toya tise Chigama iñajan'jen'ni tsu Rebecaja ji. Tise tsoripama opipa'chonga opipa ji. Nane Rebeca tsu Betuel onque'nge. Betuel tsu Abraham quinshin Nacor dutssi'ye. Tise mama tsu Nacor pushe Milca. ¹⁶ Pushesuja ñoa'me me'detsi tsu, toya tsandiema atesumbi'choa. Nane toya tsu majan tsandieyi'qqe tise ma pporaen'fambi. Jipa posonga andepa tise tsoripama ichhoi on'boemba sombo. ¹⁷ Sombosi coenza shondo'suja butto catsepa su:

—Chigáne ñanga cui'ñajan que tsoripa'su tsa'ccuma.

¹⁸ Pushesuja su:

—Cu'ija ña na'su.

Tsa'caen supa tse'faei'ccuyi tise tsoripama andiamba tivei'ccu indipa tsa'ccuma fiña cuintsu shondo'su cu'i'ye. ¹⁹ Shondo'su cu'i nanisi tsu Rebecaja tise ma su:

—Toya'caen gi tsa'ccuma ichhoiya que cameyondeccuma cui'ñasi cuintsu tise'pa'qqe tteppu'faye.

²⁰ Tsa'caen supa tise tsoripa'su tsa'ccuma fiña cameyo cui'je'cho shavonga. Fiña ccutsiamba buttopa ccase posonga ande ti'tsse tsa'ccuma ichhoiye. Tsa'caen fechochoemba nanitsse cameyondeccuma cui'ña. ²¹ Rebeca tsa'caen

tsonsi coenza shondo'suja can'boen ccutsupa afambe'yi asi'ttaen Na'su Chiga ñoa'me tisema pañamba tsa'caen antte qqwen in'jamba.

²² Cameyondeccu cu'i nanisi shondo'suja tsofatu'su cori sotija seis gramosve tssaiña'choma tisenga afe. Toya'caen dos rande cori tivenga ancaenqqe'su cien gramosma ti'tsse tssaiña'choma'qqe afe. ²³ Afepa su:

—Chigáne ñanga condaja, ¿majambe onque'nge qui queja? Toya'caen ñanga condaja, ¿cuartota ti jin que yaya tsaoni cuintu ña, ñama shondosundeccu'qqe tseni anañe?

²⁴ Tsa'caen iñajampañasi tsu su:

—Ña gi Betuel onque'nge. Ña yaya tsu Nacor dutssi'ye, tise mamajan Milca. ²⁵ Toya'caen ingi tsaoni tsu cuarto jin cuintu que'i ana'faye. Cameyo ccuipa anaña'chove shoshovi samba, cameyo anqqe'su'qqe tsu jin.

²⁶ Tsa'caen susi shondo'suja ccaru dyaipa Na'su Chigama iñajan ²⁷ qqwen supa: “Ñoa'me ñotssi qui Na'su ña na'su Chiga. Nane queja que suqquia'caen qui ña na'sunga ñotsse tson. Ñotsse tsomba qui tansintsse ñama i tise antian tsaoni.”

²⁸ Tise tsa'caen Na'suma iñajan'jen'ni Rebecaja buttopa ja tise mama tsaoni pa'cco tise'ccu tson'choma condaye. ²⁹ Tsa pushesuja fae quindyave an'bian, Labán, qqwen inisecho'choma. Tsa tsu posoni buttopa ji shondo'suma atteye. ³⁰ Nane tise que'tte anga'cho sotija, tivenga ancaenqqe'suma'qqe tayo attepa, toya'caen pa'cco tsandie su'choma tise que'tte condasi pañamba atteye buttopa ji.

Abrahamma shondo'suja toe poso jin'tti pa'cco tise cameyoi'ccu can'jen'ni Labánjan jipa ³¹ tise ma su:

—Jija, Na'su Chiga Quitsa in'jan'cho. ¿Ma'caen qui ca'nimbipa toya vani can'jen? Tayo gi tsa'oma ñoña'fa quene toya'caen que cameyone'qqe.

³² Tsa'caen susi shondo'suja tise'pa tsaoni ja. Tseni nepisi Labánjan cameyo'su andu'choma sombomboemba shoshovi sambama ccuipapoen cameyo anaña'chove. Tsomba cameyondeccuma o'fian. Tsa'caen tsomba omboe tsa'ccuma'qqe i cuintsu shondo'su tisei'ccu jacansundeccu'qqe tise'pa tsu'ttema cashi'faye.

³³ Tse'i o'fiaña'cho ashaen'fasi Abrahamma shondo'suja su:

—Ña afaye ji'choma toya afambi'teja añe oshambi gi.

Tsa'caen susi Labánjan su:

—Afaja jongoesuve in'jan'da.

³⁴ Tsonsi shondo'suja su:

—Ña gi Abrahamma shondo'su. ³⁵ Na'su Chiga tsu ña na'suma ñotsse in'jamba ricove tson. Nane osha'choma tsu tisenga afe: ovejandeccu, vaurandeccu, cori, totoacori, sema'su tsandiendeccu, sema'su pushesundeccu, cameyondeccu, toya'caen borondeccuma'qqe.

³⁶ Toya'caen tsu tise pushe Sara coenza ccasheve da'chonga fae tsandie du'shuve afe. Tsa tise dutssi'yenga tsu ña na'suja pa'cco tisu an'bian'choma afe. ³⁷ Ña na'suja ñoa'me su'chove ña suye in'jamba tsu ñama su: 'Antteya'bi qui cuintsu ña dutssi'ye Isaac va ña can'jeni'su Canaán ande'su pushesuma pusheye. ³⁸ Tsa'ma

ña yaya'ye antiandeccuni japa ña antian'su pushesundeccu'su pushesuve tta'ttaja cuintsu tsama pusheye.' ³⁹ Tsa'caen susi gi su: 'Ña na'su, pushesuma attesi ñai'ccu jiye in'jambian'da, ¿ma'caen gi tsoña?' ⁴⁰ Qquen ña ñajampañasi tsu tiseja su: 'Ñanda gi Na'su Chigave in'jamba canse. Tsa'cansi tise tsu tisema shondo'suma quei'ccu moeña cuintsu quema fuitepa ñotsse angasi queja tseni'su pushesuma ña dutssi'yembe iye ña antiandeccu'suma, nane, ña yaya'ye antiandeccu'suma. ⁴¹ Mapán ña antiandeccu pushesuma afeye chi'ga'ni'qqe cuintsu pasaja ña mandaquia'caen que tsoñe su'choja.'

⁴² "Tsa'caen susi jipa gi ja'ño a'ta posonga nepipa Na'su Chiga, tsa ña na'su Abraham Chigama qqen ñajan: 'Ñoa'me ñama fuitepa ñotsse i'ta ⁴³ chigáne, ña vani poso jin'tti ccutsusi qqen tsonjan: Antteja majan chu'a pushesu tsa'ccuma ichhoi'su jisi: Chigáne que tsoripama andiamba ñama cui'ñajan, qqen ña susi: ⁴⁴ Cu'ija. Toya'caen gi que cameyondeccuma'qqe cui'ñaña, qqen su'ta, tsaya tsu que in'jan'cho pushesu ña na'su dutssi'yembe pusheve daya'cho.' ⁴⁵ Toya ñajan'jen'ttie gi Rebeca jiña'choma atte tise tsoripama opipa. Jipa posonga andepa tsa'ccuma ichhoipa sombosi gi su: 'Chigáne tsa'ccuma ñanga cui'ñajan.' ⁴⁶ Tse'faei'ccuyi tise tsoripama andiamba ñama su: 'Cu'ija. Toya'caen gi que cameyondeccuma'qqe cui'ñaña.' Tsa'caen supa ñama cui'ñamba ña cameyondeccuma'qqe cui'ña. ⁴⁷ Cui'ña nanisi gi ñajampaña: '¿Majambe onque'nge qui queja?' qqen susi tiseja su: 'Ñanda

gi Betuel onque'nge, tsa Nacor dutssi'yembe, tise mama tsu Milca.' Tsa'caen susi gi tisenga indian tsofatu'su sotijama, toya'caen tivenga ancaengque'suma. ⁴⁸ Afepa gi ccaru dyaipa Na'su Chigama ññajan. Nane ña na'su Abraham Na'su Chiga Quitsama gi ñotsse afa tise ñama isi tansintsse ña na'su antiandecunga jipa tsa'su pushesuma tise dutssi'yembe angaya'pa. ⁴⁹ Tsa'cansi que'ija ñotssipa ña na'suma ñotsse tsoñe in'jan'da ñanga conda'faja. Tsambi'ta se'pi'aqqe ñanga conda'faja cuintsu ña jongoesuve tsoñe atesuye.”

⁵⁰ Tsa'caen susi Labán toya'caen Betuel'qqe su'fa:

—Pa'cco va tson'choja Na'su Chiga tson'cho tsu. Tsa'cansi ingimbembi tsu 'ju' ni 'me'in' qqwen afaye. ⁵¹ Chiga tsa'caen susi que canjan, va'tti tsu Rebeca. Tisema qui angaye osha cuintsu que na'sumbe dutssi'yema tsa'nduye Na'su Chiga in'jamba antteqquia'caen.

⁵² Tsa'caen su'fasi pañamba Abrahamma shondo'suja ccaru dyaipa andenga puntssan ccui, Na'su Chigama ñotsse afaye. ⁵³ Afa nanimba osha'cho ñotssia cori, totoacorima ñoñajan'choma, pushesu ondiccuqqe'suma'qqe somboemba Rebecanga afe. Toya'caen tise quindyanga, tise mamanga'qqe osha'cho ñotssiam afe'je. ⁵⁴ Afe'je nanimba shondo'su toya'caen tisei'ccu jacansundeccu'qqe an nanimba tse'ttinga ana'fa. Ccaqui a'ta poi'yi'cco jangi'fasi shondo'suja su:

—Antte'faja ña na'su tsaoni ña jaye.

⁵⁵ Tsa'ma Rebeca quindya, tise mama'qqe su'fa:

—Diez a'taqquia'caen tise ingi'ccu can'jencasi qui tisema angaye osha.

⁵⁶ Tsa'ma shondo'suja su:

—Ti'tsse ñama an'bian'fajama. Nane Chiga fuitesi vani ñotsse jipa gi ña in'janqquia'caen tson. Tsa'cansi antte'faja ña na'su tsaoni ña jaye.

⁵⁷ Tsa'caen susi tsendeccuja su'fa:

—Jinge pushesuma ttu'sepa pañañe jongoesu qqquen su've'se.

⁵⁸ Tsa'caen supa Rebecama ttu'sepa iñajampaña'fa:

—¿Jayeta ti qui in'jan va tsandiei'ccu?

Tsa'caen iñajampañasi pushesuja “ju” qqquen su.

⁵⁹ Tsa'caen susi Rebecama moeñe ashaen'fa, tisema coira'su pushesuma'qqe cuintsu Abrahamma shondo'su tsai'ccu jacansundeccui'ccu ja'faye. ⁶⁰ Tsa'caen moe'jemba qqquen Rebecama ñotsse afa'fa:

“Que ingi antianjan

¡tsain'bitssi aindeccumbe chanme qui daya!

¡Que omba'su dushundeccu tsu poiyi'cco que enemigondeccu canqquema patsu'faya!”

⁶¹ Tsa'caen afa nani'fasi Rebecaja, tisema coira'su pushesui'ccu cameyonga otse Abrahamma shondo'sui'ccu jaye. Tsa'caen tsu shondo'suja Rebecama isupa tsa canqqe'ye sombo.

⁶² Isaacja Lajairoi posone jipa Néguev andeni can'jen. Nane tsa posoja “Chiga cansepa ñama atte” qqquen inisecho'cho. ⁶³ Tsa'caen can'jemba tayo cose jisi pasiaye sombo. Tsa'caen jacamba

tsu atte cameyondeccu jiña'choma. ⁶⁴ Rebeca'qqe, cameyoni dyai'cho camba Isaacma atte. Attepa cameyo'ye andepa ⁶⁵ shondo'suma iñajampaña:

—¿Majan tsu jova tsandie potrero'ye inginingae jiña'cho?

Shondo'suja su:

—Tsaja ña na'su tsu.

Tsa'caen susi pañamba Rebecaja tise oppoen'jen'cho sarupai'ccu tisu camba'juma picco.

⁶⁶ Catsepa shondo'suja pa'cco tise tson'choma Isaacnga condase. ⁶⁷ Omboe Isaacja Rebecama anga tise mama Sara'ye carpa tsaoni. Tsa'caen angapa tisema pushe. Isaacja Rebecama ñotsse in'jamba tise mama'ñe pa'choma aqqe'pa.

25

Abraham faesu dushundeccu

¹ Abrahamjan faesu pushesuma pushe, Cetura qqquen inisecho'choma. ² Tsa'caen pushepa tsu ti'tsse dushundeccuve atapa. Nane tsendeccumbe inise tsu Zimram, Jocsán, Medán, Madián, Isbac toya'caen Súa. ³ Jocsán tsu Seba toya'caen Dedán yaya. Dedán omba'su dutssiyendeccu tsu asureo'su, letuseo'su, toya'caen leumeo'su aindecu. ⁴ Madián dutssiyendeccu tsu Efa, Efer, Hanoc, Abida toya'caen Elda. Nane pa'cco vandeccu tsu Cetura dushundeccu. ⁵ Isaac tsu isu pa'cco tise yaya Abraham pasi isuya'choma. ⁶ Tsa'ma Abraham faesuma pushepa du'sian'chondeccuja aqquia afe'choma tsu isu'fa. Nane Abraham toya cansuite tise faesu

dushundeccuma Isaac'ye joqquitssiamba chiga sombo'jefanga moe cuintsu tseni canse'faye.

Abraham pasi a'tu'cho

⁷ Abrahamjan ciento setenta y cinco canqque'fa an'biamba pa. ⁸ Nane opatsse cansé coenza ccashe'yeye dapa pa. Papa tise tayopi'su coenzandeccu can'jen'ni (Chiga sefacconi) ja. ⁹⁻¹⁰ Pasi tise dutssiyendeccu Isaac toya'caen Ismael tisema a'tu'fa Macpela fattocco changonga, tsa Mamre canqque chiga sombo'jefani'su chango. Nane Abrahamjan tsa changoma chava hitita aindecu'su Zohar dutssi'ye Efrómbema. Tse'ttinga Abrahamma a'tu'fa tise pushe Sara'yey'ccu pporotsse. ¹¹ Abraham tayo pasi Chigaja Isaacma ñotsse tson. Nane Isaacja “Chiga cansepa ñama atte” qquen inisecho'cho Lajairoi poso jin'ttini canse.

Ismael omba'su dutssiyendeccu

¹² Vandeccu tsu Ismael dushundeccu, tsa Abraham Sarambe egipto'su sema'su Agarnga du'sian'chombe dushundeccu. ¹³ Nane coenzai'ccu ashaensi tsu: Nebaiot, Cedar, Adbeel, Mibsam, ¹⁴ Misma, Duma, Massa, ¹⁵ Hadar, Tema, Jetur, Nafis toya'caen Cedema. ¹⁶ Tsa'caen tsu inisian'fa Ismael doce dushundeccuma. Tise'pa iniseningae tsu tisu ande tise aindecuma'qque inisian'fa. Nane poiye'cco tsu tisupa ande'su na'suve da'fa.

¹⁷ Ismaelja ciento treinta y siete canqque'fave an'biamba papa Chiga sefacconi tise tayopi'su coenzandeccu can'jen'ni ja. ¹⁸ Tise dushundeccuja Asiriani ja'jequini can'jen'fa. Nane tsaja Egipto

isevetssi tsu Havila, Sur enttingeni. Tise antian-deccumbe utufani can'jen'fa.

Jacob, Esaúma'qqe isu'cho

¹⁹ Va tsu Abraham dutssi'ye Isaacne condase'cho. ²⁰ Isaac cuarenta canqqe'fave an'biamba Rebecama pushe, Betuel onque'nge tsa Labán que'ttema. Tsendeccuja arameondeccu, Padan-aramni cansesundeccu. ²¹ Rebeca du'shuma isuye oshambisi Isaacja Na'su Chigama ñajan tise pushene. Ñajan'choma Chigaja pañasi Rebecaja surie da. ²² Dos du'shuve an'biansi toya isumbi'te tto'pani iyicco'je'fasi Rebecaja asi'ttaen: “¿Ma'camba tsu ña'ñajan qqen tsincon?” Tsa'caen asi'ttaemba Na'suma ñajansi tsu ²³ tiseja su: “Que tto'panijan dos aindeccu tsu can'jen'fa. Nane dos canqqeupa tsu toya isumbi'te iyicco'je'fa.

Fae'cco tsu faesuma ti'tsse'tssiya.

Nane coenza tsu chu'ama shondoya.”

²⁴ Tise du'shuma isuya'cho nepisi Rebecaja dos du'shuve isu. ²⁵ O'tie isu'choja cu'apa tosa'vu'cho'oyisi tise ma inisian'fa Esaú. ²⁶ Omboe tise quinshinme isusi tivei'ccu tise quindyá Esaú tsu'ttema indi'cho. Tsa'caen sombosi tsu inisian'fa Jacob. Isaac sesenta canqqe'fave an'bian'ni tsu Rebecaja tsa'caen du'shuma isu.

Coenzanga afeya'choma chavaen'cho

²⁷ Dushundeccuja coen'fa. Esaúja ñoa'me tsampini japa panzaye atesu'chove da. Tsa'ma Jacobja ppimppintssia a'ipa tsa'caen jacambipa pa'cco a'ta carpa tsaoni can'jen. ²⁸ Isaacja Esaúma

ñotsse in'jan tise panzapa i'je'choma an'jemba. Tsa'ma Rebecaja Jacobma ti'tsse in'jan.

²⁹ Fae a'ta Jacob shoccoen'jen'ni Esaúja tsampine quimbipa jipa ³⁰ su:

—Chigáne ñanga afeja que sho'ccoen'cho'su cu'a se'vama. Qquipoe'supa gi paye tson'jen. (Tsa'caen'qqe tsu Esaúma su'fa Edom, “cu'a” qqen suye.)

³¹ Tsa'caen ñajansi Jacobja su:

—Otie ñanga afeye suja quenga afeye su'choma, tsa dutssi'ye coenza isuya'choma, jai'ngae ña isuye.

³² Tsa'caen susi Esaúja su:

—¿Jongoesune gi dutssi'ye coenza isuya'choma in'jaña qquipoe'supa paye tson'jen'da?

³³ Tsa'caen susi Jacobja su:

—Ja'ñoñi ñoa'metsse su'chove suja.

Tsonsi Esaú ñoa'metsse supa dutssi'ye coenza isuya'choma Jacobnga antte cuintsu jai'ngae isuye. ³⁴ Tsa'caen susi Jacobja pan toya'caen cu'a se'vama Esaúnga afe. Esaúja amba cu'i nanimba jangipa ja. Ni minga'vieyi'qqe tisu isuya'choma afe'chone asi'ttaembe ja.

26

Isaac Gerarni ja'cho

¹ Tsa'caen tson'jen'ni qquipoesuiteve da pa'cco tsa ande, Abraham can'jeinte daqquia'caen. Tsa'caen dasi Isaacja filisteo ande'su Gerar canqqueni ja. ² Tsa filisteo'su na'suja Abimelec. Tseni tsu Na'su Chigaja attiamba su: “Egiptoni jajama. Ma'ttinga ña su'ninda tse'ttini can'jenjan.

³ Ja'ñojan va andeni can'jenjan. Ñajan quei'ccu can'jemba gi quenga ñotsse tsoña. Nane pa'cco va andema gi quenga toya'caen que dushundecunga'qqe afeya. Tsa'caen gi tsoña que yaya Abrahamnga su'choma naniñe.
⁴ Que omba'su dushundecuma gi atapoña sefacconi'su o'feacan'tsse. Tsomba gi pa'cco va andema afeya. Toya'caen gi que omba'su dushundecui'ccu poi ande'su aindecuma ñotsse tsoña. ⁵ Nane Abrahamjan ñama pañamba pa'cco ña mandapa antte'choma nanitsse tson. Tsa'caen ña atesian'choma pañamba tsonsi gi tise dushundecui'ccu poi ande'su aindecuma ñotsse tsoña.”

⁶ Tsa'caen susi Isaacja Gerarni can'jen.

⁷ Tsa'caen can'jensi tseni can'jensundeccu Rebecane iñajampaña'fasi Isaacja “Ña pushe” qqquen suye dyojopa “Ña que'tte” qqquen su. Nane Rebecaja me'detssisi tsu tsa'caen su tseni'su tsandiendeccu tisema fi'ttipa Rebecama itsa'fasa'ne.

⁸ Bo'tsse tsu tseni canse'fa. Tsa'ma fae a'ta Abimelec ventana'ñe caña'jen'ni Isaac tise pushe Rebecai'ccu cofe'je'choma atte. ⁹ Tsa'caen attepa Isaacma ttu'seye mandapa tise jisi su:

—Tiseja ñoa'me que pushe tsu. Tsa'camanda, ¿jongoesie qui 'tisu que'tte' qqquen afopoen?

Tsa'caen susi Isaacja su:

—Tisene ñama fi'tti'fasa'ne dyopa gi tsa'caen su.

¹⁰ Tsa'ma Abimelecja tisema su:

—¿Ma'caen qui inginga tsa'caen tson'jen? Ti'tssecan'da tsu va canqque'su majan tsandie que

pushei'ccu ccuiye'can. Tsa'caen tson'choecan'da queyi qui ingima egae tsincoeñe'can.

¹¹ Tsa'caen supa Abimelecja manda antte tise canqque'suma:

—Majan tsa tsandiema noñangiamba, tise pushema noñangian'ninda junde fi'ttiya'cho.

¹² Tsa canqque'fa Isaacja tseni jomba ñotsse tai Na'su Chiga tisema ñotsse tsonsi. ¹³ Nane ricove dapa pa'cco osha'choma an'bian.

¹⁴ Tsain'bi oveja, vaura, semasundeccuma'qque an'biansi filisteondeccuja tise'pa injama'choni se'pi'fa. ¹⁵ Tsa'caen ganasi injamáchoni se'pipa filisteondeccuja Abraham cansuite Abrahambe semasundeccu dyan'dya'cho posoma andei'ccu ovi'fa. ¹⁶ Tsa'caen tson'fasi Abimelecja Isaacma su:

—Va'ttie joqquitssipa jaja. Ingima ti'tsse joc-capitssia ricove qui da.

¹⁷ Tsa'caen susi Isaacja tsa canqque'ye sombopa Gerar'su sinjuncconi japa canse.

¹⁸ Tsa'caen japa toe tise yaya'ye cansuite dyan'dya'fa'cho tsa'ccu posoma ccase dyan'dya. Nane tsa posoma tsu filisteondeccu Abraham pasi andei'ccu ovi'fa. Tsaveyi tsu ccase dyan'dyapa tise yaya'ye inisianqquia'caeñi inisian. ¹⁹ Fae a'ta Isaacmbe semasundeccuja tsa sinjuncconi tsa'ccu posove dyandya'jepa tsa'ccu sombo'je'ttima atte'fa. ²⁰ Tsa'ma cca'i tsa sinjuncconi ovejama coirasundeccu Isaacmbe coirasundeccui'ccu tssetssecco'fa, tsa tsa'ccuja tise'pambe qqen supa. Tsa'caen tssetssecco'fasi Isaacja “Tssetssecco'cho” qqen tsa posoma inisian. ²¹ Tsa'caen tsomba omboe tise'be

semasundeccuja faesu posove dyan'dya'fa. Tsane'qqe ccase iyicco'fasi Isaacja tsa posoma inisian “Iyicco'cho.”

²² Tsa'caen tsincon'fasi Isaacja tse'ttie sombopa biani japa faesu posove dyan'dya. Tsa posonejan iyicco'fambisi “Se'piccombi'choa” qqen inisian. Tsa'caen inisiamba su: “Ja'ño tsu Na'su Chigaja antte ingi se'piccombe va andeni cansepa ti'tsse'tssia've daye.”

²³ Tse'tti can'jemba Isaacja Beersebani ja.
²⁴ Tsequi cose Na'su Chigaja tisenga attiamba su:
 “Ña gi que yaya Abrahambe Chiga.

Dyombe can'jenjan. Ña gi quei'ccu can'jen.

Nane ñama shondo'su Abrahamma in'jamba gi quema'qqe in'jamba ñotsse tsoña.

Toya'caen gi que omba'su dushundeccuve ti'tsse atapoëña.”

²⁵ Tsa'caen susi pañamba Isaacja Chiganga afeye oque'je'chove ñoñamba tsanga Na'su Chigama iñajan'jen. Tse'tti cansesi tisema shondosundeccuja faesu tsa'ccu posove dyan'dya'fa.

Isaac, Abimelec'qqe injancco'fa

²⁶ Fae a'ta Abimelecja Gerarne ji Isaacma afaye. Tisei'ccu tsu ji'fa tise amigo Ahuzat, toya'caen Ficol, tise'be sundarondecumbe capitán. ²⁷ Tsa'caen ji'fasi Isaacja su:

—Tisupa ñama chi'gapa que'i ande'ye joqquitssian'da, ¿jongoese qui ñama can'su ji'fa?

²⁸ Tsendeccuja su'fa:

—Atte'fa gi quei'ccu Na'su Chiga can'jen'choma. Tsa'cansi gi in'jan'fa quei'ccu fae'ngae injancoye. Nane injancoye in'jamba su'choja qqwen tsu: ²⁹ Ingi quema noñangian'ma'caen queja ingima egae tsonjama. Nane ingija quema noñangian'ma ñotsse tsonjama quema ñotsse afapa moe'fa. Tsa'ma ja'ñojan Na'su Chiga tsu quema ñotsse tson'jen.

³⁰ Tsa'caen su'fasi Isaacja rande fiestave tson. Nane amba cu'ipa ³¹ ccaqui a'ta sinte jangipa ñoa'me su'choi'ccu ñotsse tsoña'chove injancoye su'fa. Tsa'caen supa Isaacja “Chigái'ccu” qqwen susi tsendeccu'qqe tisu amigoma'caen chigambi-amba ja'fa.

³² Tsequi a'tayi Isaacmbe semasundeccu'qqe jipa conda'fa tise'pa dyandya'je'cho'ye tsa'ccu sombo'choma. ³³ Isaacja tsama pañamba tsu posoma “Seba” qqwen inisian. Tsa'cansi tsu tsa canqqeja ja'ño pán Beerseba qqwen inisecho'cho.

³⁴ Esaúja cuarenta canqqe'fave an'biamba Juditma pushe. Tsaja hitita a'i'su Beerri onque'nge. Toya'caen tsu faesu pushesu, Basematma pushe. Tsaja faesu hitita'su onque'nge, Elón qqwen inisecho'cho. ³⁵ Tsa dos pushesundeccu tsu Isaac Rebecama'qqe panshaen vanae'jen'fa.

27

Isaac dutssi'yema ñotsse afa'cho

¹ Isaacja coenza ccashe'yeye dapa atte'jeye os-hambi. Fae a'ta tise dutssi'ye coenza Esaúma ttu'sepa su:

—¡Jarichol!

Qquen susi Esaúja su:

—Afaja, yaya.

² Tsonsi Isaacja su:

—Tayo qui atte ña coenza ccashe'yeve da'choma. Maqui a'ta pa'ngae gi paya. ³ Tsa'camba gi in'jan tsampini que battittianccui'ccu japa jongoesuveyi'qqe fi'ttipa iye. ⁴ Ipa ña aña in'janqquia'caen ya'yatssia aña'chove sho'ccoemba ija ña aña. Tsonsi gi toya pambi'te quenga ñotsse tsoña'chove afaya.

⁵ Tsa'ma Rebecaja Isaac Esaúnga tsa'caen su'je'choma paña. Tsa'camba Esaú tsampini tise yayambe panza'su jasi ⁶ Jacob, tise dutssi'ye chu'ama ttu'sepa su:

—Paña gi que quindyá Esaúnga que yaya qqen su'je'choma: ⁷ 'Tsampini japa jongoesuveyi'qqe fi'ttipa ña aña in'janqquia'caen ya'yatssia aña'chove sho'ccoemba ija ña aña. Amba gi toya pambi'te quenga ñotsse tsoña'chove afaya Na'su Chiga caña'jen'ni.' ⁸ Tsa'cansi, jaricho, ña quenga su'choma ñotsse pañajan. ⁹ Chivo ttuccuni japa dos chivo du'shu ñotssiama ñani ija. Ña gi que yaya in'janqquia'caen ya'yatssia aña'chove sho'ccoña. ¹⁰ Que qui ña sho'ccoen'choma angaya cuintsu amba quenga ñotsse tsoña'chove afaye toya tise pambi'te.

¹¹ Tsa'ma Jacob tise mamanga su:

—Ña quindyaja tosecco'oyi pa'cco ai'vo. Tsa'ma ñajan me'cho. ¹² Nane ña yaya ñama pporaemba atte'ta tsu in'jaña ñajan tisei'ccu cofe'je'chove. Tsomba tsu ñama ñotsse afambipa egave afaya.

¹³ Tsa'ma tise mamajan su:

—Jaricho, tsa egae afa'choja ñanga tsu antteyeya. Queja asi'ttaembe'yi ña suqquia'caen chivo du'shuma i'ngapa ija.

¹⁴ Tsa'caen susi Jacobja chivo dushundecuma i'ngapa afe tise mamanga. Tise mamajan isupa Isaac aña in'janqquia'caen ya'yatssia aña'chove sho'ccoen. ¹⁵ Tsomba dutssi'ye coenza Esaú carpani an'bian'cho ñotssia ondiccu'jema somboemba dutssi'ye chu'a Jacobnga ondiqquian. ¹⁶ Toya'caen chivo ttonoi'ccu Jacob tivenga tise catai'chonga'qqe oppoen ma'tti tose me'ttianga. ¹⁷ Tsa'caen ñoñamba tise sho'ccoen'cho, panma'qqe tisenga afe cuintsu tise yayanga angapa afeye.

¹⁸ Tsonsi Jacobja tise yaya can'jeni ca'nimba su:

—¡Yaya!

Tsonsi Isaacja su:

—Va'tti gi can'jen. ¿Ma'can ña du'shu qui ji?

¹⁹ Tsonsi Jacobja su:

—Ña gi que dutssi'ye coenza Esaú. Tayo gi que suqquia'caen ñoñamba i. Chigáne jangi dyaipa ña panza'choma anjan. An nanimba Chiga ñanga ñotsse tsoña'chove afaja.

²⁰ Tsonsi Isaacja iñajampaña:

—¿Ma'caen qui jundeyi cachuipa panzapa ji, jari-cho?

Jacobja su:

—Na'su que Chiga ñama fuitesi gi junde panza.

²¹ Tsa'ma Isaacja su:

—Ñanga catsepa antteja ña pporaencañe ñoa'me ña dutssi'ye Esaúve'se qui.

²² Tsa'caen susi Jacobja catse cuintsu tise yaya pporaencañe. Pporaencamba Isaacja su: “Aya'faja Jacob aya'fa. Tsa'ma tiveja Esau tive'can.” ²³ Nane Jacob tive tise quindya Esau tive'caen tosa'vupasi Isaacja tisema atesuye oshambi. Tsa'ma tisenga ñotsse tsoña'chove afaye tson'jemba ²⁴ ccase iñajampaña:

—¿Ñoa'metsse ti qui ña dutssi'ye Esau?

Jacobja su:

—Ju, ñanda gi Esau.

²⁵ Tsonsi tise yayaja su:

—Afeja, jaricho, ña aña que panza'choma. An nanimba gi quenga ñotsse tsoña'chove afaya.

Tsa'caen susi Jacobja aña'choma afe cuintsu aña. Toya'caen vinoma'qqe afe cuintsu cui'ye. Isaacja amba cu'i nanimba ²⁶ su:

—Jaricho, ñanga catsepa mochaja.

²⁷ Jacob mochaye catsesi Isaacja tise ondiccu'jema shonchhan. Tsa'caen shonchhamba tisenga ñotsse tsoña'chove qqen afa:

“Ju, ña dutssi'yema shonchhansi

Na'su Chiga nasipa'su andema ñotsse tsonsi

ñoa'metsse tssu'jianqquia'can tsu.

²⁸ Chiga tsu quenga sefani'su unjima afeya,

Toya'caen ñotsse sho'yoya'cho andema.

Tsonsi qui tsain'bio trigo, tsain'bio vinoma'qqe an'biaña.

²⁹ Tsain'bio a'i tsu quema paña'faya.

Nane faesu ande'su aindeccu'qqe quenga ccaru dyai'faya.

Que antiandeccoma'qqe qui mandaya.

Nane que mamambe dushundeccu'qqe quenga ccaru'faya.

Majan quenga egae tsoña'chove afa'ninda

Chiga tsu tisenga egae tsoña.

Tsa'ma majan quenga ñotsse tsoña'chove afa'ninda

Chiga tsu tisenga ñotsse tsoña.”

³⁰ Isaac Jacobnga ñotsse tsoña'chove afa nanisi Jacob tise yayane somboin jasi tse'faei'ccuyi tsu Esaúja tsampine ji. ³¹ Jipa tsa'qqe ya'yatssia aña'chove sho'ccoemba tise yayani anga. Angapa su:

—Yaya, jangipa anjan que dutssi'ye panzapa i'choma. Tsomba ñanga afaja ñanga ñotsse tsoña'chove.

³² Tsa'caen susi Isaacja iñajampaña:

—¿Majan qui queja?

Tsonsi Esaúja su:

—Ña gi que dutssi'ye coenza, Esaú.

³³ Tsa'caen susi pañamba Isaacja dyopa ttun'dundu'je afa:

—Tsa'caenda, ¿majan tsu panzapa sho'ccoemba ya'yatssia aña'choma i? Que toya jimbi'te gi pa'cco tsa i'choma amba tsa i'suma ñotsse tsoña'chove afa. Tsa'caen ña susi tsu tisenga ñotsse tsoña.

³⁴ Esaúja tise yaya su'choma pañamba quian'me i'namba fundopa afa:

—Ñanga'qqe ñotsse tsoña'chove afaja, yaya.

³⁵ Tsa'ma Isaacja su:

—Tayo tsu que antian jipa afopoemba quenga ñotsse tsoña'chove afaya'choma anga.

³⁶ Tsonsi Esaúja su:

—¡Ñoa'me tsa'cañasi ti qui Jacobve inisian'fa! Nane ja'ñojan dos se tsu ñambema qqeñamba itsa. Otie tsu dutssi'ye coenza isuya'choma itsa. Tsomba ja'ñojan ñanga ñotsse tsoña'chove

afaya'choma'qqe itsa. ¿An'biambi ti qui faesu afa'choveyi'qqe ñanga ñotsse tsoña'chove afaye?

³⁷ Tsa'caen susi Isaacja su:

—Que canjan. Tayo gi Jacobnga afe que na'suve daya'chove. Nane poiye'cco tise antiandeccu'qqe tisema paña'faya. Toya'caen gi in'jan cuintsu tsain'bio trigo, tsain'bio vinoma'qqe an'biañe. Tsa'camba, ¿jongoesuma gi quenga tsoña, jaricho?

³⁸ Tsa'ma Esaúja quian'me ñajamba su:

—¿Aqquia fae afa'choveyi ti qui an'bian, yaya? Chigáne ñanga'qqe ñotsse tsoña'chove afaja.

Tsa'caen supa ccase i'na fundo.

³⁹ Tsa'caen i'nasi Isaacja su:

“Nane queja ñotssia ande'ye joqquitssipa biani can'jeña, ni unjin'qqe tui'jembinia.

⁴⁰ Sundaroa'caen tisu matichi'ccu iyicco'jepa qui tisu andema an'biaña.

Nane que antianma shondo'suve qui daya.

Tsa'ma maqui a'ta quin'ame tson'da qui tise'ye ccushaya.”

Jacob Esaúma dyopa ccuyin ja'cho

⁴¹ Isaac Jacobma ñotsse tsoña'chove afasi Esaúja Jacobma chi'gapa qqen asi'ttaeñe ashaen: “Junde tsu ña yaya pasi i'naña'cho. I'na pasapa gi ña quinshin Jacobma fi'ttiya.”

⁴² Esaú tsa'caen in'jan'choma pañamba Rebecaja Jacobma ttu'seye manda. Ttu'sesi jisi tisema su:

—Que canjan. Que quindya Esaú tsu que tson'chone quema fi'ttiye in'jan. ⁴³ Tsa'cansi, jaricho, ñama pañajan: Jundeyi ccuyapa jaja Harán canqqueni, ña quindya Labán can'jeni. ⁴⁴ Tseni canseccaja que quindya tise iyicca'ye'choma

pasaya'ngae; ⁴⁵ que tisenga tson'choma aqqe'paya'ngae. Pasasi gi conda'suma moeña que ccase vani jiye. In'jambi gi fae a'tayi dos ña dushundeccu nepi'faye.

⁴⁶ Omboe Rebecaja Isaacnga su:

—Esaú pushe hititandeccu panshaen noñangiansi gi ñoa'me quimbipa paye in'jan. Jacob'qqe va Canaán ande'su hititama pushe'ninda ñoa'me gi paya.

28

¹ Tsa'caen Rebeca su'choma pañamba Isaacja Jacobma ttu'sepa ti'tsse tisenga ñotsse tsoña'chove afapa qqen conda: “Va Canaán ande'su pushesuma pushejama. ² Tsa'ma Padan-aram andeni jaja que yaya ccashe'ye Betuel tsaoni. Tseni japa que ton'ton Labán onque'nge'suma pusheja. ³ Chiga Osha'choma Oshacho'cho quenga ñotsse tsonsi qui tsain'bio omba'su dushundeccuve atapoña. Nane que'ye tsu tsain'bio aindeccu atapapa fae naccuve da'faya. ⁴ Chigaja Abrahamnga ñotsse tsoñe su'chopa tsu quenga ñotsse tsomba que omba'su dushundeccunga'qqe ñotsse tsoña. Nane ja'ñoñi gi ccane ji'choa'caen va andeni canse'fa. Tsa'ma Chiga Abrahamnga suqquia'caen tsonsi qui va ande'su nasundeccuve dapa canse'faya.”

⁵ Tsa'caen tsu Isaacja Jacobma manda maña Padan-aram andeni. Tsa'caen japa Jacobja nepi tise ton'ton Labán tsaoni. Nane Labán tsu arameo'su a'i Betuel dutssi'ye. Toya'caen tsu Jacob, Esaú mama Rebeca quindya.

Esáú ccase pushe'cho

⁶ Isaac tsa'caen Jacobma Chiga tisenga ñotsse tsoña'chove afapa Padan-aram andeni japa push-eye moe'choma Esaúja atte. Toya'caen tsu atte ñotsse afa'cho nanimba Canaán ande'su pushe-suma pusheye se'pi'choma. ⁷ Tise yaya tise mama manda'fasi Jacob ñotsse pañamba tsa'caen Padan-aram andeni ja. ⁸ Tsama'qqe attepa tsu Esaúja in'jan tise yayaja in'jambi Canaán'su pushesundecuma. ⁹ Tsa'caen in'jamba Esaúja tayo dos Canaán'su pushesuma pushepa Ismael, tsa Abraham dutssi'ye, can'jeni japa tsambe onque'nga, Mahalatma'qqe pushe. Tsaja Mebaiot antian tsu.

Chiga Betelni Jacobnga attian'cho

¹⁰ Jacobja Beersebane sombopa Haráni ja'je'cho tsaiqui'ye ja. ¹¹ Tsa'caen jayisi tayo chiga amppisi tse'ttinga ana. Patu tse'tti sheque'cho'suma isupa asusu'chove ccuiñamba tsanga anañe ccui. ¹² Anamba qqen ayo'o: Canchanama tsu atte andene sefacconi ppo'rotsse ccutsu'choma. Tsa'ye tsu Chigama sefacconi'su shondosundecuja ansundepa ande'je'fa. ¹³ Toya'caen tsu atte Na'su Chiga tsai'ccu pporotsse ccutsupa qqen afa'je'choma: “Ña gi Na'su que yaya ccashe'ye Abrahambe Chiga. Toya'caen que yaya Isaacmbe Chiga. Quenga toya'caen que omba'su dushundecunga gi que ja'ño ccui'cho andema afeya. ¹⁴ Nane tsendeccu tsu atapa'faya tsain'bitssi sisipa andeni jinqquia'cantsse. Tsa'caen atapapa tsu attufacco'faya majandecuja cambajufanga, majandecuja sepaccofanga, majandecuja

tansinfanga, toya'caen majandeccuja pavefanga. Nane tsa'caen attufapa tsu que, tisu omba'su dushundeccu'qqe poi ande'su aindecuma ñotsse tson'faya. ¹⁵ Ñanda gi quei'ccu can'jen. Coiraya gi que mani jacan'ni'qqe. Toya'caen gi tsoña que ccase vani jiya'chove. Quenga su'choma nanimbiteja quema catiya'bi gi.”

¹⁶ Tsa'caen ayo'opa bittapa Jacobja qqwen asi'ttaen: “Ñoa'me tsu Na'suja va'tti can'jen'ma gi ñajan atesumbi.” ¹⁷ Tsa'caen in'jamba dyopa asi'ttaen: “¡Ñoa'me dyo'tssi ti va'ttija! ¡Va'tti tsu Chiga Tsa'o! ¡Sefacconi Cani'jen'tti tsu!”

¹⁸ Ccaqui a'ta sinte'yi Jacobja jangipa tise asusupa ana'cho patuma jangian dyaiñamba asetei'ccu tsanga fiñamba feti Chigambe qqwen canjeñe. ¹⁹ Tse'ttija tayopi'su canqqe jin, Luz qqwen inisecho'cho. Tsa'ma Jacobja tsa inisema cambiamba Betel qqwen inisian.

²⁰ Tse'ttinga tsu Jacobja ñoa'me su'chove afa: “Chiga ñai'ccu jacamba ña qqwen jacan'choma coirapa angacamba jongoesu anqqe'su toya'caen ondiccuqqe'suma afesi ²¹ ccushapa quinsetssi toequi ña yaya tsaoni nepi'ta gi in'jaña Na'suja ñoa'me ña Chiga tsu. ²² Va patuma ña jangian dyaiña'cho tsu Chiga tsa'oya. Toya'caen, Chiga, osha'cho que ñanga afe'cho'suma enttingeve fae chongayi'ccoveyi gi quenga afe'jeya.”

29

Jacob Haráni can'jen'cho

¹ Jacobja tise jayi'cho tsaiqui'ye japa chiga sombo'jeni'su andeni nepi.

² Tseni'su potreronga nepipa posoma atte. Tsa poso jin'tti tsu tres naccu oveja bojin ccui'fa. Nane tsa poso'su tsa'ccuma tsu tsendeccuja cu'iyeye atesu'fa. Poso chango'ttimajan rande patui'ccu picco'cho tsu. ³ Nane poi naccu'su oveja tse'ttinga bosu tsu coirasundeccuja tsa patuma joqquitssiañe atesu'fa tise'pa ovejanga tsa'ccuma cui'ñañe. Oveja cu'i nanisi ccase tsu piccoya'cho.

⁴ Jacobja catsepa oveja coirasundeccuma iñajampaña:

—Antiandeccu, ¿que'ija manisundeccu qui?

Tise'paja su'fa:

—Ingija Harán'su'fa.

⁵ Tsonsi Jacob ccase iñajampaña:

—¿Que'ita ti qui atesu'fa Labán, tsa Nacor dutssi'yema?

—Ju, atesu'fa gi —qqen tsu su'fa.

⁶ Jacobja su:

—¿Quinse'tssi ti can'jen?

Coirasundeccuja su'fa:

—Ju, Labánjan quinsetssi tsu. Que canjan, jovee tsu tise onque'nge, Raquel, tise ovejandecui'ccu vani jiña.

⁷ Tsonsi Jacobja su:

—Toya a'ta tsu. Nane toya tsu nepimbi ovejama piccoya'cho. ¿Mingapa qui tsa'ccuma cui'ñamba anga'fambi cuintsu shoshovima an'faye?

⁸ Tsa'ma tsendeccuja su'fa:

—Tsa'caen tsoñe osha'fambi gi. Nane ronda'jeya'cho tsu poi naccu'su oveja bosu

coirasundeccuja va patuma joqquitssiamba ovejanga tsa'ccuma cui'ñañe.

⁹ Tsa'caen Jacob tsendeccui'ccu afa'je'ni Raquelja nepi tise yaya ovejandeccui'ccu. Nane tise tsu ovejama coira'su. ¹⁰ Tsa'caen tise ton'ton Labán ovejai'ccu jisi attepa tse'faei'ccuyi Jacobja posoma picco'cho patuma joqquitssiamba tise ton'ton Labán ovejandecunga tsa'ccuma cui'ña. ¹¹ Cui'ña nanimba Raquelma chigambiamba mochapa i'na. ¹² Tsomba Jacob tiseja Rebeca dutssi'ye, Labán quinshin qqen condasi pañamba Raquelja buttopa ja tise yayanga condaye.

¹³ Labánjan tise que'ttembe du'shu Jacob ji'choma pañamba sombopa buttoin ja tisema cachuiye. Nepipa munsimba chigambiamba mocha. Tsomba tise tsaoni anga. Can'jemba Jacobja condase pa'cco tisu can'jeni tsomba ji'choma. ¹⁴ Condase nanisi Labánjan su: “Ñoa'me qui queja ña anjampa'suyi.”

Raquel, Leama pusheye Jacob sema'cho

Jacobja fae ccovu pa'cco Labáni'ccu can'jen. ¹⁵ Tsa'caen can'jensi Labánjan su:

—Queja ña antian jipa aqquia ganambe'yi ñambe semaña'bi qui. Mi'nge'tsse in'jan'da ñanga condaja. Afepoeña gi.

¹⁶ Labánjan dos onque'ngeme an'bian. Coenza tsu Lea; chu'aja Raquel. ¹⁷ Leaja tise tso'fe ñotssimbi. Tsa'ma Raquelja tsu'ttene tsovepi me'detssi. ¹⁸ Jacobja Raquelma injanchopa qqen su:

—Que onque'nge chu'a Raquelne gi siete can-qqe'fa pa'cco quembe semaña.

¹⁹ Tsa'caen susi Labánjan su:

—Quenga afeye tsu ñotssi, faesu atesumbi'choanga afesa'ne. Ñai'ccu can'jemba semajan.

²⁰ Tsa'caen susi Jacobja siete canqqe'fa pa'cco Raquelne sema. Tsa'ma Raquelma ñotsse in'jamba tsa siete canqqe'fama aqquia siete a'ta'canccoeyi in'jan. ²¹ Siete canqqe'fa pasasi Jacobja Labánma su:

—Afeja ña pushema ña tisema pusheye. Tayo gi nani ña tisene semañe su'cho a'tama.

²² Tsa'caen susi Labánjan poiyl'cco tisei'ccu pporotsse canjensundecuma ttu'se pushe'je'cho fiestave tsoñe. ²³ Tsa'ma tsequi cose Labánjan Leama Jacobni anga. Angasi Jacobja tsai'ccu ana. ²⁴ (Toya'caen Labánjan tise'be sema'su pushesu Zilpama afe, Leama coira'suve.) ²⁵ Ccaqui a'ta sinte Jacobja tise Leai'ccu ana'choma in'jamba iyicca'yepa Labánma afa:

—¿Ma'caen qui ñanga qqen tson? Ñajan Raquelne quembe sema. Tsa'camanda, ¿jongoesie qui ñanga afopoen?

²⁶ Tsa'caen susi Labánjan su:

—Vanisundeccuja coenzama otie chu'a tsa'nduye atesu'fambi. ²⁷ Tsa'cansi va avuja'qui pushe'je'choma nanijan Leane. Tsomba faesu siete canqqe'fave ñambe semañe in'jan'ninda gi Raquelma'qqe quenga afeya.

²⁸ Jacob pañamba in'jansi tsa Leane fiestaen'cho avuja'qui pasasi Raquelma'qqe pusheye afe. ²⁹ (Toya'caen Labánjan tise'be sema'su pushesu Bilhama afe, Raquelma coira'suve.) ³⁰ Jacobja Raquelma'qqe pushepa tise've Leama ti'tsse

in'jamba faesu siete canqqe'fave Labánmbe sema.

Jacob dushundeccu

³¹ Na'su Chigaja Jacob Leama chi'ga'choma atepa tisenga tson cuintsu du'shuma isuya'chove. Tsa'ma Raquelmajan dusumbive tson. ³² Leaja surive dapa fae tsandie du'shuve isu. Isupa su: “Na'su Chigaja ña ñombi'ye'choma atte. Tsa'cansi ja'ño tsu ña tsa'nduja ñama in'jaña.” Tsa'caen supa tsu tsa du'shuma inisian Rubén.

³³ Can'jemba Leaja faesu tsandie du'shuve isu. Tsamajan inisian Simeón qquen supa: “Na'suja ñama chi'ga'choma pañamba faesu du'shuve ñanga afe.”

³⁴ Toya'caen ccase tsandie du'shuve isupa su: “Ja'ño tsu ña tsa'nduja ñama in'jaña tres du'shuve an'biansi.” Tsa'caen supa tsu tsa du'shuma inisian Leví.

³⁵ Lea ccase faesu tsandie du'shuve isupa su: “Ja'ño gi Na'su Chigama ñotsse afaya.” Tsa'caen supa tsu tsa du'shuma inisian Judá. Tse'ccoeyi isupa ti'tsse isumbe antte.

30

¹ Raquelja tisu Jacob du'shuve isuye oshambipa tise she'she Leama iyicca'yepa injamáchoni se'pi. Tsa'caen se'pipa tisu tsa'nduma su:

—Ñanga'qqe du'sianjan. Tsambi'ta gi paya.

² Tsa'caen susi Jacobja tisema iyicca'yepa su:

—¿Ñanda ti gi Chiga? Tsa tsu quemajan tsa'caen du'shu me'cco canseye antte.

³ Tsa'caen susi Raquelja su:

—Que canjan. Ñambe sema'su Bilhai'ccu canseja. Tise du'shuve isu'ninda ña quei'ccu cansepa isuqquiacaña tsu. Tsa'caen tson'da gi du'shuve an'biaña.

⁴ Tsomba Raquelja tisu suqquia'caen tise'be sema'su pushesu Bilhama Jacobnga afe tise pushe'can'me. Tsonsi Jacob tsa Bilhai'ccu cansesi ⁵ fae tsandie du'shuve Jacobmbe isu. ⁶ Isusi Raquelja su: “Iñajansi Chiga ñama pañamba tansintse tsoñe tsandie du'shuve ñanga afe. Tsa'cansi gi va du'shuma inisiaña Dan.”

⁷ Omboe ccase Bilha Jacobmbe faesu tsandie du'shuve isu. ⁸ Isusi Raquelja su: “Ña she'shei'ccu iyicco'jepa gi patsu. Tsa'camba gi va du'shuma inisiaña Neftalí.”

⁹ Leaja tisu du'shuma isu'je'choma antte qquen in'jamba tise'be sema'su pushesu Zilpama Jacobnga pushe'can'me afe. ¹⁰ Tsa'caen tsonsi Zilpaja tsandie du'shuve Jacobmbe isusi ¹¹ Leaja su: “¡Ñajan gana! Tsa'camba gi va du'shuma inisiaña Gad.”

¹² Can'jemba Zilpaja ccase tsandie du'shuve Jacobmbe isu. ¹³ Isusi Leaja su: “¡Ñoa'me avuja'cho tsu! Ja'ño tsu pushesundeccuja su'faya ñajan avujatssi. Tsa'cansi gi va du'shuma inisiaña Aser.”

¹⁴ Fae a'ta Rubénjan nasipani ja trigoma tai'su. Tsa'caen japa tsenima du'shuve isuqqe'su teta'choma atte, mandrágoras qquen su'choma. Tsa'suma isupa tise mama Leani anga. Tsa'caen isi Raquelja tsa teta'choma atepa Leama su:

—Chigáne va que dutssi'ye i'cho mandrágoras enttingeve ñanga afeja.

¹⁵ Tsa'ma Leaja se'pipa su:

—Tayo qui ña tsa'nduma itsa. ¿Tsomba ja'ñojan ña du'shu i'cho mandrágorasma'qqe ti qui itsaye in'jan?

Tsa'caen susi Raquelja asi'ttaemba su:

—Que dutssi'ye i'cho mandrágorasma afe'ta qui ja'ño cose Jacobi'ccu anaña oshaya.

¹⁶ Cose jisi Jacob nasipane jisi Leaja cachuiye sombopa su:

—Ña dutssi'ye i'cho mandrágorasma Raquelnga afe'chone qui ja'ñojan ñai'ccu anaña.

Tsequi cose Jacobja Leai'ccu ana. ¹⁷ Tsa'caen fae'ngae anasi surie dapa Leaja faesu tsandie du'shuve isu, Chiga ñoa'me tise iñajan'choma pañasi. Nane tsai'ccu tsu Leaja cinco du'shuve an'bian.

¹⁸ Tsa'caen isupa Leaja su: “Ñambe sema'su pushesuma ña tsa'ndunga afe'chone tsu Chigaja ñanga ccase ñotsse afe. Tsa'cansi gi va du'shuma inisiaña Isacar.”

¹⁹ Omboe Leaja ccase Jacobmbe du'shuve isu. Tsai'ccu tsu Leaja seis du'shuve an'bian.

²⁰ Tsa'caen isupa su: “Chiga tsu ñanga ñocca'tssiam afe. Ja'ño gi seis tsandie du'shuve ña tsa'ndumbe isu. Tsa'cansi tsu ña tsa'nduja ja'ño ñama ti'tsse in'jaña. Tsa'cansi gi va du'shuma inisiaña Zabulón.”

²¹ Osefa'poe Leaja fae pushesu du'shuve isupa Diname inisian. ²² Tsa'ma Chigaja Raquelma injan'jemba tise iñajan'choma paña. Tsa'caen pañamba antte cuintsu du'shuve isuye. ²³ Tsa'cansi aisheve isupa su: “Chiga tsu ña du'shu me'cco cansepa ansange'choma joqquitssian. ²⁴ Isha tsu antteya ña faesuve'qqe isuye.” Tsa'caen supa Joséve inisian.

Jacob Labáni'ccu afopoenco'cho

²⁵ Raquel tsa'caen Joséve isusi Jacobja Labánma su:

—Antteja ña tisu andeni jaye. ²⁶ Toya'caen ña dushundeccu ña pushendeccuma'qqe ñanga afeja cuintsu ñai'ccu ja'faye. Nane tise'pane gi ñajan quembe sema. Queja ñoa'me qui atesu ña quembe sema'choma.

²⁷ Tsa'ma Labánjan su:

—Chigáne ti'tsse ñai'ccu can'jenjan. Nane asi'ttaemba gi in'jan que ñai'ccu can'jensi tsu Na'su Chigaja ñama ñotsse tson. ²⁸ Mi'nge'tsse in'jan'da ñajanjan. Afepoeña gi.

²⁹ Tsonsi Jacobja su:

—Tayo qui atesu ña ma'caen quembe semamba que aiña'choma coira'choma. ³⁰ Ña jimbi'teja re'riccoe an'bian'choma gi tsain'bitsse atapoen. Nane ña jisi tsu Na'su Chigaja ja'ño pan quema ñotsse tson'jen. Tsa'ma, ¿minga'ni gi tisumbetsseja semaña?

³¹ Labánjan ccase su:

—¿Mi'nge'tsse ña afepoeña qui in'jan?

Tsa'ma Jacobja su:

—Me'in, afepoeña'bi qui. Que ña in'janqquia'caen tsoñe in'jan'ninda gi ccase que ovejama coiraya. ³² Ja'ño antteja ña que oveja naccu'suma attufaeña. Nane pa'cco si'an oveja du'shuma gi attufaeña. Toya'caen pa'cco chivo du'shu ze'nzia, chhifama'qqe gi attufaeña. Tsendeccu tsu que ñanga afepoen'choya. ³³ Tsa'caen tsonsi jai'ngae jipa ña gana'choma atte'ta qui in'jaña ñajan cca'nambi'ma ñotsse tsonsi tsa'caen da'chove. Nane ña oveja

naccuni si'ambi, majan chivo naccu ze'nziambi, chhifambi'choa'qqe can'jen'da ccana'choya tsu.

³⁴—Que tsa'caen tsoñe su'choja ñotssi tsu—qquen Labánjan su.

³⁵ Tsequi a'tayi tiseja poiya'cco chivo quita'sye ze'nzia, chhifama'qqe attufaen. Tsa'caeni poiya'cco chivo pushema'qqe majan ze'nzia, chhifa, toya'caen majan re'ricco totoave an'bian'choma'qqe attufaen. Toya'caen poiya'cco oveja si'andecuma'qqe attufaemba tise dushundecunga afe cuintsu coira'je'faye.

³⁶ Tsa'caen tsonsi dushundecuja tsa oveja naccuma isupa Jacob can'jen'ttie tres a'ta pa'cco japa can'jen'fa.

Tsa'ma Jacobja Labán faesu ovejandecuma coirá canse. ³⁷ Tsa'caen cansepa álomo quini'jin'su ttemba, almendro quini'jin'su ttemba, toya'caen castaño quini'jin'su ttembama cha'ttupa re'riqui'ccoe qqe'sho cuintsu totoa si'an, totoa si'ame attiañe. ³⁸⁻³⁹ Tsa'caen qqe'shopa oveja naccu tsa'ccuma cui'je'ttinga ccutsutsian. Tse'ttinga tsa'ccuma cui'ye bopa tsu quita'syeja pushema tandange'je'cho. Tsa'caen tson'jemba tsa quini'cco ccutsian'choma attesi tsu tise du'shuja ze'nzia, chhifa, toya'caen pi'piave somboya qqen tsu in'jan'fa. ⁴⁰ Toya'caen tsu Labánbe oveja quita'syema cca'ttinga attufaen cuintsu Labán oveja pushendeccu Jacob quita'sye ze'nzia, tsambi'ta si'ani'ccuyi tandangeye. Tsa'caen tsu Jacobja Labán oveja naccu'suma tisu oveja naccuve attufaemba atapoen. ⁴¹ Toya'caen oveja ppu'chotssianaccu

tandange'je'fa'ninda Jacobja tsa qqe'sho'cho quini'ccoma tsa'ccuma cui'je'ttinga dyaiña cuintu tsa quini'ccoma atte'faye. ⁴² Tsa'ma cuñosinaccu tandange'je'fa'ninda tsa quini'ccoma dyaiñambi. Tsa'cansi tsu du'shu cuñosija Labánmbe tsa'ma du'shu ppu'chotssiaja Jacobmbe. ⁴³ Tsa'caen tsomba tsu Jacobja ñoa'me ricove dapa tsain'bio oveja, tsain'bio sema'su tsandiendeccu, pushesundeccoma'qqe, tsain'bio cameyo, toya'caen tsain'bio boroma'qqe an'bian.

31

Jacob Labánma catipa ja'cho

¹ Tsa'ma Jacobja tayo atesucho Labán dushundeccu tisene qqen su'choma: “Jacobja pa'cco ingi yayambema isupa tsai'ccu ricove da.” ² Toya'caen tsu Jacobja atesu Labán tayoe tisema in'janquia'caen in'jambipa chi'ga'chove. ³ Tsa'cansi Na'su Chigaja Jacobnga su: “Que yayandeccu andeni ccase jaja, que antiandeccu can'jeni. Ña gi fuitepa angaya.”

⁴ Tsama pañamba Jacobja manda cuintu Raquel, Leama'qqe ttu'sesi ji'faye tise ovejandeccu'ccu can'jen'cho potreroni.

⁵ Ji'fasi su:

—Tayo gi atesu que'i yaya tayoe ñama in'janquia'caen in'jambipa chi'ga'chove. Tsa'ma ña yayambe Chiga tsu anttembe'yi ñama fuite'je. ⁶ Que'i'qqe qui atesu'fa ñajan tisu osha'fanga que yayambe ñotsse sema'jen'chove. ⁷ Tsa'caen semasi tiseja ñama afopoemba tsu anttembe'yi ña afepoen'choma cambi'bian. Tsa'ma Chiga

Quitsaja se'pi cuintsu tise ñama egae tsoñe.
 8 Nane que'i yaya 'Ze'nzetssiai'ccu gi ñajan quenga afepoeña' qquen susi poiye'cco oveja tsu ze'nzetssia du'shuve isu'fa. Toya'caen 'Chhifai'ccu gi ñajan quenga afepoeña' qquen susi poiye'cco tsu chhifave isu'fa. 9 Tsa'caen tsu Chiga Quitsa tise'be'suma ñanga afe.

10 "Toya'caen fae a'ta ovejandeccu foña'jen'ni anamba gi qquen ayo'o: atte gi oveja quitsaye ze'nzia, chhifa, pi'piayi pushei'ccu tandange'je'choma. 11 Tsa'caen ayo'o'je'ni tsu Chigama sefacconi'su shondo'su ña inisei'ccu ñama ttu'se. Ttu'sesi gi su: 'Va'tti gi can'jen.' 12 Tsa'caen susi tsu Chigama shondo'suja su: 'Ñotsse cambia qui atteya poiye'cco oveja quitsaye pushei'ccu tandange'je'cho tsu ze'nzia, chhifa, toya'caen pi'piayi. Nane tayo gi atte pa'cco Labán quenga tson'choma. 13 Ña gi quenga Betelni attian'cho Chiga. Nane tzeni qui que asusupa ana'cho patuma ccutsiamba ñoa'me su'chove ñanga afa. Jangija, jinge jaye, quema isu'cho andeni.'-qquen tsu Chigama shondo'suja Chiga su'choma conda."

14 Tsa'caen susi pañamba Raquel, toya'caen Lea'qqe su'fa:

—Ingija jongoesu isuya'chove an'bian'fambi gi ingi yaya tsaoni. 15 Nane tiseja faesu ande'suma'caen ingima tsincon. Toya'caen ingima chavaemba que ingima pusheye afepoen'choma tise'yi isupa sefaen. 16 Tsa'cansi pa'cco ingi yaya an'bian'choma itsapa Chiga quenga afe'cho tsu ingimbe toya'caen ingi

dushundecumbe. Nane Chiga quenga tsa'caen su'choma pa'ccoma tsonjan.

Padan-aramne Jacob sombo'cho

17-18 Tsa'caen susi tse'i Jacobja ñoñañe ashaen tise yaya Isaac can'jen'cho ande Canaánni jaye. Nane tise dushundeccu, tise pushendeccum'a'qqe cameyondeccunga otsian pa'cco tise an'bian'choma'qqe. Tsa'caen tsomba tise aiña'chondeccu, Padan-aramni semamba gana'choma angaye ashaen. 19 Jacob tsa'caen jaye ashaenqui Labánjan biani can'jen tise oveja tosema chattu'su japa. Tsa'caen biani jacansi Raquelja tise yaya an'bian'cho ñoña'cho chigama cca'namba anga. 20 Tsa'caen tsu Jacobja arameo ande'su Labánja tisu jaya'choma condambe'yi ja. 21 Nane pa'cco tisu an'bian'choma a'tutsseyi anga. Junde tsu Eufrates Na'ema cca'ya isepa tansintsse Galaad ccotta'ccongá jaye ashaen'fa.

Labán Jacobma mandian'cho

22 Tres a'ta pasasi Labánjan in'jan Jacob ccuyapa ja'chove. 23 Tsomba tise antiandeccu'ccu sombopa mandiañe ashaemba siete a'ta pa'cco japa Galaad ccotta'ccongá nepi. 24 Tsa'ma tsequi cose Chigaja ayo'oni, Labán, tsa arameo'su a'inga at-tiamba su: “¡Injama'tse! Jacobma iyicca'yeye'tsse afajama.”

25 Jacob Galaad Ccotta'cconi toya can'jen'choma Labán nepipa cachui. Cachuipa Labán'qqe tise antiandeccu'ccu tse'ttini can'jen'fa. Tsa'caen can'jemba 26 Jacobma su:

—¿Jongoesie qui qqen tson? ¿Ma'caen qui ñama afopoemba ña onquengendeccum'a an'bian

geraemba indi'chondecuma'caen? ²⁷ ¿Jongoesie qui ñama afopoenqquia'caen condambe'yi a'tutsse vani ccuyin ji? Nane que qqen jiya'chove atesu'choecan'da gi avujatsse ccosha, gitarai'ccu jeñamba can moeñe'can. ²⁸ Toya'caen ña onquengendeccu ña jarichondecuma'qqe mochapa chigambiañe qui anttembi. Ñoa'me sumbia'caen qui tsincon. ²⁹ Nane ñoa'me gi ñajan que'ima egae tsoñe osha. Tsa'ma ja'ño cose tsu que yayambe Chiga ñama afapa qqen su: '¡Injama'tsel Jacobma iyicca'yeye'tsse afajama.' ³⁰ Tsa'ma pashaen tisu yayani jaye in'jamba jayi'a'qqe, ¿jongoesie qui ña chigandecuma cca'namba i?

³¹ Tsa'caen susi Jacobja Labánma su:

—Dyojopa gi a'tutsse sombo, que ñama fi'ttipa tisu onquengendecuma itsasa'ne. ³² Tsa'ma majan va'tti canjen'su que chigandecuma an'bian'da, ¡cuintu paja! Nane ingi antiandeccu tsu paña'jen'fa. ¡Tta'ttapa atteja jongoesu quembema ña an'bian'chove!

Tsa'ma Jacobja Raquel tsa chigandecuma cca'na'chove atesumbipa tsa'caen su.

³³ Tsonsi Labán Jacob carpa tsa'onga ca'nimba tse'ttieja Leambenga'qqe, toya'caen tsa dos sema'su pushesundecumbenga'qqe ca'nimba tta'tta'ma attembi. Lea carpa'ye sombopa Raquelmbenga ca'ni. ³⁴ Toya ca'nimbi'ta Raquelja tsa chigandecuma cameyonga ottaemba dyai'je'chombe tsosiccufa'su bosanga ppiñamba tsambe ombanga dyai. Labánjan tsa'caen ca'nimba pa'cco tsa'oma tta'tta'ma attembi.

³⁵ Tsonsi Raquelja su:

—Yaya, ñama iyicca'yejama que caña'jen'ni jangiye oshambi gi tisu ñotssimbipa.

Labán tsa'caen pa'cco ettima tta'tta nani'ma tisu chigandeccuve attembisi ³⁶ Jacobja iyicca'yepa su:

—¿Jongoesie gi egae tson'an? ¿Jongoesuma egae tsinconsi qui ñama mandiamba ji? ³⁷ Pa'cco ña an'bian'choma asitta'a'qqe, ¿jongoesu quembe ma qui atte? ¡Va'ttinga tsama ccuiñajan! Tsonsi que antiandeccu, ña antiandeccu'qqe tsu su'faya majan ingi ñotsse injienge'chove. ³⁸ Nane veinte canqqe'fa pa'cco quembe semamba ñotsse coirasi tsu majan ovejayi'qqe ni chivo pusheyi'qqe toya chu'ama cati'fambi. Ni fae oveja quitsayeveyi'qqe gi que oveja naccu'suma ambi. ³⁹ Ttesi ovejama fi'tti'ni'qqe queni imbi gi tsa pa'choma. Nane ñañi gi tsa qqe'chone afepoen. Toya'caen maqui cose maqui a'ta que oveja naccu'suma cca'na'fa'ni'qqe ñama qui tsane iñajan. ⁴⁰ A'taja coe'jenga gi pa'ma ccusha. Coseja chandi'supa gi pa'ma ccusha. Toya'caen anae'sui'ccu gi ata'je. ⁴¹ Nane veinte canqqe'fa pa'cco que tsaoni can'jensi qui tsa'caen ñanga tson. Catorce canqqe'fa pa'cco gi que onquengendeccune sema. Toya'caen seis canqqe'fa pa'cco que aiña'chondecuma coiraye semasi qui anttembe'yi ña afepoen'choma cambi'bian. ⁴² Nane Abraham Chiga, tsa ña yaya Isaac iñajan'jen'cho Chiga ñai'ccu can'jembiecan'da qui ñama itsapa me'ccoe moeñe'can. Tsa'ma Chiga tsu ña ñombi'ye'cho, ña ñotsse sema'choma'qqe attepa ja'ño cose quema tsa'caen iyu'u.

Jacob, Labáni'ccu injancco'fa'cho

⁴³ Tsa'caen susi Labánjan Jacobnga su:

—Pushesundeccuja ña onquengendeccu tsu. Dushundeccuja ña jarichondeccu tsu. Oveja'qqe ña ovejandeccu tsu. Nane pa'cco va'ttima atte'choja ñambeyi tsu. Tsa'ma, ¿ma'caen gi va ña onquengendeccu, tise'pa an'bian'cho dushundeccuma'qqe tsoña? ⁴⁴ Tsa'cansi jinge que ñai'ccu fae'ngae injanccoye tisupanaccui'ccu ingi'su ma'caen canseya'chove atesuye.

⁴⁵ Tsa'caen susi Jacobja patuma isupa tansintsse ccutsiamba ⁴⁶ tise antiandeccoma su:

—¡Patuma boña'faja!

Poiyi'cco tsu patuma fae'ttinga boñamba, tsa boña'cho pporotsse dyaipa an'fa. ⁴⁷ Labánjan tse'ttima inisian, tise aya'fangae, Jegar Sahaduta. Jacob'qqe, tisu aya'fangae, tse'ttima inisian Galaad.

⁴⁸ Tsa'caen tsomba Labánjan su:

—Ja'ñojan va patu boña'cho tsu ingi fae'ngae injancco'choma canjaeña.

Tsa'camba tsu Galaad qqwen va'ttija inisecho.

⁴⁹ Toya'caen tsu inisecho Mizpa, Labán qqwen su'ttipa:

—Nane Na'su Chiga tsu ingima caña'jeña ingi fae'ngae can'jembi'ni'qqe. ⁵⁰ Ña onquengendeccoma que egae tsincon'ninda, tsambi'ta faesu pushesundeccuma pushe'ñacca'ninda ingi'suja me'i'oña tsu tsane afaye. Tsa'ma Chigayi tsu tsane afaya.

⁵¹ Labán tsa'caen supa ti'tsse qqwen afa'je:

—Que canjan, va patu boña'cho, toya'caen patuma ingi ccutsian'cho ⁵² tsu poiyi'cco canjaen'faya ingi va'ttima panshansa'ne.

Nane que qui ñani panshamba ni ña gi queni panshamba iyiccoye osha'fambi. ⁵³ Chiga Quitsa, tsa que yaya ccashe'ye Abraham, ña yaya ccashe'ye Nacormbe Chiga tsu ingima camba ingi ma'caen tson'chone afaya.

Tsa'caen pañamba Jacobja, tise yaya Isaac iñajan'jen'cho Chiga paña'jen'ni tansintsse supa “Ñotssi tsu” qqwen afa. ⁵⁴ Tsa'caen tsomba Jacobja ccotta'conga ansundepa Chiganga afeya'choma oque o'raemba tise antiandecuma ttu'se cuintsu tseni an'faye. Ansundepa tseni amba cosesi tseniñi poi'cco ana'fa. ⁵⁵ Ccaqui a'ta sinte'yi Labánjan jangipa tise jarichondeccu, tise onquengendeccuma'qqe mochapa chigambiamba Chiga tise'panga ñotsse tsoña'chove afapa toequi tisu andeni ja.

32

Jacob Esaú'ccu cachuicco'cho

¹ Jacob ti'tsse tisu jayi'ningae jayi'ni Chigama sefacconi'su shondosundeccu tisema cachuiye sombo'fa. ² Jacobja tsendecuma attepa su: “Vandeccu tsu Chiga sefacconi'su sundarondeccu.” Tsa'caen supa tse'ttima inisian Mahanaim.

³ Jacobja condasundeccuma moe Edom ande'su Seir ccotta'cconi cuintsu Esaúma cachuipa conda'faye tise jiña'choma. ⁴ Esaúnga qqwen su'faya'chove condapa moe: “Que antian Jacobja quema shondo'su tsu. Ingima tsu quenga manda qqwen suye: Ñajan bo'tsse gi Labán tsaoni can'jemba ⁵ atapoemba an'bian tsain'bio vaura, boro, oveja, sema'su tsandiendeccu,

toya'caen sema'su pushesundecuma'qqe. Ña na'sunga gi tsa'caen su'faya'chove mandapa moe. Ronda'jeya gi que jisi mingae tsombe'yi avujatsse cachuiccoye.”

⁶ Tsa'caen susi ja'chondeccu toequi jipa Jacobnga su'fa:

—Que quindyá Esaúni ingi ja'fasi tsu ja'ño tiseja jiña cuatro ciento a'i tisema fuitesundecui'ccu.

⁷ Tsama pañamba Jacobja ñoa'me dyopa asi'ttaeñe ashaen. Asi'ttaemba dos naccuve a'i tse'tti sheque'choma attufaen. Toya'caen oveja, vaura, cameyoma'qqe tsa'caen attufaen. ⁸ Nane qqquen tsu in'jan: “Esaú jipa fae naccui'ccu iyiccopa patsu'ninda cuintsu faesu naccuja ccushaye.” ⁹ Tsa'caen tsomba Chigama iñajañe ashaemba qqquen su: “Na'su Chiga, ña yaya ccashe'ye Abraham, ña yaya Isaacmbe Chiga qui. Que qui ñama su ña toequi tisu andeni, tisu antiandecconi ja'ni'qqe queja ñama ñotsse tson'jeña. ¹⁰ Ñajan ñotssimbi'ma qui anttembe'yi ñama tsa'caen in'jamba ñotsse tson. Ñajan vane jayipa Jordán na'ema fae accuicco'choi'ccuyi gi ise'a. Tsa'ma ja'ñojan tsain'bio a'i dos naccuve gi an'bian. ¹¹ Chigáne ña antian Esaú fi'ttisa'ne ñama ccushaenjan. Ñoa'me gi dyojo tise jipa ingima patsupa pushesundeccu, dushundecuma'qqe fittittisa'ne. ¹² Que qui ñoa'me a'tatsse ñanga conda ñama ñotsse tsomba ña omba'su dushundecune'qqe tsain'bitsse atapa'faya marni'su sisipa sheque'choma agattoye oshambiqquia'cantsse.”

¹³ Tsequi cose Jacobja tse'ttingayi ana. Ana

a'tapa tise tse'tti an'bian'cho'suma tise quindya Esaúnga afeya'chove qquen isu: ¹⁴ dosciento chivo pushe, veinte chivo quitsaye, dosciento oveja pushe, veinte oveja quitsaye, ¹⁵ treinta cameyo pushe chochopa tise'pa dushundecui'ccu, cuarenta vaura pushe, diez vaura quitsaye, veinte boro pushe, toya'caen diez boro quitsaye. ¹⁶ Tsa'caen isupa tise'be semasundecunga attufaemba fa'enga fae naccu, faesunga tsa'caen afe'jepa su:

—Fae naccu faesu naccuma biaccaccatsse ñoñamba tsa'caen ña otufanga ja'faja.

¹⁷ Otufani ccutsuya'choma qquen manda:

—Ña quindya Esaú quenga nepipa qquen iñajampaña'ninda: '¿Majan tsu que na'su?' '¿Mani qui jayi?' toya'caen, '¿Majambe aiña'chondeccu tsu vaja?' —qquen iñajampaña'ninda ¹⁸ queja qquen suja: 'Vaja quema shondo'su Jacob quenga afeya'cho tsu, ña na'su Esaú. Tiseja ñoa'me tsu ingi sepaccofae jiña.'

¹⁹ Toya'caen sepaccofani ccutsuya'cho, vacca'tti ccutsuya'cho, nane poiya'cco afeye angasundecunga qquen su:

—Que'i'qqe Esaúma cachui'ta tsa'caeni supa ²⁰ toya'caen: 'Quema shondo'su Jacob ingi sepaccofae jiña' —qquen su'faja.

Nane Jacobja qquen asi'ttaemba tsa'caen tson: "Afe'choma otie moemba tise ñoquisi gi cambajunaccu tisei'ccu cachuiccoya. Isha tsu ña tsa'caen tsonsi ñama ñotsse tsona." ²¹ Tsa'caen asi'ttaemba afe'choma angasundecuma o'tie moe. Tsomba tiseja tse'ttingayi ana.

22 Tsequi cose'yi Jacobja jangipa tise dos pushe, tise dos sema'su pushesundeccu, tise once dushundeccui'ccu japa Jacob na'en'su sinjuncuma ise. 23 Pa'cco tise an'bian'choma'qqe fae'ngae isian. 24 Tsa'caen pa'ccoma isiamba tisuyi can'jen'ni fae tsandie, a'iacan'choa tisei'ccu iyiccoye ashaen a'tatsse. 25 Tsa'ma tsa a'i Jacobma patsuye oshambi qqen in'jamba Jacob tsimbochoccuma tssai. Tsa'caen tssaisi tsimbochoccu'su tsu'ttaja batti. 26 Tsa'caen tsomba tsa a'ija su:

—Antteja tayo tsu a'taye tson'jen.

—Que ñama ñotsse tsoña'chove afambi'ninda antteya'bi gi -qqen tsu su Jacobja.

27 Tsonsi a'ija ñajampaña:

—¿Jongoesu inise qui?

—Ña gi Jacob-qqen tsu su.

28 Tsa'caen susi a'ija su:

—Ti'tsse quema Jacob qqen afambipa Israel qqen tsu afa'faya. Nane queja Chigai'ccu, ain-deccui'ccu iyiccopa patsusi tsu tsa'caen quema afa'faya.

29 Tsonsi Jacobja ccane'qqe ñajampaña:

—Ja'ño condaja jongoesu inise qui queja.

Tsa'ma tsa a'ija su:

—¿Jongoesie qui ña iniseve ñajampaña?

Tsa'caen supa tsa a'ija tse'ttingayi Chiga tisema ñotsse tsoña'chove afa. 30 Afasi Jacobja: “Tayo Chigama cambajunaccu atte'ma gi toya canse”—qqen supa tse'ttima inisian Penuel.

31 Chiga sombo ji'ni Jacobja Penuelma panshamba tise tsimbochoccu ñesi ccaré

jaye. ³² Tsa'cansi tsu ja'ño'su israendeccu'qqe añ'a'cho'su tsimbochoccu'su tsain'fama añe osha'fambi, Chiga Jacobma tsesu'tte tssai'chosi.

33

Jacob, Esaú'ccu ñoquicco'fa'cho

¹ Jacobja Esaú cuatrociento a'i'ccu jiña'choma atepa tise du'shuma attufaen tise'pa maman-deccui'ccu, nane Lea, Raquel, toya'caen tsa dos sema'su pushesundecui'ccu. ² O'tie tsu dos sema'su pushesundecuma tise'pa dushundecui'ccu ccutsian. Tsendeccumbe sepaccofanga Leama tise dushundecui'ccu ccutsian. Tsutopani Raquelmajan tise du'shu Joséi'ccu ccutsian. ³ Tsa'caen tsomba tsendeccumbe otufanga japa siete se andenga puntssa'ñacca tise antianga catseye jayi. ⁴ Tsa'ma Esaúja Jacobma atepa buttoin jipa munsin ancamba mocha. Tsa'caen tsomba poi'cco fae'ngae i'na'fa. ⁵ I'na pasapa Esaúja pushesundeccu, dushundecuma'qqe atepa iñajampaña:

—Vandeccuja, ¿ma'candequua tsu?

Tsonsi Jacobja su:

—Chiga quema shondo'suma ñotsse in'jamba afe'cho dushundeccu tsu.

⁶ Tsonsi dos sema'su pushesundeccuja tise'pa dushundecui'ccu catsepa andenga puntssan'fa.

⁷ Omboe Leaja tise dushundecui'ccu catsepa tsa'caeñi puntssan'fa. Tsambe omboe José, tise mama Raqueli'ccu catsepa tsa'caeñi tson'fa.

⁸ Tse'faei'ccuyi Esaúja iñajampaña:

—¿Ma'caen tsoñe qui in'jan tsa tsain'bitssi nacuve ña jiñamba atte'choma?

Tsa'caen iñajampañasi Jacobja su:

—Tsata tsu que ñama ñotsse tsoñe afe'je'cho.

⁹ Tsa'ma Esaúja su:

—Me'in, ña antian, nanitsse gi ña'qqe an'bian.
Quembema queyi an'bianjan.

¹⁰ Tsa'ma Jacobja ccase su:

—Me'in, que ñama ñotsse in'jan'da, chigáne tsa afe'choma isuja. Nane que tayo ñama ñotsse chigambiamba in'jansi gi avujatsse Chigama ateqquia'caen quema atte. ¹¹ Tsa'cansi gi iñajan quenga afeye i'choma isuja. Nane Chiga tsu ñama ricove tsonsi gi osha'choma shacambitsse an'bian.

Tsain'bitsse tsa'caen iñajansi Esaúja tsa afe'choma in'jamba isu. ¹² Isupa su:

—Ñotssi tsu. Jinge va'ttie jaye. Ñajan quema o'tie gi jaya.

¹³ Tsa'ma Jacobja su:

—In'jan'cho antian, que'qqe qui atesu du'shuja oshaya'bi. Toya'caen oveja suri, vaura surimanda tsu in'jaña'cho. Nane quian'me anga'nijan junde tsu quimbipa fae a'tayi poiyo'cco oveja paya. ¹⁴ Bove ñotssi tsu queja injanga quema shondo'suma o'tie jaye. Tsonsi ñajan vasia've ma'caen ñama o'tie jayi'cho aiña'cho, toya'caen dushundeccu oshaqquia'caen jipa quema Seirni cachuiya.

¹⁵ Tsonsi Esaúja su:

—Ñotssi tsu. Tsa'ma antteja ñai'ccu ji'cho aindeccu'suma quenga catiye cuintsu quema fuite'faye.

Tsa'ma Jacobja su:

—Me'in, quema noñangiañe in'jambi gi.

¹⁶ Tsequi a'tayi Esaúja toequi Seirni ja. ¹⁷ Tsa'ma Jacobja Sucotni ja. Tse'ttinga tisumbe tsao'ñamba aiña'cho ttuccuve'qqe ñoña. Tsa'cansi tsu tse'ttima inisian Sucot.

¹⁸ Jacobja Padan-aramne sombopa quinsetssi mingae dambe'yi Canaán andeni nepipa Siquem canqqe pporotsse tise carpama ccutsian. ¹⁹ Nane cien corifin'di'ccu Hamor dutssiyendecuma andeve chava tseni tise carpama ccutsiañe. Siquem'qqe tsu Hamor dutssi'ye. ²⁰ Can'jemba tsu Chiganga afe'jeya'chove ñoñamba inisian El-Elohe-Israel.

34

Dinane Siquemdecuma fi'tti'cho

¹ Tsa'caen can'jemba, Dina, tsa Lea Jacobmbe isu'cho onque'ngeja tsa ande'su chu'a pushe-sundecuni pasia'su ja. ² Tsa'caen jasi Hamor dutssi'ye, Siquem, tisema atte. Tsa Hamorja, heveo'su a'i tsu tsa canqqe na'su. Siquemjan Dinama atepa cunshangopa indipa tisei'ccu ccuipa egae tson. ³ Tsa'ma tsa'caen tsomba Siquem ñoa'me Dinama ñotsse in'jamba osha'choma tson cuintsu ccane'qqe tise've in'jañe. ⁴ Taya'caen tise yaya Hamorma Siquemjan su:

—Tise yayanga japa iñajanjan. Va pushesuma gi pusheye in'jan.

⁵ Jacobja tayo tise onque'nge Dinama Siquem egae tson'chove atesu'ma afambi tise dutssiyendeccu ccani oveja coira'su japa can'jene jiya'ngae. ⁶ Tsa'caen can'jeni Siquem yaya Hamorja Jacobni ja tisei'ccu afaye.

⁷ Tsa'ma Jacob dutssiyendeccu tise'pa coiraye japa can'jene jipa tise antianma tson'choma atesupa ñombi'yepa ñoa'me iyicca'ye'fa. Nane Siquem tsa'caen Jacob onque'ngel'ccu ccuipa ñoa'me tsu Israel a'ima egae tson. Israendeccu'sumajan tsa'caen tson'masia tsu.

⁸ Tsa'ma Hamorja tsendeccui'ccu afapa su:

—Ña dutssi'ye Siquem tsu ñoa'me in'jan que'i antianma. Chigáne antte'faja cuintsu tisema tsa'nduye. ⁹ Tsa'caen tsomba ingi antiandeccuve da'faja. Tsonsi ingi'suja que'i onquengendecuma pushe'je'faye. Toya'caen que'i'qqe ingi'su onquengendecuma pushe'je'faya. ¹⁰ Ingi'ccu tsangae canse'faja. Pa'cco va ande tsu que'imbe. Vani can'jemba, chavaemba ganamba andema chava'faja.

¹¹ Toya'caen Siquem'qqe Dina yayanga, pushesu antiandecunga'qqe su:

—Chigáne ñama in'jamba que'i antianma ñanga afe'faja. Jongoesuve in'jamba ññajan'ninda gi afeya.

¹² Nane que'i ma'caen atesucho'choma ti'tsse ññajamba faesu afe'chove ññajan'ni'qqe gi tsa'caen afeya. Tsa'ma antte'faja cuintsu que'i antian ñama tsa'nduye.

¹³ Tsa'ma Siquem Dinama egae tson'chosi in'jamba Jacob dutssiyendeccuja Siquem, tise yaya Hamornga'qqe aqquia afopoemba ¹⁴ qqquen su'fa:

—Ñoa'me osha'fambi gi ingi antianma chhiyitevaembi'choa tsandienga antteye. Nane tsa'caen tsoñe tsu ingine'ja egae tsincon'cho.

¹⁵ Qquen tsoña'ccoyi tsu que ingi in'janqquia'caen

tsoña'cho poiyyi'cco que'i ingia'caeni daye. Nane poiyyi'cco que'i'su tsandindeccu tsu ingia'caen chhiyitevaenge'faya'cho. ¹⁶ Tsa'caen tson'da qui que'i'qqe ingi dushundeccuma pushe'faya. Toya'caen ingi'qqe que'i dushundeccuma pushe'faya. Tsomba gi que'iccu cansepa fae naccuve da'faya. ¹⁷ Tsa'ma ingi mandaqquia'caen chhiyitevaembian'da va'ttie sombopa gi ingi antianma'qqe ccani anga'faya.

¹⁸ Tsama pañamba Hamor, tise dutssi'ye Siquem tsa'caen tsoñe ñotssi qqen in'jan'fa. ¹⁹ Nane ti'tsse canjencambe'yi Siquemjan tsa'caen tsoñe ashaen Jacob onque'ngeme in'jamba. Siquemjan tise yaya dutssiyendeccu'su ti'tsse'tssiapa ²⁰ tise yaya Hamori'ccu canqqueni cani'jen'ttinga ja faengasundeccui'ccu condaseye. Japa qqen su:

²¹ –Va aindeccu ingi amigondeccupa tsu vani cansepa chavapa chavaen'jen'faya. Tsain'bio ande tsu jin cuintsu tsendeccu can'jensi ingija tise'pa dushundeccuma pusheye; toya'caen tise'pa'qqe ingi dushundeccuma pushe'faye. ²² Tsa'ma tsendeccu ingi'ccu cansepa fae naccuve daye in'jan'ninda ingi tise'pa suqquia'caen tsu tsoña'cho. Poiyyi'cco ingi'su tsandindeccu tsu tise'pa atesuqquia'caen chhiyitevaenge'faya'cho. ²³ Tsa'caen tson'ninda tsu pa'cco tise'pa an'bian'cho tise'pa aiña'cho'qqe ingimbeve'qqe daya. Tsa'cansi jinge tise'pa in'janqquia'caen tson'faye cuintsu ingi'ccu canse'faye.

²⁴ Hamor, tise dutssi'ye Siquem tsa'caen susi poiyyi'cco tsa canqque'su tsandindeccu tsa'caen in'jamba tsendeccu suqquia'caen

chhiyitevaenge'fa. ²⁵ Tsa'ma tres a'ta pasasi Jacob dutssiyendeccu, Simeón, toya'caen Leví, tsa Dina quindyandeccu tsu canqqueni ja'fa. Toya tsandiendeccu tise'pama chhiyitevaen'cho iñesi jangiye osha'fambisi matichi'ccu poiye'cco tsendeccuma fittitti'fa. ²⁶ Nane matichi'ccu Hamor, tise dutssi'ye Siquema'qqe fi'ttipa Dinama Siquem tsa'o'ye somboemba anga'fa.

²⁷ Tsonsi Jacob faesu dutssiyendeccu'qqe tseni nepipa pa'chondeccu ai'voma panshamba pa'cco tsa canqqueni jincho'choma cca'namba somboen'fa. Tise'pa antianma egae tson'chone tsu ccane'qqe tsa'caen tson'fa. ²⁸ Toya'caen oveja, vaura, boro, pa'cco tsa canqqueni jincho, potreroni can'jen'chondeccuma'qqe anga'fa. ²⁹ Nane pa'cco tsaoni bare'cho jinchoma somboemba pa'cco dushundeccu, pushesundeccuma'qqe indipa anga'fa. ³⁰ Tsa'caen tson'fasi Jacobja Simeón, Levíma su:

—Que'ija tsa'caen tsomba qui tayo ñama daño'fa. Ja'ño tsu va andeni canjensundeccu, tsa cananeondeccu, ferezeondeccu'qqe ñama chi'ga'faya. Tsa'caen chi'gapa tisupanaccu bopa ñai'ccu iyiccoye ashaen'faya. Ñajan tsain'bitssi a'ive an'biambisi tsu ñama fi'ttipa poiye'cco ñai'ccu canjensundeccuma fi'tti'faya.

³¹ Tsa'ma dutssiyendeccuja su'fa:

—¿Ñotssi ti tiseja ingi antianma tsa'caen tisu ai'voi'ccu gana'su pushesuma'caen tsoñe?

35

Chiga Betelni afa'cho

¹ Chiga Jacobma su: “Jangipa Betelni japa tseni canseja. Tseni japa Chiganga afe'je'chove ñoñajan. Nane que antian Esauma dyopa ccuyapa jayisi quenga attian'cho Chiganga afe'je'chove ñoñajan.”

² Tsa'caen susi pañamba Jacobja tisu antiandeccu toya'caen poiya'cco tise ma fuitesundeccum'a'qqe qqen afa:

—Pa'cco que'i an'bian'cho faesu chigama somboemba catipa tisupa'qqe onjomba faesu giya'tssiama ondiccu'faja. ³ Junde tsu Betelni jaya'cho. Tseni japa gi Chiganga afe'je'chove ñoñamba ña vana'jensi fuite'su Chigama iñajaña. Nane tise tsu ña mani jacan'ni'qqe ñama fuitepa angacan.

⁴ Tsensi poiya'cco tise'pa an'bian'cho faesu chigama Jacobnga afe'fa. Toya'caen tise'pa sasiyoma'qqe Jacobnga afesi tiseja pa'ccoma isupa pa'cco tsama a'tu Siquem canqqe pporotssi'su roble quini'jin tsoiccunga. ⁵ Tsa'caen a'tupa tsa canqqe'ye sombo'fasi Chigaja poiya'cco tse'tti pporotsse canjensundeccum'a dyo'faya'chove in'jaen cuintsu Jacob dushundeccum'a mandiambe can'faye.

⁶ Jacob toya'caen poiya'cco tisei'ccu jasundeccu Luz canqqeni nepi'fa. Tsa canqqeyi tsu Betel qqen inisecho'cho, Canaán ande'su. ⁷ Tseni nepipa Chiganga afe'je'chove ñoñamba tse'ttima inisian El-betel. Nane tise antianma dyopa jayisi Chiga tse'ttinga attian'chosi tsu tsa'caen inisian. ⁸ Toya'caen tse'ttinga tsu Rebecama coira'su pushesu, Débora'qqe pa. Pasi Betel pporotssi'su roble

quini'jin tsosiccunga a'tu'fa'cho. Jacobja tse'ttima inisian “Roble quini'jin inamba'tti.”

⁹ Tsa'caen Jacob Padan-aramne sombopa tseni jisi Chigaja ccase tisenga attiamba tisenga ñotsse tsoña'chove ¹⁰ qqwen afa:

“Queta qui Jacob ‘A'tutsse afopoen'su’ qqwen su'cho.

Tsa'ma ja'ñojan ti'tsse tsesuya'bi qui.

Ja'ño a'ta ashaemba tsangae qui Israelve daya ‘Chigai'ccu iyicco'su’ qqwen su'chove.”

Tsa'caen tise inisema cambiamba Chigaja ¹¹ ti'tsse qqwen su:

“Ña gi Osha'choma Oshacho'cho Chiga.

Tsain'bitssi du'shuve an'biamba qui omba'su dushundecuve'qqe tsain'bitsse at-apaja.

Nane que'ye tsu tsain'bio aindecuve sombopa fae naccuve da'faya.

Tsa que omba'su dutssiyendeccu'su tsu nasundecuve da'faya.

¹² Va ande tayo Abraham Isaacnga afe'cho andeveyi gi quenga'qqe afeya.

Toya'caen gi que omba'su dutssiyendecunga'qqe afeya.”

¹³ Jacobi'ccu afa nanimba Chiga tsse'ttie jasi,

¹⁴ Jacobja patuma isupa tansintsse ccutsian tsa Chiga tisei'ccu afapa ja'ttinga. Tsomba aseite, vi-noi'ccu patunga fiñamba fetipa ¹⁵ tse'ttima inisian Betel.

Raquel pa'cho

16 Can'jemba Betelne sombo'fa Efratani jaye. Tsa'ma toya Efratani nepimbi'te Raquel du'shuma isuya'cho nepi. Nane ñoa'me vanamba isu. 17 Nane ñoa'me vana'jensi tisema fuite'suja su: “Dyombe canjan. Faesu tsandie du'shuve qui isu.” 18 Tsama pañamba Raquelja ñoa'me paye tson'jemba du'shuma inisian Benoni “Ña vana'cho du'shu” qqquen suye. Tsa'ma tise yaya Jacobja tisema inisian Benjamín “Ña tansinfa'su du'shu” qqquen suye.

19 Tsa'caen Raquel pasi Efrata'su tsaiquina a'tu'fa. Tsa tsu ja'ñojan Belén. 20 Tsa'caen a'tupa Jacobja pa'choma injan'jeña'cho patuve tsa atu'ttinga ñoña. Tsa ñoña'cho tsu ja'ño pán Raquelma atu'ttive canjaen'jen.

21 Israelja tisu jayi'ningae japa Edar'su ccotta'ccoma pashamba tse'ttinga canqquian. 22 Tsa'caen Israel tse'ttini canqquiamba can'jensi Rubénjan tise yaya ambian'cho pushesu Bilhai'ccu ccuipa egae tson. Tsa'caen tson'choma pañamba Israelja ñoa'me iyicca'ye.

Jacob dutssiyendeccu

Jacob dutssiyendeccu tsu doce tsandie du'shu. 23 Leanga du'sian'cho tsu aisheja Rubén, tse'ttija Simeón, Leví, Judá, Isacar toya'caen Zabulón. 24 Raquelnga du'sian'cho tsu José toya'caen Benjamín. 25 Raquelmbe sema'su pushesu Bilhanga du'sian'cho tsu Dan toya'caen Neftalí. 26 Toya'caen Leambe sema'su pushesu Zilpanga du'sian'cho tsu Gad toya'caen Aser. Vandeccu tsu Jacob dutssiyendeccu Padan-aram andeni isu'cho.

Isaac pa'cho

²⁷ Jacobja tise yaya Isaacma can'su ja Mamre canqqueni. Tsayi tsu inisecho'cho Arba, toya'caen Hebrón. Tse'tti tsu Abraham'ye Isaac'qqe can'jemba'tti. ²⁸ Isaacja ciento ochenta canqque'fave an'biamba coenza ccashe'yeye dapa pa. ²⁹ Papa tise tayopi'su coenzandecchu Chiga sefacco can'jeni ja. Tsa'caen pasi tise dushundecchu Esaú toya'caen Jacob tisema a'tu'fa.

36*Esaú omba'su dushundecchu*

¹ Vandecchu tsu Esaú omba'su dushundecchu. Nane Esaú faesu inise tsu Edom. ² Esaúja Canaán ande'su pushesundeccoma pushe. Fae'cco tsu hitita'su a'i Elón onque'nge Ada. Faesu tsu Aholibama. Tsa tsu heveo'su a'i Zibeon dutssi'ye Aná onque'nge. ³ Toya'caen faesu tsu Ismael onque'nge Basemat. Tsaja Nebaiot antian. ⁴ Adanga Esaú du'sian'cho tsu Elifaz. Basematnga du'sian'cho tsu Reuel. ⁵ Toya'caen Aholibamanga du'sian'cho tsu Jeús, Jaalam toya'caen Coré. Vandecchu tsu Esaú toya Canaán andeni can'jeinte du'sian'chondeccu.

⁶ Esaúja tise antian Jacob'ye joqqutssiye in'jamba poiyo'cco tise pushendecchu, tise dutssiyendecchu, onquengendecchu toya'caen poiyo'cco tisei'ccu canjensundeccoma'qqe ccani anga. Pa'cco tise Canaán andeni can'jemba gana'cho toya'caen tise atapoen'cho aiña'choma'qqe anga. ⁷ Nane dos tsa'caen tsain'bitsse an'biamba osha'fambi fae'tti can'jeñe. Toya'caen tise'pa can'jen'cho ande'qqe poimbe

aiña'chondecu an'jeña'chove nepimbi. ⁸ Tsa'cansi Esaú, tsa Edomjan, ccotta'cco'su Seir andeni canseye ja.

⁹ Vandeccu tsu Esaú omba'su dushundeccu ccotta'cco'su Seir andeni cansesundeccu. Esaú omba'su dushundeccum tsu inisian'fa edomitandeccuve. ¹⁰ Va tsu Esaú dutssiyendeccu inise: Tise pushe Ada du'shu, Elifaz; tise pushe Basemat du'shu, Reuel. ¹¹ Elifaz dushundeccu tsu Temán, Omar, Zefo, Gatam toya'caen Cenaz. ¹² Toya'caen Elifaz tise ambian'cho Timnanga du'sian'cho tsu Amalec. Vandeccu tsu Esaú pushe Adambe omba'su dushundeccu. ¹³ Reuel dushundeccu tsu Nahat, Zera, Sama toya'caen Miza. Vandeccu tsu Esaú faesu pushe Basemat omba'su dushundeccu. ¹⁴ Toya'caen Esaú faesu pushe Aholibama dushundeccu inise tsu Jeús, Jaalam toya'caen Coré. Aholibama tsu Zibeón dutssi'ye Aná onque'nge.

¹⁵ Esaú omba'su dutssiyendeccumbe nasundeccu tsu qqen: Esaú dutssi'ye coenza Elifaz dutssiyendeccumbe nasundeccu tsu Temán, Omar, Zefo, Cenaz, ¹⁶ Coré, Gatam toya'caen Amalec. Tsendeccu tsu Elifaz dutssiyendeccu, Edom andeni'su nasundeccu. Poiyi'cco tsu Esaú pushe Ada omba'su dushundeccu. ¹⁷ Esaú dutssi'ye Reuel dutssiyendeccumbe nasundeccu tsu Nahat, Zera, Sama toya'caen Miza. Tsendeccu tsu Reuel dutssiyendeccu, Edom andeni'su nasundeccu. Poiyi'cco tsa Esaú pushe Basemat omba'su dushundeccu. ¹⁸ Toya'caen Esaú pushe Aholibama, tsa Aná onque'nge dushundeccumbe nasundeccu tsu Jeús, Jaalam toya'caen Coré.

19 Poiyi'cco tsendeccu tsu Esaú, tsa Edom, aindeccu'su nasundeccu.

20 Horeo'su Seir aindeccu tseni canjensundeccu tsu Lotán, Sobal, Zibeón, Aná, 21 Disón, Ezer toya'caen Disán. Vandeccu tsu horeo'su nasundeccu, tsa Edom ande'su Seir omba'su dushundeccu. 22 Lotán dushundeccu tsu Hori toya'caen Hemam. Lotán que'tte tsu Timna. 23 Sobal dushundeccu tsu Alván, Nanahat, Ebal, Sefo toya'caen Onam. 24 Zibeón dutssiyendeccu tsu Aja toya'caen Aná. Tsa Aná tsu tise yaya Zibeón borondeccuma a'i menia coira'jepa tsa'ccu sombo'ttima atte'su. 25 Aná dutssi'ye tsu Disón, tise onque'ngeja Aholibama. 26 Disón dutssiyendeccu tsu Hemdán, Esbán, Itrán toya'caen Querán. 27 Ezer dutssiyendeccu tsu Bilhán, Zaaván toya'caen Acán. 28 Disán dutssiyendeccu tsu Uz toya'caen Arán.

29 Horeondeccu'su nasundeccu tsu Lotar, Sabal, Zibeón, Aná, 30 Disón, Ezer toya'caen Disán. Tsendeccu tsu Seir andeni canjen'su Horeo antiandeccu'su nasundeccu.

31 Israendeccu toya na'suve ccutsiambi'te tsu vandeccuja Edom ande'su nasundeccuve dapa manda'fa. 32 O'tie tsu Beor dutssi'ye Belaja Edom na'su. Tise canqque tsu Dinaba qqen inisecho'cho. 33 Bela pasi tsu Bosra canqque'su Zera dutssi'ye Jobabja na'suve da. 34 Jobab pasi Temán ande'su Husam na'suve da. 35 Husam pasi Bedad dutssi'ye Hadad na'suve da. Tiseja Moabni japa Madián aindecuma patsu'su. Tise canqque tsu Avit qqen inisecho'cho. 36 Hadad pasi Masreca canqque'su Samla na'suve da. 37 Samla pasi Rehobot canqque'su Saúl na'suve da. Tsa Rehobot

canqqe tsu na'en otafari. ³⁸ Saúl pasi Acbor dutssi'ye Baal-hanán tsu na'suve da. ³⁹ Baal-hanán pasi Pau canqqe'su Hadadja na'suve da. Tise pushe tsu Mehetabel, tsa Mezaab dutssi'ye Matred onque'nge.

⁴⁰ Vandeccu tsu Esaú dutssiyendeccu'su antian-deccumbe inise. Nane tise'pa inise tsu tise'pa canqqe inise toya'caen tise'pa aindecumbe inise: Timna, Alva, Jetet, ⁴¹ Aholibama, Ela, Pinón, ⁴² Cenaz, Temán, Mibzar, ⁴³ Magdiel toya'caen Iram. Esaú faesu inise tsu Edom. Tsendeccu tsu Edom'su nasundeccu. Tise'pa can'jen'cho ande tsu tise'pa inisingae inisian'cho.

37

¹ Jacobja tise yaya canse'pani'su Canaán andeni canse. ² Jacob dutssiyendecune condase'cho tsu qqen:

José quindyandecui'ccu canse'cho

Joséja diez y siete canqqe'fave an'biamba tise yaya ambian'chondeccu isu'cho dushundecui'ccu fae'ngae ovejama coira'je. Nane Bilha dutssiyendeccu, Zilpa dutssiyendecui'ccu coira'jepa tsendeccu egae tsincon'choma Joséja tise yayanga conda'je.

³ Israelja poi'yi'cco faesu tise dushundecuma ti'tsse tsu Joséma in'jan nane tise coenza ccashe'yeve dasi isu'chosi. Tsa'camba ñotssia ondiccu'jeve tise'be anchon. ⁴ Tsa'ma tise quindyandecuja tise'pama ti'tsse tise yaya Joséma in'jansi attepa tisupa antianma chi'gaye ashaemba ni chigambian'boeyi'qqe chigambian'jen'fambi.

⁵ Fae cose Joséja ayo'opa tise quindyandecunga condase. Tsa'ma tsendecuja ti'tsse tisema chi'ga'fa ⁶ qquen condasesi pañamba:

—Paña'faja ña tisu ayo'o'choma que'inga condasesi. ⁷ Poiyi'cco gi nasipani sema'jemba trigoma taipa tandan'jen'fa. Tse'faei'ccuyi tsu ña tandan'choja jangipa na'sia'caen tansintsse ccutsu. Tsa'ma que'i tandan'choja ñambenga shoquendi'e ccutsupa utu'ccoandeqquia'caen ñambenga puntssan'fa.

⁸ Tsa'caen susi tise quindyandecuja su'fa:

—¿Ingi na'suve dapa ingima mandaya qquen ti qui in'jan?

Tsa'caen supa ti'tsse tisema chi'ga'fa. Nane tise tsa'caen ayo'opa toya'caen patsuqquia'caen dyombe tsama condasesi tsu ti'tsse tisema chi'ga'fa.

⁹ Can'jemba Joséja ccase ayo'opa tsama'qqe tise antiandecunga qquen condase:

—¿Atesu'fa ti qui ccase gi ayo'o? Nane coejechiga, cose'suchiga, toya'caen once o'fe'qqe ñanga puntssan'fa.

¹⁰ José tsa'caen tise quindyandecunga, tise yayanga'qqe condasesi pañamba tise yayaja iyu'upa qquen su:

—¿Jongoesune qui tsa'caen ayo'o? ¿Tsui'da ti gi que mama, que antiandeccu, ña'qqe quenga puntssan'faya?

¹¹ Tise quindyandecuja tisupa injamáchoni tisema ti'tsse se'pi'fa. Tsa'ma tise yayaja tsa ayo'o'chone tsain'bitsse asi'ttaen.

Joséma chavaen'cho

¹² José quindyandeccuja Siquemni ja'fa tise yaya ovejandeccumbe shoshovive ttatta'su.

¹³ Tsa'caen japa canjen'fasi Israelja Joséma su:

—Que canjan, que quindyandeccuta tsu Siquemni oveja coira'su japa can'jen'fa. In'jan gi que japa can'gaye.

Joséja su:

—Ju, avujatsse gi jaya.

¹⁴ Tsonsi Israelja su:

—Ñotssi tsu. Japa que quindyandeccumma attepa ovejandeccumma'qqe attepa ñani jipa condaja.

Israel Hebron'su sinjunccuni can'jemba mandasi Joséja japa Siquemni nepipa ¹⁵ quindyandeccumma attembipa injanga tta'ttá jacan. Tsa'caen injanga jacan'ni fae a'i tisema cachuipa iñajampaña:

—¿Jongoesuve qui ttattacan?

¹⁶ Joséja su:

—Ña quindyandeccuve gi ttattacan. ¿Queta ti qui condaye osha mani tise'pa ovejama coira'je'chove?

¹⁷ Tsonsi a'ija su:

—Tayo tsu va'ttie ja'fa. Paña gi “Dotánni jayi” qqen su'fa'choma.

Tsa'caen susi Joséja tta'tta japa Dotánni tise quindyandeccumma cachui. ¹⁸ Tsendeccuja toya biane jiña'choma attepa toya tise catsembi'te tisema fi'ttiya'chove in'jamba ñoña'fa. ¹⁹ Nane tisupanaccu qqen afacco'fa:

—Que can'faja, ijovoe tsu ayo'suja jiña! ²⁰ Tise jisi jinge fi'ttiye. Fi'ttipa tise ai'voma posonga ttova catipa ‘Ttesi an’ qqen jinge su'faye. Tsa'caen

tsomba jinge atesuye tise ayo'opa ma'caen da've'se.

²¹ Tsa'caen su'fasi pañamba Rubénjan tise quinshinma ccushaeñe in'jamba qqen su:

—Jinge fi'ttimbe can'faye. ²² Ni tise anjam-pama tssañambe can'faye. Va a'i menia jincho posonga amppian moe'faja. Tsa'ma tisema mingae tsombe'yi can'faja.

Rubénjan tise quinshin Joséma ccushaemba toequi tise yayani moeñe in'jamba tsa'caen su. ²³ Tsa'ma José tise quindyandecunga nepisi tsendecuja tise ñotssia ondiccu'jema oshichhaemba ²⁴ indipa tsa'ccu me'choa posonga tisema amppian moe'fa. ²⁵ Omboe (Rubén ccani jasi) tsa poso jin'ttinga aña dyai'fa.

Tsa'caen an dyaipa cameyondeccu jiña'choma atte'fa. Nane tsa ismaelitandeccu tsu tise'pa cameyonga ñome'ba, balsa'mo seje'pa toya'caen mirra seje'pama'qqe Galaad andene iña'fa Egipto andeni angaye. ²⁶ Tsama atepa Judája tise antian-deccunga su:

—¿Jongoesuma gi gana'faya ingi antianma fi'ttipa tise pa'chone a'tie'an'qqe? ²⁷ Nane bove ñotssi tsu fi'ttimbe'yi jova ismaelitandecunga chavaeñe. Nane ñoa'me ingi antian tsu.

Tsa'caen susi tise antiandeccu'qqe Judá in'janqquia'caen fae'ngae in'jan'fa. ²⁸ Tsa'caen in'jamba tsangae madianita'su chavaensundeccu jiña'fasi José quindyandecuja Joséma poso'ye somboemba chavaen'fa tsa ismaelitandecunga veinte totoacori corifin'dive. Tsa'caen chavaen'fasi Joséma Egiptoni anga'fa.

²⁹ Tsa'caen tson'fa'chove atesumbipa Rubénjan toequi posoni jipa Joséve attembipa tise ondiccu'jema chitta tisu ñombi'ye'choma canjaeñe.
³⁰ Tsa'caen tsomba tise antiandeccuni jipa qquen su:

—Tsa du'shuveja me'i'on tsu. Ja'ñojan, ¿ma'caen gi tsoña?

³¹ Tsa'caen susi tisenga condapa José ondiccu'jema isupa tisupa fi'tti'cho chivo anjampai'ccu ondiccu'jema onjoen'fa.
³² Onjoemba tise yayani moe'fa qquen su'choi'ccu: “Vaveyi gi atte'fa. Ñotsse cambia in'janjan, ¿vata ti que du'shu José ondiccu'jembi?”

³³ Jacobni nepisi tsama atepa su: “Ju, ña du'shu ondiccu'je tsu. Nane ttesi tsu tisema fi'ttipa an.”
³⁴ Tsa'caen supa Jacobja tisu ondiccu'jema chittapa pasi ñombi'ye'choma canjaenqqe'su ondiccu'jema ondiccu. Tsa'caen ondiccupa tsain'bio a'ta tise dutssi'ye pa'chone inambani canse.
³⁵ Inambani cansesi tise dutssiyendeccu onquengendeccu'qqe tisema ziyaemba vuiquiañe in'jan'fa. Tsa'ma tiseja tsa'caen vuiquian'faya'chove in'jambipa tise dutssi'yene ina'jemba qquen su: “Papa pa'chondeccu can'jeni japa tisei'ccu cachuiccoya'ngae gi qquen ñombi'yepa inambani canseya.”

³⁶ Egiptoni japa madianitandeccuja Potifarnga Joséma chavaen'fa. Nane Potifarja Egipto'su na'su faraónma shondo'su tsu. Na'su faraóni'ccu pporotsse ccutsu'su sundarondeccumbe capitán tsu.

38

Judá Tamari'ccu tson'cho

¹ Tseite Judája tise antiandeccu'ye joqquitssipa Adulam canqqe'su a'i Hira tsaoni can'jen. ² Tseni can'jemba cananeo'su a'i Súa onque'ngema atepa tsama pushe. Tisei'ccu can'jensi ³ surie dapa tsandie du'shuve isusi tsa du'shuma inisian Er. ⁴ Can'jemba ccase surie dapa faesu tsandie du'shuve isusi tsa du'shuma inisian Onán. ⁵ Toya'caen ccase faesu tsandie du'shuve isusi tisema inisian Sela. Nane Judá Quezibni can'jen'ni tsu Selama isu.

⁶ Dutssi'ye coenza Er coensi Judája fae pushesu Tamarnga tisema antte. ⁷ Tsa'ma Na'su Chigaja Er egae tsincomba cansesi chi'gapa tisema fi'tti. ⁸ Er pasi tise yaya Judája Onánma su:

—Que quindya'ye pa'nijan tsa panjen'choma pushepa du'sianjan cuintsu que quindya'ye'qqe omba'su dushundeccuve an'biañe.

⁹ Tsa'ma Onánjan du'siansi tsa du'shuja tise'beya'bi qqen in'jan. Tsa'caen in'jamba ñoa'me du'siañe in'jambipa aqquia tsincon tise du'siansi tise quindya'yembe omba'su dushundeccuve sombosa'ne. ¹⁰ Tsa'caen tsinconsi Na'su Chigaja tise tsincon'choma chi'gapa Onánma'qqe fi'tti. ¹¹ Tsonsi Judája tise china Tamarma su:

—Panjen'choyi canseja que yaya tsaoni ña dutssi'ye Sela coenzave dasi tisema afeya'ngae.

Nane Judája Sela'qqe tise quindyande-qquia'caen paya qqen in'jamba tsa'caen su. Tsa'caen susi Tamarja tise yaya tsaoni can'jeñe ja.

12 Tsa'caen jasi can'jemba Judá pushe, tsa Súa onque'ngeja pa. Tise pushe pasi ñombi'ye'choma pasapa Judája Timnat canqqueni ja tise ovejandeccu tosema chattujeni. Adulamita'su a'i Hira'qqe tise amigopa tisei'ccu fae'ngae ja. 13 Tamarja tise quitsa ccashe'ye Timnatni tise ovejandeccu tosema chatu'su jayi qqquen pañamba 14 panjen'chove canjaeñe ondiccucho'choma oshichhapa tisu cambiajuma oppoen cuintsu majañi'qqe tise've attembe can'faye. Tsa'caen oppoemba japa Enaim canqqueni cani'jen'tti dyai, Timnatni ja'je'cho tsaiquini. Nane tayo Sela coenzave dasi tise yaya tisenga afembisi tsu tsa'caen tson.

15 Judája tsangaé panshaenjimba tsa pushesuma attepa in'jan tisu ai'voi'ccu gana'su pushesu qqquen. Nane tsa pushesuja tisu cambiajuma picco'chosi tsu tsa'caen in'jan. 16 Tsa'caen in'jamba tsaiqui utufa'ye tsa pushesunga catseye ja, tsa pushesuja tise china qqquen atesumbipa. Catsepa su:

—¿Antte ti qui ña quei'ccu ccuiye?

Pushesuja su:

—Ñai'ccu ccui'ta, ¿jongoesuma qui ñanga afeya?

17 Tsonsi Judája su:

—Ña chivo naccu'suma gi fae'ccoe afeya.

Tsonsi pushesuja su:

—Ñotssi tsu. Tsa'ma, jongoesu quembema ñanga afeja que chivoma moeña'ngae ña an'biañe.

18-19 Tsonsi Judá iñajampaña:

—¿Jongoesu ñambema quenga catiye qui in'jan?

Pushesuja su:

—Que pisa tevaen'jen'choma tise andu'fai'ccu, toya'caen que accuicco'choma'qqe ñanga afeja.

Tsa'caen susi Judája tsesuma afepa tisei'ccu ccuipa jasi Tamarja toequi tise yaya tsaoni japa tisu oppoen'choma fettapa panjen'cho ondiccucho'choma ccase ondiccu. Can'jemba surie da.

²⁰ Omboe Judája tise amigo adulamitanga chivoma moe cuintsu pushesunga angapa afesi ccane'qqe tise afe'choma toequi moeñe. Tsa'ma tise amigoja japa tsa pushesuve attembi.

²¹ Attembipa tseni'su tsandiendecuma qqen iñajampaña:

—¿Mani tsu tsa Enaini'su pushesu, tisu ai'voi'ccu gana'suja can'jen, tsa tsaiqui utufani dyai'su?

Tsa'ma tsendecuja su'fa:

—Va canqquenija ni fae tisu ai'voi'ccu gana'su pushesuyi'qqe can'jen'fambi.

²² Tsa'caen su'fasi toequi Judá can'jeni jipa su:

—Attembi gi tsa pushesuve. Toya'caen tseni'su tsandiendecuja su'fa tsenijan tsesu pushesu can'jen'fambi.

²³ Tsonsi Judája su:

—Cuintsu tsa osha'cho ñambeja tsangae nepija aindecu pañamba ingi'ccu feña'fasa'ne. Ñoa'metsse tisenga afeya gi ñajan chivoma moe'ma qui tisema attembi.

²⁴ Tres ccovu pasasi Judánga jipa conda'fa:

—Tamar, tsa que china, tsu faesu tsandiei'ccu ccuipa ja'ñojan surie dapa can'jen.

Pañamba Judája fundopa su:

—¡Tsa'o'ye somboemba tisema oque cati'faja!

²⁵ Tsa'ma tisema oqueye somboenjin'fasi Tamarja tise quitsa ccashe'yeye aya'fae moe: “Va osha'chombe na'su tsu ñamajan surive tson. Ñotsse camba atesuja majambe tsu va pisa tevaen'jen'cho tise andu'fai'ccu toya'caen va accuicco'choja.”

²⁶ Judája tsama attepa tise'be qqen atesupa su: “Va pushesuja ñotsse tsu tson. Tsa'ma ña gi egae tson. Nane ña dutssi'ye Selama tisenga afembisi tsu tsa'caen tson.” Tsa'caen supa ni minga'ni'qqe ccase tisei'ccu tsa'caen cansembi.

²⁷ Isuya'cho a'ta nepisi Tamarja dos du'shuve isu. ²⁸ Ñoa'me isu'jequi fae du'shuja tiveyi sombo. Sombosi isian'suja iro cu'ai'ccu du'shu tivema tandamba su: “Va tsu o'tie sombo'cho.” ²⁹ Tsa'ma tse'faei'ccuyi tsa du'shuja tise tivema toequi zuña. Tsa'caen zuñasi faesu du'shuja ñoa'me sombo. Tsa'cansi tsu fuite'suja “¿Ma'caen qui pashamba ji?” qqen supa Faresve inisian. ³⁰ Omboe faesu du'shuja sombo, tsa cu'a iroi'ccu tivema tandan'cho. Tsama inisian Zara.

39

Potifar pushe Joséma tson'cho

¹ Ismaelitandeccu Joséma Egiptoni anga'fasi Egipto'su na'su faraónma shondo'su, Potifarja tisema chava. Tsa Potifar tsu na'su faraóni'ccu pporotsse ccutsu'su sundarondeccumbe capitán.

² Tsa'ma Na'su Chiga Joséi'ccu can'jensi tisema chava'su Egipto'sumbe tsaoni can'jen'an'qqe ñotsse'yi can'jen. ³ Nane tise na'suja Na'su Chiga Joséni can'jensi pa'cco José tson'cho ñotsse sombosi atte.

⁴ Tsa'caen attepa Joséma ñotsse in'jamba tisema fuite'suve tsomba tise

tsa'o na'suve'qqe tson. Tsa'o na'suve tsomba pa'cco tisu an'bian'choma tisenga antte cuintsu mandaye. ⁵ Tsa'caen Joséma tsa'o na'suve tsomba pa'cco tisu an'bian'choma tisenga anttesi tsequi a'ta Na'su Chiga'qqe Potifarma ñotsse tsoñe ashaen. Nane tise tsa'o'su, tise nasipa'suma'qqe ñotsse tsoñe ashaen. ⁶ José tsa'caen pa'cco tise'bema ñotsse manda'jesi Potifarja jo'su añeñi jipa an'jen.

Joséja quinsetssipa me'detssia a'i. ⁷ Tsa'caen bo'tsse can'jensi tise na'su pushe tisema cambia in'jan. In'jamba fae a'ta tisema su:

—Ñai'ccu ccuija.

⁸ Tsa'ma Joséja in'jambipa qqen su:

—Que canjan, ña na'su tsu pa'cco tise an'bian'choma ñanga antte tsama ña coiraye. Ña vani can'jensi tiseja jongoesuve asi'ttaemba manda'jembi. ⁹ Va tsaonijan majañi'qqe me'i'on tsu ña'can'me. Ña na'suja jongoesuveyi'qqe ñama se'pimbi. Aqquia queveyi tsu ñanga afembi queja tise pushesi. Tsa'cansi, ¿ma'caen gi oshaya quema egae tsomba Chiganga'qqe egae tsoñe?

¹⁰ Tsa'caen su'ni'qqe toya tsu tsa pushesuja poi a'ta tisema ti'tsse noñangian cuintsu tisei'ccu ccuiye. Tsa'ma Joséja tise su'choma pañambi ni tisei'ccu pporotsse can'jembi. ¹¹ Tsa'ma fae a'ta, a'i me'i'ani, Joséja quartonga ca'ni tseccuni semañe. ¹² Ca'nisi Potifar pusheja tise omba'su ondiccujeye qqitssa indipa su:

—Ñai'ccu ccuija.

Tsa'ma Joséja dyopa tise omba'su ondiccujema pushesunga oshichha catipa butto somboin ja.

¹³ Tsa'caen tise tivenga tsa ondiccu'jema cati jasi atepa ¹⁴ pushesuja tisu etti'su semasundeccuma ttu'sepa su:

—Que can'faja, ña tsa'ndu va hebreo'su a'ima isi ja'ño ingima tsu noñangiañe ashaen. Nane ñaccuni ca'nimba ñai'ccu ccuiye in'jansi gi quian'me fundo. ¹⁵ Quian'me pa'cco tsain'fai'ccu ña fundosi pañamba tsu tise sarupama cati somboin ja.

¹⁶ Tsomba José ondiccu'jema ñoñamba an'bian tisu tsa'ndu tsaoni jiya'ngae. ¹⁷ Tise jisi o'tie condaqquia'caeni condapa su:

—Tsa hebreo'su a'ima sema'suve que i'cho tsu ñaccuni ca'nimba ñai'ccu ccuipa egae tsoñe in'jan. ¹⁸ Tsa'ma pa'cco tsain'fai'ccu ña fundosi tsu tise sarupama cati butto somboin ja. Tsa'caen tsu que i'cho sema'suja ñama tsincon.

¹⁹ Tise pushe tsa'caen condase'jesi pañamba Joséma ambian'su na'suja ñoa'me iyicca'ye. ²⁰ Iyicca'yepa Joséma qqutssa indipa cca'ima manda cuintsu picco'je'cho ettinga picco'faye, na'su faraónge indiyepa dyai'jeccuni. Tsa'ma picco'jeccuni can'jen'ni'qqe ²¹ Na'su Chigaja Joséi'ccu can'jemba tisu ñotsse tsoña'chove canjaen'jen. Nane cuintsu picco'jeccuni'su na'su Joséma ñotsse in'jaña'chove Chigaja ante. ²² Tsa'caen anttesi picco'jeccuni'su na'suja pa'cco indiyechondeccuma Josénga ante cuintsu cambia coira'jeye. Nane José tsu pa'cco tseccuni'suma manda'suve da. ²³ José ñotsse mandasi indiyeccuni'su na'suja jongoesuve iñajampañambi Na'su Chiga Joséi'ccu can'jensi ñotsse tsu somboya qquen in'jamba.

40

José ayo'o'choma conda'cho

¹ Can'jensi omboen tsu Egipto'su na'su faraón'ga tasama afe'su toya'caen panma matssan'su'qqe tise'pa na'su in'jambi'choa've tson'fa. ² Tsa'caen tson'fasi na'su faraón tsa dos tisema shondosundecuma, tasama afe'su na'su toya'caen panma matssan'su na'suma'qqe iyicca'yepa ³ piccoye manda. Piccoye mandasi tsu na'sui'ccu pporotsse ccutsu'su sundarondeccumbe capitán tsaoni'su picco'je'ttinga picco'fa. Tse'tti tsu José'qqe piccoyepa can'jen. ⁴ Tsonsi faraón sundarondeccumbe capitán'jan tsa dos na'suma shondosundecuma José'nga antte cuintsu coiraye. Tsa'caen indiyepa tsain'bitssi a'ta piccoyepa can'jen'fa.

⁵ Fae cose tsa dos indiy'e'cho, na'sunga tasama afe'su toya'caen panma matssan'su'qqe, ayo'o'fa. Poimbe ayo'ocho tsu jongoesu qqen condaya'chove an'bian. ⁶ Sinte José'ja tise'pama can'su jipa atte asi'ttaen dyai'fa'choma. ⁷ Attepa iñajampaña:

—¿Micomba qui ja'ño a'taja jova'caen ñombi'ye dyai'fa?

⁸ Tsonsi tsu su'fa:

—Ayo'o'fa gi tsa'ma me'i'on tsu majan ingi ayo'opa in'jan'choma condaye.

Tsonsi José'ja iñajampaña:

—¿Isha tsu Chiga Quitsaja condaye oshaya? Tsa'ma ñanga condasecan'faja que'i ayo'o'choma.

⁹ Tsa'caen susi tasama afe'su na'suja José'nga tise ayo'o'choma qqen condase:

—Ayo'opa gi atte o'fa tsaja o'fama, ¹⁰ tres ttembave an'bian'choma. Toya'caen tsa ttemba chu'papa te'tave sombo. Te'ta pasapa ñoa'me tsaja sin'chove sombo. ¹¹ Ñajan na'su faraón tasama an'biamba tsanga tsaja tsa'ccuma mandyipa on'boen. On'boemba ñañi gi tsa tasama angapa afe na'su faraón tivenga.

¹² Joséja pañamba su:

—Qquen tsu que ayo'ochoja condaye in'jan: Tres ttembata tsu canjaen tres a'tave. ¹³ Nane tres a'ta pasasi faraónjan quene injanjangipa ccase que semaqqe'sungayi quema ca'niaña. Tsonsi qui tayoa'caeñi na'su faraónja que tivei'ccu angapa cuiña'jeña. ¹⁴ Tsa'caen da'ta ñama in'jamba mende'yeja. Chigáne ñane afaja na'su faraónja cuintsu ñama va'ttie somboeñe. ¹⁵ Nane ñajan hebreo ande'suma cca'namba vani ipa ña mingae egae tsincoma'caen piccopa an'bian'fa.

¹⁶ Panma matssan'su na'suja faesu ayo'o'chone José condase'choja ñotsse daya'chosi pañamba tise'qqe su:

—Ña'qqe gi ayo'o. Nane tres saparoni totoa pan jinchoma gi ña tsoveni ontsembipa angacan. ¹⁷ Ombani otta'cho saparoja osha'cho ya'yatssia pan tsu jin faraónmbeve. Tsa'ma chhiriria tsu jipa ña ontsembicho saparo'su panma an'fa.

¹⁸ Tsama pañamba Joséja su:

—Qquen tsu que ayo'ochoja condaye in'jan: Tres saparo tsu tres a'tave canjaen. ¹⁹ Tres a'ta pasasi quene injanjangipa na'su faraónjan mandasi quema quini'ccongga fi'ttiya. Fi'ttisi chhiriria que ai'voma an'faya.

20 Tres a'ta pasasi tsu na'su faraón canqque'fa nepi. Nepisi rande fiestave tisema shondosundeccui'ccu tson. Tise ttu'sesi ji'chondeccu caña'jen'ni faraónjan manda cuintsu picco'je'tti'ye tasama afe'su na'su toya'caen panma matssan'su na'suma'qqe somboemba tiseni i'faye. 21 Isi tasama afe'su na'suma ccase tise semaqqe'sungayi ca'niansi ccase faraónga tayoacaeñi angapa cuiña'suve da. 22 Tsa'ma panma matssan'suma isi manda cuintsu quini'ccongata tisema fi'tti'faye. Nane José ayo'ochone suqquia'caen tsu tson. 23 Tsa'caen ccusha'ma tasama afe'su na'suja Joséne in'jambitssi.

41

José faraón ayo'ochoma conda'cho

1 Dos canqque'fa pasasi faraónjan anamba qqen ayo'o: Nilo na'en otafari tiseja ccutsu. 2 Tsa'caen ccutsu'ni na'eñe tsu siete vaura me'detssipa ppu'chotssia sombo. Sombopa naifa'su shoshovima an'jen'fa. 3 Tsendeccumbe sepacoe tsu siete vaura egapa ñoa'me cuñosi na'eñe sombo'fa. Sombopa naifani ccutsu'fa faesu vaurandecchu pporotsse. 4 Tsomba tsu egapa cuñosi vaurandecchu tsa siete vaura me'detssipa ppu'chotssia'ma an'fa.

Tsa'caen ayo'opa faraónjan qqendya. 5 Ccase anamba faesuve ayo'o: Nane fae trigo na'jiñe siete na'si me'detssipa zutssia sombo. 6 Tsama omboe tsu siete na'si sambapa chiga sombo'jene ju'rutssia fingiain'ccu oque'cho sombo. 7 Tsa'caen

oque'cho na'si sombopa tsu tsa siete na'si zutssipa me'detssiana an'fa.

Faraónjan qquendyapa in'jan tisu ñoa'me ayo'ochove. ⁸ Tsa'ma ccaqui a'ta sinte'ye ñoa'me asi'ttaén dyaipa manda cuintsu poiya'cco Egipto'su jai'ngae ma'caen daya'chove condasundeccu, injama'pandeqquiama'qqe ttu'se'faye. Ttu'sesi ji'fasi faraónjan tise ayo'o'choma condase. Tsa'ma majan tsendeccu'suyi'qqe ayo'opa in'jan'choma condaye osha'fambi. ⁹ Tsa'caen osha'fambisi tasama afe'su na'suja faraónja su:

—Ja'ño gi injanjangi ña aqqe'papa egae tson'jen'choma. ¹⁰ Na'su faraón ingima iyicca'yepa panma matssan'su na'su toya'caen ña, quema shondo'suma'qqe piccopa an'bian tise sundarondeccumbe capitán tsaoni'su picco'je'chonga. ¹¹ Fae cose tsa panma matssan'suja ayo'o. Toya'caen gi ña'qqe ayo'o. Poi ayo'o'cho tsu jongoesu qqwen condaya'chove an'bian. ¹² Nane tseccuniñi tsu ingi'ccu fae hebreo'su dusunga piccoyepa can'jen. Tsaja capitánmbe sema'su. Tisenga gi ingi ayo'o'choma condase'fasi tise tsu ma'caen daya'chove tansintsse conda. ¹³ Tise ma'caen su'choja, jtsa'caen tsu pasa! Ñajan ccase tisu sema'banga ca'nisi faesuja quini'ccong pa.

¹⁴ Tsama pañamba faraónjan manda cuintsu Joséma ttusengaye. Tsa'caen mandasi japa jundeyi Joséma somboen'fa. Joséja tsojin'bama fuchhapa faesu ondiccujema ondiccupa na'su faraónja japa ccutsu. ¹⁵ Ccutsusi faraónjan tisema su:

—Ayo'o'choma gi ayo'o tsa'ma majaan'i'qqe tsu tsa ayo'opa in'jan'choma condaye osha'fambi. Tayo gi paña queja ayo'o'choma pañamba condaye osha.

¹⁶ Tsongi Joséja su:

—Tisutsseyi ñajan oshambi. Tsa'ma Chiga tsu na'su faraónga ñotssiave condaye.

¹⁷ Tsongi faraón Josénga qqen condase:

—Nane ñajan Nilo na'en otafari ccutsu qqen gi ayo'o: ¹⁸ Tsa na'eñe tsu sombo'fa siete vaura ppu'chotssipa me'detssia. Sombopa naifa'su shoshovima an'jen'fa. ¹⁹ Tsendecumbe sepacoe tsu siete vaura egapa ñoa'me cuñosi na'eñe sombo'fa. ¡Minguite'qqe gi vaura tsa'caen egama va Egiptonima atepa cansambi! ²⁰ Tsa vaura cuñosipa ega tsu o'tie sombo'cho siete vaura ppu'chotssia'ma an'fa. ²¹ Tsa'ma tsa'caen an'ma tise'pa ai'voja toenga cuñosi'fa tsu. Nane tsa'caen an'ni'qqe tise'pa an'chove atesu'faya'bi.

“Tsa'caen ayo'opa gi qqendya. ²² Tsomba ccase anamba gi faesuve ayo'o. Nane fae trigo na'jiñe siete na'si zutssipa me'detssia sombo. ²³ Tsama omboe tsu siete na'si sambapa, vuvutssia, chiga sombo'jene ji'cho fingian oque'cho sombo. ²⁴ Tsa na'si samba tsu siete na'si me'detssiana an'fa. Pa'cco va ña ayo'o'choma gi jai'ngae ma'caen daya'chove condasundecunga condase. Tsa'ma majaan'i'qqe tsu tsa ayo'opa in'jan'choma condaye osha'fambi.”

²⁵ Joséja pa'ccoma pañamba faraónga su:

—Tsa faraón dos ayo'opata tsu fae tsoña'choneñi ayo'o'cho. Chiga tsu quenga conda tisu ma'caen tsoña'choma. ²⁶ Tsa siete vaura me'detssiata tsu

siete canqque'fave canjaen. Tsa'caeñi tsu siete me'detssia na'si'qqe canjaen. Nane fa'eveyi ayo'o'cho tsu. ²⁷ Toya'caen tsa tsendeccuma omboe sombo'cho siete vaura cuñosipa ega'qqe tsu siete canqque'fave canjaen'cho. Tsa'caeñi tsu tsa siete na'si samba chiga sombo'jene ji'cho fingian oque'cho'qqe canjaen. Va siete canqque'fa pa'cco tsu ñoa'me qquipoesuiteve daya. ²⁸ Nane ña suqquia'caen tsu Chigaja faraónga conda tisu ma'caen tsoña'choma. ²⁹ Nepiya tsu siete canqque'fa pa'cco anqque'su shacambitssia've pa'cco Egiptoni. ³⁰ Tsama omboe tsu siete canqque'fa pa'cco ñoa'me qquipoesuiteve daya. Nane qquipoesuiteve dapa ñoa'me pa'cco andema dañosi tsu aindeccuja tsa ñotssia shacambitssia canqque'fama aqqe'pa'faya. ³¹ Ñoa'me qquipoesuiteve dasi shacambitssia canqque'fani boña'choma metsse sefaen'faya. ³² Nane Chigaja tsa'caen tsoñe qqen in'jamba toya'caen junde tsa'caen tsoñasi tsu dos se faraónjan tsane ayo'o.

³³ “Nane tsa'caen daya'si tsu ja'ño faraónjan tta'ttaya'cho fae tsandie injama'papa atesu'choma cuintsu Egipto'suma mandaye. ³⁴ Toya'caen tsu faraónjan qqen tsoña'cho: governarorondeccuve ccutsiaña'cho cuintsu pa'cco andenga japa pa'cco Egipto ande'su tai'fa'choma fae quinta'su enttingeccoeyi isu'faye. Nane siete canqque'fa tsa'caen shacambitsse jincho'niñi tsu tsa'caen isu'faya'cho. ³⁵ Isupa tsu pa'cco ñotssia canqque'fa jincho'su trigoma boñaña'cho majan canqqueni an'biaña'chove na'su faraón su'nijan. Tseni

an'biaña'cho cuintsu aindeccu an'jeña'chove.
³⁶ Tsa'caen boñamba an'biansi tsu trigoja jiña
 aindeccu siete canqque'fa pa'cco qquipoesuiteve
 Egiptoni dasi qquipoes'upa pa'fasa'ne.”

José Egipto'su govenarorve da'cho

³⁷ José in'jamba su'choja faraóne toya'caen
 tisema shondosundecune'qqe ñotsse injienge.

³⁸ Tsa'camba faraónjan su:

—¿Osha'fa ti gi faesu tsandie qqen Chiga
 Qquendya'pama an'bian'chove atteye?

³⁹ Tsomba Josénga su:

—Me'i'on tsu quia'caen injama'papa ñotsse
 atesu'chove. Nane Chiga tsu quenga tson que
 pa'cco tsesuma atesuchoye. ⁴⁰ Que qui va na'su
 tsa'o'suma manda'jeya. Toya'caen pa'cco ña
 aindeccu tsu que manda'choma paña'faya. Tsa'ma
 ñajan ñoa'me na'su faraónmba jo'su ñañi gi quema
 ti'tsse'tssiya. ⁴¹ Que canjan, quema gi ccutsian
 pa'cco va Egipto ande'sumbe na'su govenarorve.

Tsa'caen afa nanimba ⁴² na'su faraónjan tisu
 tiveni ejian'cho sotija, na'su pisa tevaen'jen'cho
 sotijama shichhapa José tivenga ejian. Tsa'caen
 tsomba manda cuintsu ñotssia totoa lino saru-
 pama ondiqquiamba cori andu'fama tsifonga an-
 dian'faye. ⁴³ Tsa'caen ondiqquiam nanimba na'su
 faraón omboe ja'je'cho caronga otsiamba aindec-
 cuma manda cuintsu tisema o'tie jayipa qqen
 fundo'faye: “¡Joqquitssi'faja cuintsu panshañe!”
 Tsa'cansi tsu poiye'cco a'i José Egipto'su na'suve
 da'choma atte'fa.

⁴⁴ Omboe faraónjan Josénga su:

—Ñajan quema ti'tsse'tssia faraón. Tsa'ma que mandambiya'da ni fae a'iyi'qqe fae tsimian'ccove oyaëñe osha'fambi.

⁴⁵ Tsomba faraónjan Joséma Zafnat-paneame inisiamba On canqqe'su chigama afa'su Potifera onque'nge Asenatnga antte. Tsa'caen tsonsi poi'cco a'i tsu in'jan'fa José ti'tsse'tssia've da'chove. ⁴⁶ Joséja treinta canqqe'fave an'bian'ni tsu tsa'caen tisema Egipto'su na'su faraónga anga'fa.

Tsonsi Joséja faraónma chigambiamba pa'cco Egipto'su andenga jacañe ashaen. ⁴⁷ Tsa siete canqqe'fa pa'cco shacambitssia've dasi tsain'bitssi taiya'cho nepi. ⁴⁸ Siete canqqe'fa pa'cco, Joséja ñoa'me injan'tsse tsa ande'su trigoma taipa canqquenga boña. Nane poi canqquenga tsu tsa canqqe jini'su nasipa'su trigoma taipa boña. ⁴⁹ Joséja mar'su sisipa'can'tsse trigoma tai. Nane panshaen tsain'bio trigosi agattopa injan'jeñe oshambipa agattombe'yi antte.

⁵⁰ Qquipoesuiteve daya'cho canqqe'fa toya nepimbi'te José pushe Asenatja dos tsandie du'shuve isu Joséme. ⁵¹ Aisheve isusi “Chiga ñama ñotsse tsonsi gi ña antiandeccu, ña vana'jen'choma'qqe aqqe'pa” qqen supa tisema inisian Manasésve. ⁵² Faesuve isusi “Chiga anttesi gi ña vana'jen'cho andeni du'shuve an'bian” qqen supa tisema inisian Efraínme.

⁵³ Siete canqqe'fa shacambitisse Egiptoni jincho pasasi ⁵⁴ siete canqqe'fa pa'cco qquipoesuiteve daye ashaen ma'caen José suqquia'caen. Tsa'caen dasi Egiptoniñi anqqe'su jinsi a'i an'fa. Tsa'ma poi

faesu andeni tsu qquipoe'su'fa. ⁵⁵ Jai'ngae Egipto'su'qqe qquipoe'supa faraóni ja'fa trigove ñajañe. Tsa'caen ji'fasi faraónjan poi'i'cco egiptondeccunga su: “Joséni japa tise suqquia'caen tson'faja.”

⁵⁶ Pa'cco ande tsa'caen qquipoesuiteve dasi Joséja trigoma boña'cho tsa'o sheque'choma fettapa Egiptondeccunga chavaen'jeñe ashaen. Nane poi canqque'fa tsu ti'tsse ega qquipoesuiteve da'ñacca. ⁵⁷ Poi andenga tsa'caen dasi tsenisundeccu'qqe Egiptoni ji'je'fa José an'bian'cho trigoma chavaye.

42

José antiandeccu Egiptoni ja'cho

¹ Jacobja Egiptoni trigo jinchoma pañamba tise dutssiyendeccuma su:

—¿Micon'jemba qui aqquia tisupanaccu camboencco dyai'fa? ² Ñanda gi paña Egiptoni trigo jinchoma. Tseni japa trigoma chava'faja ingi qquipoe'supa pa'fasa'ne.

³ Tise yaya tsa'caen mandasi diez José antiandeccu tisupanaccu Egiptoni trigove chava'su ja'fa. ⁴ Tsa'ma Benjamín, tsa José quinshin jaye Jacobja anttembi, tisema angapa mingae tson'fasa'ne asi'ttaemba. ⁵ Nane pa'cco Canaán ande'ye qquipoesuiteve dasi Israel dutssiyendeccuja faesu aindeccui'ccu fae'ngae chava'su ja'fa.

⁶ Joséja ande na'suve dapa poi'i'cco ccane ji'chondecunga trigoma chavaen'su tsu. Tsa'cansi tise antiandeccuja tisenga jipa andenga cambia'jui'ccu puntssan'fa. ⁷ Tsa'caen

tisenga puntssan'fasi attepa Joséja junde tise quindyandeccu qqen in'jan. Tsa'caen atte'ma tise'pama atesumbiqquia'caen tsomba iyicca'yepa afaqquia'caen tise'pama ñajampaña:

—¡Que'ija! ¿mane qui ji'fa?

Tise'paja su'fa:

—Canaán andene gi ji'fa trigo chava'su.

⁸ José tise quindyandecuma attepa atesu'ni'qqe tsendeccuja tisema atte'ma atesu'fambi. ⁹ Tsa'caen atesu'fambisi Joséja tayoe tise'pane ayo'o'choma injanjangi in'jamba su:

—Que'i qui a'tutsse jacamba attesundeccu. Nane aqquia qui ji'fa ma'caen ingi andema patsuya'chove atteye.

¹⁰ Tsa'ma tsendeccuja su'fa:

—Me'in na'su. Ingi quema shondosundeccuja trigoma chava'su gi ji'fa. ¹¹ Ingi poiyy'cco gi fae yaya'su'fa. Ñotssia a'i'fa gi. Minga'ni'qqe gi a'tutsse atteye jacan'fambi.

¹² Tsonsi Joséja su:

—Me'in, que'íta qui ma'caen ingi andema patsuya'chove atteye ji'chondeccu.

¹³ Tsa'ma tsendeccuja su'fa:

—Quema shondosundeccuta gi doce antian-deccu. Fae yaya'su'fa gi. Toya'caen Canaánni gi canse'fa. Ingi quinshin chu'aja ingi yayai'ccu toeni catiye. Tsa'ma faesu quinshinjan ingi'ccu can'jembi.

¹⁴ Tsa'ma José ccase afapa su:

—Nane ña suqquia'caen qui que'ija a'tutsse ttattasundeccu. ¹⁵ Qquen tsomba gi que'i ñoa'me su'chove atesuya. Nane faraón canse'choma

poiye'cco atesuqquia'caen ña qqwen su'choma atesu'faya: Va'ttie sombo'faya'bi qui que'i antian chu'a jiya'ngae. ¹⁶ Cuintsu fae'cco que'i'su japa i'ngaja. Faesundeccuja piccoyepa can'jen'faya'cho. Tsa'caen tsomba gi que'i ñoa'me su'chove atesuya. Que'i su'cho tansintssimbian'da qui a'tutsse ttattasundeccu. Nane faraón canse'choma atesupa gi tansintsse su.

¹⁷ Tsa'caen supa Joséja tres a'ta pa'cco tsendeccuma piccopa an'bian. ¹⁸ Tres a'ta pasasi tise'pama su:

—Ñajan Chiga Quitsave in'jamba gi tisema dyojo. Qquen tson'faja ña que'ima ccushaeñe: ¹⁹ Ñoa'me ñotssia aindeccu'ta fae'cco que'i antianme picco'je'ttinga catipa poiye'cco cca'ija trigoma isupa anga'faja cuintsu que'i tsaonisundeccu an'faye. ²⁰ Tsa'caen japa que'i antian chu'ama i'faja ña tisema cachuipa que'i ñoa'me su'chove atesuye. Imbi'ta qui pa'faya.

Tsendeccuja tise suqquia'caen tsoñe in'jan'fa.

²¹ Tsa'ma tisupanaccu afaccopa su'je'fa:

—Ñoa'me gi ingi quinshin Joséma egae tson'fa. Nane tise injamáchoni vana'jemba mendeye'faya'ma'caen inñajan'ni'qqe gi tisema paña'fambi. Tsane gi ja'ño vanañe tson'jen'fa.

²² Tsonsi Rubénjan su:

—Tayo gi ñajan su tsa du'shuma dañombe can'faye. Tsa'ma que'ija ña su'choma paña'fambi. Tsa'cansi ja'ño tsu tise pa'chone ingi'qqe vana'faya'cho.

²³ Tsendeccuja atesu'fambi José tise'pa hebreo aya'fangae su'je'choma paña'jen'chove. Nane

Joséja egipto'su aya'fangae afasi tsu faesu a'i poi aya'fama pañamba afa'su tise'panga conda'je. ²⁴ Tsa'ma Joséja tise'pa su'choma pañamba tse'ttie sombopa ccani japa i'na. Nane afaye oshambi'tsse da'cho pasapa ccase tise'pani jipa Simeónma joqqutssiamba tise'pa caña'jen'ttinga tandan'faye manda. ²⁵ Tsa'caen tsomba manda cuintsu tsendeccumbe saquiyonga trigoma on'boen'faye. Toya'caen tsu manda cuintsu nasundecuma a'tutsseyi tise'pa corifin'dima toyaquiañe tise'pa saquiyososini ppiñamba. Toya'caen tise'pa jayipa an jaya'chove'qqe cuintsu afeye. Tsa'caen mandasi tsa'caen tsu tson. ²⁶ Tsa'caen afesi tsendeccuja tise'pa borondeccunga otta'ttaemba tse'ttie sombopa ja'fa.

²⁷ Tisupa anaña'ttinga nepipa fae'cco tsendeccu'su tise saquiyoma fetta boronga o'fiañe. Fettapa atte tise corifin'di toeningatssi saquiyoni ppi'choma. ²⁸ Attepa tise antiandecunga su:

—¡Que can'faja! ¡Ña corifin'dima toyaquiansi va'tti ña saquiyoni ppi'choma!

Tsama attepa poi'cco tsendeccu dyopa tisupa injamáchoni chapepa tisupanaccu afacco'fa:

—¿Jongoesie tsu Chigaja ingima qqen tson?

²⁹ Canaánni nepipa tise'pa yaya Jacobnga pa'cco tisupa ma'caen da'choma condasepa su'fa:

³⁰ —Tsa andema manda'su tsandie tsu ingima iyicca'yeqquia'caen afa ingija tise andema patsuye a'tutsse ttattasundeccu qqen supa.

³¹ Tsa'ma ingija tisenga su'fa ingija ñotssia a'ipa minga'ni'qqe gi a'tutsse ttatta'suve dapa jacan'fambi; ³² toya'caen doce antiandeccu'fa gi fae yaya'su'fa; fae antian toya ingi'ccu can'jembisi

faesuja quei'ccu Canaánni can'jen, qqwen gi su'fa.
³³ Tsa'caen su'fasi tsu tiseja su: 'Qquen tsomba gi atesuya que'i ñoa'me ñotssia a'ive: fae'cco que'i antianme ñanga catipa trigoma isupa anga'faja cuintsu que'i tsaonisundeccu qquipoe'supa an'jen'faye. ³⁴ Tsa'ma que'i antian chu'ama ñani i'faja ña atteye. Attepa gi in'jaña que'ija ñoa'me ñotssia a'ipa ingi andema patsuye a'tutsse jacan'fambi. Tsomba gi faesu que'i antianma somboensi qui se'piyembitsse va andeni jacañe osha'faya.'

³⁵ Tsa'caen condase nanimba José antiandeccuja tise'pa saquiyo'su trigoma somboeñe tson'jemba atte'fa tise'pa corifin'di bosa poimbe saquiyoni toengatssi ppi'fa'choma. Tsa corifin'di bosama attepa tsendeccu tise'pa yaya'qqe ñoa'me dyo'fa. ³⁶ Tsa'caen dyopa Jacobja su:

—Du'shu me'ccoe qui ñama tsonjin'fa. Joséja ingi'ccu can'jembi. Simeón'qqe tsa'cañi. ¡Ja'ñonda qui Benjamínma'qqe itsaye in'jan'fa! ¡Pa'cco tsa nepi'cho tsu ña vanaña'chove da!

³⁷ Tsa'caen susi Rubénjan tise yayanga su:

—Ñanga antteja Benjamínma ña coirapa angapa ccase queni iye. Ña ccase imbian'da qui ña dos dutssiyendeccuma fi'ttiye osha.

³⁸ Tsa'ma Jacobja su:

—Ña dutssi'yeja que'i'ccu jaye oshambi tsu. Tise quindya José pasi tise'yi tsu ñai'ccu can'jen. Nane tisema angasi mingae da'nijan que'i qui sha-capave da'faya va coenza ccashe'ye ñombi'yepa pa'chone.

43

Benjamínma Egiptoni anga'cho

¹ Tsa qquipoesuite ti'tsse egave da'ñaccasi ² Jacob tise dutssiyendeccu'qqe Egiptone anga'cho trigoma sefaen'fa. Sefasi Jacobja su:

—Ccase japa re'ricco trigove chavanga'faja poi'cco ingimbe.

³ Tsa'ma Judája su:

—Tsa tsandieja a'tatsse inginga qqen su: 'Que'i antian chu'ama imbi'ta jccase vani ji'fajama!'

⁴ Tsa'cansi cuintsu Benjamín ingi'ccu jaye que antte'ninda gi japa trigoma chavanga'faya.

⁵ Tsa'ma que tisema moembian'da gi ja'faya'bi. Nane tsa a'íta tsu su: '¡Que'i antian chu'ama imbi'ta ccase vani ji'fajama!'

⁶ Tsonsi Israelja su:

—¿Micoñe qui ñama tsa'caen egae tson'fa? ¿Jon-goesie qui tsa a'inga faesu antianme'qqe an'bian qqenjan su'fa?

⁷ Tsendeccuja su'fa:

—Nane tise'yi panshaen ingine, ingi antiandec-cune'qqe ñajanse'poensi gi conda'fa. Nane tiseja qqen ñajampaña: '¿Toya ti canse que yayaja? ¿Faesu antianmenda ti qui an'bian'fa?' Qquen susi aqquia injanga gi tise ñajampaña'choma conda'fa. ¿Ma'caen gi atesu'faya 'Que antianma i'faja' qqen suya'chove?

⁸ Tsonsi Judája tise yaya Israelnga su:

—Poi'cco ingi canseccaye in'jan'da antteja cuintsu quinshin ña coirasi jacañe. Tsayita gi junde ja'faya. Tsa'caen tson'da gi ni que, ni ingi, ni ingi dushundeccu'qqe pa'faya'bi. ⁹ Ñajan tise've

toyaquian'su. Ñama qui tise mingae da'ninda itsaya. Nane tisema vani toequi imbi'ta tsangae tisene quei'ccu shacapae dapa gi canseya. ¹⁰ Que se'pisi ronda'jembiecan'da, itayo gi dos se japa ji'faye'can!

¹¹ Tsa'caen susi tise yayaja su:

—Ccaningae tsoñe oshambi'ta qqquen tson'faja: Tsa a'inga afeya'chove que'i saquiyonga anga'faja. Nane va ande'su bove ñotsse jincho'cho'suma anga'faja, re'ricco balsa'mo seje'pa, re'ricco tuño cuñajun'cho, ñome'ba, mirra seje'pa, ccasepa'cho toya'caen almendra. ¹² Toya'caen dos se afepoeña'cho corifin'dive angapa cambajunaccu tise que'i corifin'dima toyaquian'choma afe'faja, in'jamba'qqe ñotsse agattombipa ppiña'chosa'ne. ¹³ Dasu' qui que quinshinma angapa ccase japa can'ga'faja tsa a'ima. ¹⁴ Tsa Chiga Osha'choma Oshacho'cho tsu tisema in'jaeña cuintsu que'ima mendeyepa faesu que'i antian Simeónma fettapa Benjamínma'qqe mingae tsombe'yi antteye. Ñajan, mapán du'shu me'ccoe da'a'qqe cuin'qqe gi tsa'caen me'ccoe daya.

¹⁵ Tsonsi Jacob dutssiyendeccuja afeya'cho, dos se afepoeña'cho corifin'di toya'caen Benjamínma'qqe angapa Egiptoni ja'fa. José can'jeni nepi'fasi ¹⁶ Joséja Benjamín tsendeccui'ccu ji'chove attepa tise tsa'o coira'suma su:

—Va aindecuma ña tsaoni angapa fae vaurave fi'ttipa sho'ccoengan. Nane ja'ño enttinge a'taja ñai'ccu tsu an'faya.

¹⁷ José tsa'oma coira'suja José suqquia'caen tsendeccuma fae'ngae anga tise tsaoni. ¹⁸ Tsa'ma tsendeccuja José tsaoni anga jisi ñoa'me dyopa tisupapora qqwen su'fa:

—¿Aqqiata ti afopoen'fambi? ¿Isha tsu ingi tayoe jisi corifin'dima toyaquian'chone'ja vani iya? Nane ingima indipa tsu tsangae semoen'jen'faya ingi borondeccui'ccu fae'ngae.

¹⁹ Tsa'caen supa José tsa'o'su sombo'ttinga nepipa tsa'oma coira'sunga catse'fa tisenga ²⁰ qqwen afaye:

—Chigáne na'su, tayoe'qqe gi ñoa'metsse trigoma chava'su ji'fa. ²¹ Tsa'ma chavapa japa ingi anañani nepipa gi poiya'cco tisu saquiyoma fettapa atte'fa tsani poi ingi corifin'di ppi'choma. Tsa corifin'dimajan toengatsse gi i'fa ja'ño tsama toyaquiañe. ²² Toya'caen ti'tsse'tssi corifin'dive gi i'fa trigoma chavaye. Tsa'ma atesu'fambi gi majan ingi tayoe jipa chava'cho corifin'dima saquiyonga ppiña'chove.

²³ Tsa'ma tsa'oma coira'suja tise'pama su:

—Vuiquipa dyombe can'faja. ¿Isha tsu que'i Chiga, tsa que yaya Chigaja, tsa'caen que'i corifin'dima saquiyonga ppiña'ña? Nane tayo gi tsa que'i afepoen'cho corifin'dima isu.

Tsomba tsa'oma coira'suja Simeónma somboemba tise'pani anga. ²⁴ Tse'i José tsa'onga ca'niamba tsa'ccuma afe cuintsu tise'pa tsu'ttema cashi'faye. Toya'caen tise'pa borondeccunga'qqe o'fian. ²⁵ José antiandeccu tise'pa Josénga afeya'choma ñoñamba ronda'je'fa José enttinge a'ta tseni añe su'chosi pañamba.

26 Tsa'caen ronda'je'fani José tisu tsaoni jisi tsendeccuja tisenga afeya'choma afepa andenga camba'jui'ccu puntssan'fa. 27 Joséja tise'pa ma'caen canse'chove iñajampañamba ti'tsse iñajampaña:

—¿Mingae tsu can'jen que'i yaya, tsa coenza ccashe'ye qquen que'i su'choja? ¿Toya ti canse?

28 Tsendeccuja ccase puntssamba su'fa:

—Ingi yaya, quema shondo'suja ñotssi tsu. Toya tsu canse.

29 Joséja poi'yi'cco tsendeccuma camba atte tise antian Benjamínma. Nane tsaja tise yaya'supa tise mama'suyi. Tisema attepa su:

—¿Va ti que'i antian chu'a'qqe can'jen qquen que'i ñanga su'cho?

Ju, qquen su'fasi Joséja Benjamínma qquen su:

—Jaricho, Chiga tsu quema ñotsse tsoña.

Tsa'caen supa 30 Joséja tise quinshinma camba injamáchoni chapepa i'nañe tson'jemba junde tisu ttuccuni ca'nimba tseccuni i'na. 31 I'na'choma vuiquipa tisu camba'juma ovashipa sombopa manda: “¡Anqqe'suma ccutsian'faja aña!”

32 Josémebeja fae mesanga ccutsian'fa. Jacob dutssiyendecumbeja faesu mesanga, toya'caen Joséi'ccu ji'cho egiptondecumbeja faesu mesanga ccutsian'fa. Nane egiptondecuja hebreondeccui'ccu fae'ngae dyaipa aña chi'ga'fa.

33 José antiandecuja ma'caen José su'nijan tsa'caen dyai'fa. Nane atesuqquia'caen coenzama otuni dyaiñamba du'shumajan tsutopani dyaiña. Tsa'caen dyaiñasi asi'ttaemba tisupanaccu camboencco'fa. 34 Tsa'caen dyaiñamba Joséja tisu mesani sheque'cho aña'choma afeye

ashaemba Benjamíngaja cca'inga afe'choma ñoa'me ti'tsse nama afe. Tsa'caen tsu Joséja tisu antiandecui'ccu cu'ipa avujatsse pasa.

44

José tasa

¹ Tsomba tse'i Joséja tise tsa'oma coira'suma manda:

—Va tsandiendecumbe saquiyonga trigoma on'boenjan mangae tise'pa angaye o'shatsse. Toya'caen poi tsandiembe corifin'dima ppiñajan tise'pa angaya'cho saquiyonga. ² Tsa tise'pa quinshin chu'ambengaja trigone afepoen'cho corifin'di toya'caen ña totoacori tasama'qqe ppiñajan.

Tsa'caen mandasi coira'suja José suqquia'caen tson. ³ Caqui a'tasi sinte Joséja ante cuintsu tise'pa boroi'ccu ja'faye. ⁴ Toya canqquema biani ja'fambi'te Joséja tise tsa'oma coira'sunga su:

—Va tsandiendecuma omboemba cachuiccopa qquen suja: “¿Jongoesie qui ñotssiam a egai'ccu afe-poenqquia'caen tson'fa? ¿Jongoesie qui totoacori tasama cca'na'fa? ⁵ Tsa tasanga tsu ña na'suja cu'ipa cambia ma'caen daya'chove atesu'je'cho. ¡Ñoa'me egave qui tson'fa!”

⁶ Tsa'caen susi japa tsa'oma coira'suja José antiandecuma José mandaqquia'caen su. ⁷ Tsa'caen susi tsandiendecuja su'fa:

—¿Jongoesie qui ingima ya'caen afase? ¿Minguite'qqe gi ingija tsa'caen tsomba canse'fambi? ⁸ Nane tsa ingi saquiyoni pi'cho corifin'dima Canaánne toyaquiañe

ji'je'chondeccu'ta, ¿ma'caen gi que na'su tsa'o'su cori ni totoacorima cca'na'faya? ⁹ Ingi'su majan quema shondosundeccu tsa tasama an'biamba atteye'ta cuintsu paja. Nane ingi'qqe gi quembe sema'suve dapa tsangae canse'faya.

¹⁰ Tsa'caen su'fasi José tsa'oma coira'suja su:

—Que'i suqquia'caen tsu tsoña'cho. Tsa'ma majan tsa tasama an'bian'choyi tsu ñambe tsangae sema'suve daya. Poiyi'cco cca'indeccuja shacave me'cho'faya tsu.

¹¹ Tsa'caen susi junde poiyi'cco tise'pa saquiy-oma andenga andiamba fetta'fa. ¹² Fetta'fasi José tsa'oma coira'suja poimbe saquiyoma tta'ttaye ashaen. Nane coenzane ashaemba tta'ttá chu'ani nepi. Tsa'caen nepipa Benjamín saquiyoni tsa tasa ppi'choma atte. ¹³ Tsa'caen attesi tsendec-cuja tisupa ondiccujema chitta'fa ñombi'ye'choma canjaeñe. Tsa'caen tsomba poiyi'cco tisumbema boronga andiamba toequi canqqueni ji'fa.

¹⁴ Judá, tise antiandeccui'ccu jipa José tsaoni nepisi Joséja toya can'jen. Tsa'caen can'jensi poiyi'cco tisenga ccaru'fa. Nane cambia'ju andenga ppo'rotsse puntssan'fa. ¹⁵ Tsa'caen ccarupa puntssan'fasi Joséja tise'pama su:

—¿Jongoesuma qui tson'fa? ¿Atesu'fambi ti qui majan a'i ña'caen osha'chove atesucho'choma?

¹⁶ Tsa'caen susi Judája su:

—¿Ma'caen gi quenga conda'faya? ¿Ma'caen gi ingija shaca me'choave canjaen'faya? Chiga tsu ingi egae tsincon'choma tayo atte. Va'tti qui ingima an'bian tsangae quembe semasundeccuve, tsa tasama an'bian'choi'ccu fae'ngae.

¹⁷ Tsa'ma Joséja su:

—Tsa'caenjan tson'masia tsu. Jo'su tsa tasama an'bian'choyi tsu ñambe tsangae sema'suve daya'cho. Que'ija opatsse qui que yaya tsaoni ja'faya'cho. Ni majañi'qqe tsu que'ima noñangiaña'bi.

Judá Benjamíne iñajan'cho

¹⁸ Tsonsi Judája Josénga catsepa su:

—Na'su, quema gi iñajan, chigáne antteja ña re'riccoe quenga a'tutsse afaye. Nane ñama iyicca'yembe'yi ñotsse pañajan. Queja ñoa'me qui na'su faraóni'ccu fae'ngatssi. ¹⁹ Que qui ingima tayoe iñajampaña: '¿Yaya'pa'fa ti qui? ¿Faesu antianmenda ti qui an'bian'fa?' ²⁰ Tsonsi gi conda'fa ingi yaya coenza ccashe'ye, toya'caen ingi antian chu'a'qqe can'jen'chove. Nane tsaja ingi yaya coenza ccashe'yeye dapa du'sian'cho. Toya'caen gi conda'fa ingi yaya tsa du'shuve ñotsse in'jan'choma. Nane fae chan'su ccoangi'cco, fae'cco pasi tsayi tisei'ccu can'jensi tsu tsama ñotsse in'jan. ²¹ Tsama pañamba qui ingima iñajan tsa du'shuma isi atteye in'jamba. ²² Tsonsi gi su'fa tsa du'shumajan tise yaya antteya'bi cuintsu jiye. Nane tisema moeñe antte'ta tsu tise yayaja paya. ²³ Tsa'ma queja ingima su: 'Tsa du'shu que'i'ccu jimbian'da ccase qui ñama atte'faya'bi.'

²⁴ "Tsa'caen que su'choma gi pa'ccoma yayani japa conda'fa. ²⁵ Can'jemba yayaja ingima ccase su: 'Ccase japa trigoma chavanga'faja.' ²⁶ Tsa'ma ingija su'fa: 'Ingi antian chu'a ingi'ccu jayimbian'da jaye osha'fambi gi. Nane tise ingi'ccu jambian'da tsa na'suma atte'faya'bi gi.' ²⁷ Tsonsi ingi yayaja su: 'Que'ija atesu'fa

ña pushe dos du'shuve an'bian'choma. ²⁸ Tsa'su fae'cco tsu ña'ñe tayo joqquitssi. Tsa'cansi gi tisema atte'jembi. Tsampi'su ttesi tisema ansi tsa'caen nepi qqen gi in'jan. ²⁹ Tsa'caeni faesu ña du'shuma'qqe ña'ñe joqquitssiamba angasi mingae egae da'ninda que'i qui va ccashe'ye ñombi'yepa pa'chone shacapa'faya.'

³⁰ “Tsa'caen tsu ña yayaja pa'cco tise canse'pai'ccu va du'shuma in'jamba canse. Nane va du'shu ingi'ccu toequi jambian'da ³¹ ingi yaya tsu tisema attembipa paya. Tsa'caen ñombi'yepa ingi yaya coenza ccashe'ye pa'ninda ingi gi tise pa'chone shacapa'faya. ³² Nane tsa'caen ña yaya se'pisi ña gi tisenga su: ‘Ña gi tsa du'shuve toyaquian'su.’ Toya'caen gi su: ‘Nane tisema vani toequi imbi'ta tsangae tisene quei'ccu shacapae dapa gi canseya.’ ³³ Tsa'camba gi quema ñajan antteja cuintsu tsa du'shu tise antiandeccu'ccu jasi ñajan tsa du'shuve daqquia'caen can'jemba tsangae quembe sema'suve daye. ³⁴ ¿Ma'caen gi tsa du'shuve me'cco toequi ña yayani jaya? Nane in'jambi gi ña yaya ñombi'ye'choma atteye.”

45

José attian'cho tise antiandecunga

¹ Majan tisema shondosundeccu tseni can'jen'fasi Joséja ti'tsse injama'choni osha'chove a'tuye oshambipa quian'me fundo: “¡Poiyi'cco va'ttie sombo'faja!” Tsa'caen tteya moesi poiyi'cco tisema shondosundeccu me'i'en ja'fasi Joséja tise antiandecunga tsuma attian.

² Nane i'nañe ashaemba quian'me i'nasi poiya'cco tseni can'jen'cho egiptondeccu paña'fa. Pañamba conda'fasi na'su faraón'qqe paña. ³ Tsa'caen i'namba Joséja tise antiandecunga tisungae su:

—Ña gi José. ¿Ña yayata ti toya canse?

Tsa'caen susi tsendecuja tise caña'jen'tti ccutsupa ñoa'me dyopa afaye'qqe osha'fambi.

⁴ Tsa'ma Joséja su:

—Chigáne, ññanga catse'faja!

Tise'pa catse'fasi Joséja su:

—Ña gi que'i antian, José, que'i egiptondeccunga chavaen'cho. ⁵ Tsa'ma chigáne ñoquimbi'fajama ni tisupama iyicca'ye'fajama ñama chavaen'chone. Nane Chiga Quitsa tsu ñama manda que'ima o'tie vani jipa que'ima ccushaëne. ⁶ Tayo tsu dos canqque'fa va andeni qquipoesuiteve da'cho. Toya tsu cinco canqque'fa tsa'caen da'jeya. Nane jon'an'qqe qui tai'faya'bi. ⁷ Tsa'ma Chigaja que'ima o'tie ñama vani moe cuintsu ña tsonsi ingi dushundeccu ccushapa canse'faye; toya'caen tsain'bio que'i'suma ccushaëne. ⁸ Tsa'camba Chiga tsu ñama vani moe'su. Que'ija me'in. Tise tsu ñama tson faraón'ga conda'suve; toya'caen faraón tsa'o na'suve; toya'caen pa'cco Egipto andema manda'suve. ⁹ Junde ña yaya can'jeni ja'faja. Japa tisenga su'faja: 'Qquen tsu que dutssi'ye Joséja su: Chiga mandasi gi pa'cco Egipto ande'su na'suve da. Jundeyi ñani jija. ¹⁰ Jipa qui Gosén andeni canseya. Nane que dutssiyendeccu, que du'tssiyembe dushundeccu, pa'cco que aiña'cho, toya'caen pa'cco que an'bian'choi'ccu

fae'ngae qui tseni canseya. Tsa'caen jipa qui ñai'ccu pporotsse canse'faya. ¹¹ Vani gi quenga, que etti'sunga, poiya'cco que'i'ccu canjensundecunga anqque'suma afeya cuintu que'i jongoesuve shacambitsse canse'faye. Nane toya tsu cinco canqque'fa pa'cco qquipoesuite jinchoya.' ¹² Tsa'caen condaye japa ña quinshin Benjamin, toya'caen que'i'qque qui ñoa'me ñotsse su'choma pañamba condasundeccu. ¹³ Ña yayanga condase'faja ma'caen ña egipto'suma manda'je'choma, toya'caen pa'cco que'i vani atte'choma. ¡Junde japa ña yayama i'nga'faja!

¹⁴ Tsa'caen supa Joséja tise quinshin Benjamínma munsimba i'ñañe ashaen. Benjamín'qque Joséma munsimba i'na. ¹⁵ Omboe poiya'cco tsu antiandecuma munsimba mochapa i'na. Tsa'caen tson nanisi poiya'cco tise antiandeccu Joséi'ccu condasecco'fa.

¹⁶ Tsa'caen tsonsi faraón tsaone'qque José antiandeccu ji'chove paña'fa. Tsama pañamba faraón toya'caen poiya'cco tisema shondosundeccu'qque avuja'fa. ¹⁷ Tsa'caen avujapa faraónjan Joséma su:

—Que antiandecuma suja cuintu tise'pa borondeccunga andu'choma andiamba toequi Canaánni japa ¹⁸ que yayama i'nga'faye; toya'caen tisei'ccu canjensundecuma'qque. Ña gi va Egipto ande'su bove ñotssia andema afeya. Tsonsi tsu va ande'su bove ñotssia anqque'suma amba canse'faya. ¹⁹⁻²⁰ Tise'panga condaja cuintu va Egipto andeni'su qquitssa'je'cho caroma anga'faye tsanga tise'pa pushendeccu, tise'pa dushundecuma'qque vani iye; toya'caen que

yayama'qqe cuintsu i'faye. Condaja cuintsu tise'pa tseni an'bian'chone asi'ttaembe'yi catipa vani ji'faye. Nane pa'cco va Egipto ande'su bove ñotssia tsu tise'pambe.

²¹ Faraón suqquia'caen tsu Israel dutssiyendeccuja tson'fa. Joséja faraón mandaqquia'caen qqutssa'je'cho caroma afepa anqqe'suma'qqe afe tise'pa jayipa añ'a'chove. ²² Toya'caen cuna ondiccu'je ñotssiamá poi'ccongá afe cuintsu ondiccu'faye. Tsa'ma Benjamíngaja tresciento corifin'dima afepa cinco ondiccu'je ñotssiamá afe.

²³ Tise yayangaja moe diez boro Egipto ande'su bove ñotssiamá andu'suve. Toya'caen faesu diez boro trigo, pan, anqqe'suma'qqe andu'suve moe tise yaya jiñamba tsaiquingae añ'a'chove.

²⁴ Joséja tise antiandecuma chigambiamba moe'jemba qqen su:

—¡Tsaiqui'ye jayipa tisupanaccu iyicco'fajama!

Tsonsi japa ²⁵ Egipto ande'ye sombopa Canaán andeni nepi'fa tise'pa yaya Jacob can'jeni. ²⁶ Tseni nepi'fa tise'pa yaya Jacobnga conda'fa José toya canse'choma. Toya'caen tsu condase'fa José pa'cco Egipto ande'su na'suve da'choma. Condasesi paña'ma ñoa'me su'chove in'jambi. Nane ma'caen tsomba suya'chove atesumbi. ²⁷ Tsa'ma pa'cco José su'choma condase'fasi toya'caen José moe'cho tise'pama angaya'cho qqutssa'je'cho caroma atepa vuiquipa ñoa'me avuja. ²⁸ Avujapa su: “¡Nanitssi tsu ña dutssi'ye José toya canse'choma ña pañasi! Toya pambi'te gi japa tisema atteya.”

Jacob Egiptoni ja'cho

¹ Tsomba Israelja pa'cco tise an'bian'choi'ccu tsaiqui'ye sombopa japa Beersebani nepipa tise yaya'ye, Isaacmbe Chiganga oque oraemba afe.

² Tsa'caen afepa ana'jensi Chigaja tisenga atti-amba condase. Nane Jacob inisema afasi Jacobja su:

—Va'tti gi.

³ Tsa'caen susi Chigaja su:

—Ña gi Chiga Quitsa, que yaya'yembe Chiga. Dy-ombe'yi Egiptoni jaja. Nane tseni gi que omba'su dushundeccuve tsain'bitsse atapoena. ⁴ Quei'ccu fae'ngae gi Egiptoni jaya. Toya'caen ña'ni gi que omba'su dushundeccoma tsa ande'ye somboena. Nane que pa'ni'qqe tsu Joséja quei'ccu jinchoya.

⁵ Tsa'caen Chiga afasi pañamba Jacobja Beerseba'ye sombo. Nane Israel dutssiyendeccuja tise'pa yaya, tise'pa dushundeccu, toya'caen tise'pa pushendeccoma'qqe otsiamba anga'fa faraón moe'cho tise'pama angaya'cho caronga.

⁶ Tsa'caen tsu Jacobja pa'cco tise aindecui'ccu Egiptoni ja. Toya'caen vaura, oveja, pa'cco tise'pa Canaán andeni atapoemba an'bian'choma'qqe anga'fa. ⁷ Nane poi'ccu tise dutssiyendeccu, onquengendeccu, tsambe dushundeccu'qqe fae'ngae tisei'ccu ja'fa.

⁸ Va tsu poi'ccu Israendeccu Egipto andeni ja'chondeccumbe inise, nane Jacob, tise dutssiyendeccumbe inise:

Rubén tsu Jacob dutssi'ye coenza. ⁹ Rubén dutssiyendeccu tsu Hanoc, Falú, Hezrón toya'caen Carmi.

¹⁰ Simeón dutssiyendeccu tsu Jemuel, Jamín, Ohad, Jaquín, Zohar toya'caen Saúl. Saúl tsu cananeo'su pushesumbe du'shu.

¹¹ Leví dutssiyendeccu tsu Gersón, Coat toya'caen Merari.

¹² Judá dutssiyendeccu tsu Er, Onán, Sela, Fares toya'caen Zara. (Er, toya'caen Onán tsu Canaán andeni pa'fa'cho.) Fares dutssiyendeccu tsu Hezrón toya'caen Hamul.

¹³ Isacar dutssiyendeccu tsu Tola, Fúa, Job toya'caen Simrón.

¹⁴ Zabulón dutssiyendeccu tsu Sered, Elón toya'caen Jahleel.

¹⁵ Tsendeccu tsu Leanga Jacob du'sian'chondeccu toya Padan-aram andeni can'jemba isu'chondeccu, toya'caen fae pushesu Dina'qqe. Pa'cco Lea omba'su dushundeccu tsu treinta y tres a'i, tsandie, pushesuma'qqe agattosi.

¹⁶ Gad dutssiyendeccu tsu Zifión, Hagui, Ezbón, Suni, Eri, Arodi toya'caen Areli. ¹⁷ Aser dutssiyendeccu tsu Imna, Isúa, Isúi, Bería toya'caen tise'pa que'tte Sera. Bería dutssiyendeccu tsu Heber toya'caen Malquiel. ¹⁸ Tsendeccu tsu Zilpanga Jacob du'sian'chondeccu. Zilpa tsu Labán tise onque'nge Leama coira'suve afe'cho pushesu. Pa'cco Zilpa omba'su dushundeccu tsu diez y seis a'i.

¹⁹ Jacob pushe Raquel dutssiyendeccu tsu José toya'caen Benjamín. ²⁰ José dutssiyendeccu tsu Manasés toya'caen Efraín, Egipto isu'chondeccu. Tise'pa mama tsu Asenat, On canqqe'su chigama

afa'su Potifera onque'nge. ²¹ Benjamín dutssiyendeccu tsu Bela, Bequer, Asbel, Gera, Naamán, Ehi, Ros, Mupim, Hupim toya'caen Ard. ²² Tsendeccu tsu Jacob pushe Raquel omba'su dushundeccu. Pa'cco tsu catorce a'i.

²³ Dan dutssi'ye tsu Husim. ²⁴ Neftalí dutssiyendeccu tsu Jahzeel, Guni, Jezer toya'caen Silem. ²⁵ Tsendeccu tsu Bilhanga Jacob du'sian'chondeccu. Bilha tsu Labán tise onque'nge Raquelma coira'suve afe'cho pushesu. Pa'cco Bilha omba'su dushundeccu tsu siete a'i.

²⁶ Poiyi'cco Jacobi'ccu Egiptoni ji'chondeccuta tsu sesenta y seis a'i. Nane tise dutssiyendecumbe pushendeccuma agattombe'yi jo'su tise atapoen'choveyi tsu agatto. ²⁷ Toya'caen José dos dutssi'ye Egipto andeni isuye'chondeccu. Tsendeccui'ccu tsu setenta a'ive nepi Jacob atapoen'cho Egiptoni nepi'cho aindeccu.

²⁸ Jacobja o'tie Judáma moe Joséma can'su cuintsu José jipa Goséni tise'pama cachuiye. Tsendeccu Goséni nepipa ²⁹ José manda tise caroma ñoña'fasi tise yayama cachui'ngaye. Tise yayanga nepipa opipa'chonga munsin ccutsupa tsain'bitsse i'na. ³⁰ Tsonsi Israelja Joséma su:

—Ja'ñonda gi asi'ttaembe'yi paya. Tayo gi que camba'juma attepa, toya qui canse qqquen atesupa.

³¹ Tsonsi Joséja tise antiandecunga toya'caen tise yaya'su aindecunga qqquen su:

—Faraóni gi jaya que'i ji'chone qqquen condaseye: 'Nane ña antiandeccu toya'caen poiyi'cco ña yaya aindeccu Canaán andeni cansesundeccu tsu vani ji'fa ñai'ccu canseye.

³² Toya'caen tsu i'fa tise'pa oveja, vaura, pa'cco tise'pa an'bian'choma. Nane tsendeccu semambata tsu ovejama coiraye, toya'caen vaurama atapoeña'cho.' ³³ Tsa'caen condasesi Faraón que'ima ttu'sepa jongoesuma semañe qui atesu'fa qquen iñajampaña'ninda ³⁴ que'ija su'faja: 'Ingija ovejama atapoeñe gi atesu'fa ingi tayopi'su coenzandeqquia'caeñi.' Tsa'caen su'yita qui Gosén andene can'jeñe osha'faya. Nane Egiptondeccuja se'pi'fa tsu oveja coirasundeccu fae'ngae tise'pai'ccu can'jeñe.

47

¹ Joséja faraónga condaye ja. Japa tise yaya, tise antiandeccu Canaánne jipa Gosén andeni nepi'choma condase. Nane tise'pa oveja, tise'pa vaura, pa'cco tise'pa an'bian'choma i'fa'chone condase. ² Tise antiandeccu'suma cincoveyi ttu'sepa faraónga canjaeñe anga cuintsu tise'pama atesuye. ³ Tsonsi faraónjan José antiandeccuma iñajampaña:

—¿Jongoesuma qui semamba canse'fa?

Tsendeccuja condase'fa:

—Ingi quema shondosundeccuta gi ovejama coirasundeccu ingi tayopi'su coenzandeqquia'caeñi. ⁴ Ingita gi ji'fa va andeni canseye. Nane Canaán andenijan tsain'bitssi qqipoesuite tsu ni ingi oveja an'jeña'cho shoshovive'qqe me'i'on. Tsa'cansi chigáne ingi quema shondosundeccuma antteja Gosén andeni canse'faye.

⁵ Tsonsi faraónjan Joséma su:

—Que yaya, que antiandeccu tsu quei'ccu cans-eye ji'fa. ⁶ Va Egipto ande tsu pa'cco que ande. Tsendecunga afeja Gosén andema cuintsu tseni canse'faye. Tsa tsu ti'tsse ñotssia ande. Toya'caen majama que ñotsse atesupa in'jan'da tsama mandaja cuintsu ña vaurama'qqe coira'jeye.

⁷ Joséja tise yaya Jacobma'qqe faraónga anga cuintsu tisema'qqe atteye. Jacobja faraónma ñotsse afapa chigambian. ⁸ Chigambiansi faraónjan iñajampaña:

—¿Mañi canqqe'fave qui an'bian?

⁹ Jacobja su:

—Tayo gi ciento treinta canqqe'fa va andeni jacamba canse. Nane re'riccoe vana'jen'ma canse. Tsa'ma toya gi ña tayopi'su coenzandeqquia'caen nepiaña'cho shaca.

¹⁰ Tsa'caen afapa Jacobja faraónma chigambianba tse'ttie sombo. ¹¹ Tsonsi Joséja faraón mandaqquia'caen tise'panga afe Egipto ande'su bove ñotssia andema cuintsu tseni canse'faye. Tsa'caen tsu tise yaya tise antiandeccu'qqe Ramsés canqqe jin'tti'su andema isupa canse'fa. ¹² Toya'caen Joséja anqqe'suma'qqe poiye'cco tise antiandecunga afe'je. Nane mañi'cco a'i fae ettini can'jen'chonga tsa'caen tsu afe'je.

José Egipto andema manda'cho

¹³ Nane pa'cco andeni trigove metsse da. Qquipoesuiteja ti'tsse atapañacca. Nane Egipto ande'su a'i toya'caen Canaán ande'su aindecu'qqe qquipoe'supa pa'je'fa. ¹⁴ Joséja pa'cco a'i corifin'dima, egipto'su toya'caen canaán'su aindecu trigoma chava'cho

corifin'dima, boñamba faraón tsa'onga ñoñamba an'bian. ¹⁵ Tsa'caen tsu egipto'su aindeccu, canaán'su aindeccu'qqe corifin'dima metsse sefaen'fa. Sefaemba egiptosundeccuja Josénga japa su'fa:

—Chigáne inginga anqqe'suma afeja. Ñotssimbi tsu que can anttesi ingi corifin'di me'chopa qquipoe'supa paye.

¹⁶ Joséja pañamba su:

—Tsa'caen corifin'di me'chota que'i aiña'choma i'faja trigoi'ccu cambiañe.

¹⁷ Tsa'caen susi egiptondeccuja tise'pa cavayo, oveja, vaura toya'caen boroma'qqe Joséni anga'fa. Tsa'caen tsu Joséja trigoma cambian'jen pa'cco tsa canqqe'fani. ¹⁸ Tsa'ma tsa canqqe'fa pasapa faesu canqqe'fani ccase japa Josénga su'fa:

—Ñoa'me corifin'di metsse dapa gi quenga a'tieñe osha'fambi. Toya'caen ingi aiña'chondeccu'qqe pa'cco tsu quembe'yi. Jañojan me'cho'fa gi jongoesuma quenga afeya'chove. Jo'su ingi ande ingi ai'voveyi gi an'bian'fa. ¹⁹ Ingi ai'vo, ingi andema'qqe chavaja. Nane que trigoma afesi gi faraónmbe tsangae semasundeccuve dapa ingi andema'qqe tise'beyi sema'faya. Toya'caen que qui inginga choma afe'jeya'cho ingi tsama jomba cansesi cuintsu tsa ande catiyembe cañe. ¿Ma'caen qui can antteya ingi tisu andei'ccu fae'ngae pa'faye?

²⁰ Tsa'caen su'fasi Joséja pa'cco Egipto andema faraónmbe chava. Nane tsa'caen tsu poi'yi'cco egipto'su aindeccuja qquipoe'supa tise'pa

andema chavaen'fa. Chavaensi pa'cco ande tsu faraónmbeve da. ²¹ Tsa'caen tsomba tsu poiyi'cco egiptondeccu tsangae semasundeccuve da'fa. Nane poi Egipto canqqueni'su tsu tsa'caen da'fa. ²² Jo'su egipto'su chigama afasundeccumbeveyi tsu Joséja chavambe pasa. Nane tsendeccungaja faraón tsu nanitsse trigoma afe'je. Tsa'caen faraón afe'jesi nanitsse an'jemba tsendeccuja tise'pa andema chavaen'fambi.

²³ Omboe Joséja aindeccunga su:

—Ja'ñojan que'i toya'caen que'i ande tsu faraónmbe. Tise'be gi ñajan chava. Voe gi afe'je choma que'i semamba andenga joñe.

²⁴ Tsa'ma tsama taipa cinco boñame boña'da tsu fae boñama faraónga afeya'cho. Faesu cuatro boña tsu que'i andenga jomba toya'caen que'i, que'i dushundeccu, poiyi'cco que'i'ccu canjensundeccu'qqe an'jeña'cho.

²⁵ Tsama pañamba tsendeccuja su'fa:

—¡Queja ño'amba ingima ccushaensi gi avujatssi'fa faraónmbe tsangae semasundeccuve daye!

²⁶ Tsa'caen tsu Joséja manda antte cuintsu poi egiptondeccu tise'pa tai'cho'suma fae cincoccoeyi faraónga afe'je'faye. Tsa manda'choja toya tsu jincho. Tsa'ma egipto'su chigama afasundeccuja afepoen'jen'faya'bi, nane tise'pa andeja faraón isumbi'choa ande.

Pasa'pave Jacob in'jan'cho

²⁷ Israendeccuja Egipto ande'su Gosén andeni can'jemba tsao'ñamba canse'fa. Tsa'caen cansepa

tsain'bitssi a'ive atapa'fa. ²⁸ Jacobja diez y siete canqque'fa pa'cco Egiptoni cansepa ciento cuarenta y siete canqque'fave nepian.

²⁹ Fae a'ta Israelja tise junde paya'choma atesupa tise dutssi'ye Joséma ttusengaye manda. Tise jisi su:

—Queja ñoa'metsse ñama ñotsse tsoñe in'jan'da que tivei'ccu ña ttena'go tsosicufama pporaemba tansintse su'chove afaja ñoa'me ña iñajan'choma tsoña'chove ña atesuye. Chigáne ña pasi ñama Egiptoni a'tujama. ³⁰ Ña tayopi'su coenzandeqquia'caen ña pa'ninda va Egipto ande'ye somboemba angapa tsendeccumbe atu'ttingayi ñama a'tuja.

Tsonsi Joséja su:

—Tsa'caen gi tsoña.

³¹ Tsa'ma tise yayaja ccase quian'me su:

—¡Ñoa'metsse suja!

Tsonsi José ñoa'metsse susi Israelja tise ana'jen'cho'su asusu'chonga ccui.

48

Efraín, Manasésma ñotsse afa'cho

¹ Tsa'caen tsonsi can'jencca'ta Joséja paña tise yaya paji'choma. Pañamba can'su jayipa tise dos du'shuma, Manasés toya'caen Efraínma anga.

² Tise dutssi'ye José ji'choma conda'fasi pañamba Jacobja vanamba tise ana'jen'cho'ye jangi dyai.

³ Jangi dyaipa Josénga su:

—Tsa Chiga Osha'choma Oshacho'cho tsu Canaán ande'su Luz canqqueni ñanga attiamba ñotsse afapa ⁴ qquen su: 'Que canjan, ña gi tsoña

cuintsu queja tsain'bio du'shuve atapasi que omba'su dushundeccu'qqe tsain'bio ande'suve dapa fae naccufaya'chove. Toya'caen gi que omba'su dushundeccunga va andema afeya. Afesi tsangae tsu tise'pambeve daya.' ⁵ Ja'ñojan ñotssi tsu. Mapán ña toya va Egiptoni quei'ccu canseye toya jimbi'te Efraín toya'caen Manasésve isu'cho'qqe, ñambe'fa tsu. Tsendeccu tsu ñoa'me ñambe'fa ña Rubén toya'caen Simeóncan'fa. ⁶ Que vandeccuma omboe isu'cho tsu quembe'faya. Tsa'ma tsendeccu Efraín, Manasés antiandeccupa tsu tise'pa quindyandeccu aindeccui'ccu fae'ngae isu'faya. ⁷ Nane ñajan Padan-aramni japa shandapa jiñasi que mama Raquelja pa. Nane Canaán andeni nepipa toya Efratani nepimbe'yi tsu pa. Tsa'caen pasi gi Efrata'su tsaiquina a'tu. Tse'tti tsu ja'ñojan Belén.

⁸ Tse'faei'ccuyi Israelja José dushundeccuma atepa iñajampaña:

—Vandeccuja, ¿ma'candeqquia tsu?

⁹ Joséja su:

—Vandeccu tsu Chiga va Egiptoni ñanga afe'cho dushundeccu.

Tsa'caen susi tise yayaja su:

—Chigáne tise'pama ñanga catsianjan ña ppo-raemba tise'panga ñotsse tsoña'chove afaye.

¹⁰ Israelja coenza ccashe'yeye dapa tso'fe dañongepa ñotsse atteye oshambi. Tsa'cansi Joséja tise dushundeccuma tise yayanga catsian. Catsiansi Israelja tise'pama mochapa munsin.

¹¹ Tsomba Joséma su:

—Minga'ni'qqe quema atteya'bi qqen in'jan'cho gi Chiga anttesi quema attepa toya'caen que dushundecuma'qqe atte.

¹² Tsa'caen susi Joséja tise dushundecuma tise yáya'ye joqquitssiamba cambia'jui'ccu andenga puntssan ccui. ¹³ Omboe Joséja tansinfa'su tivei'ccu Efraínma indipa ccutsian tise yayambe pavefanga. Tsomba pavefa'su tivei'ccu Manasésma indipa ccutsian tise yayambe tansinfanga. ¹⁴ Tsa'ma Israelja tise tivema avujaccove yasapa tansinfai'ccu Efraín, tsa chu'ambe tsovema pporaen. Toya'caen pavefai'ccuja Manasés, tsa aisheve isu'chombe tsovema pporaen. ¹⁵ Tsa'caen pporaen'chopa Josénga ñotsse tsoña'chove qqen afa:

“Chiga Quitsa, ña yayandeccu Abraham'ye toya'caen Isaac'ye quema ñotsse pañamba canse'fa.

Que qui ñama isu'cho a'ta ashaemba ja'ñoa'ngae ñama ñotsse coira'je.

¹⁶ Toya'caen quema sefacconi'su shondo'suja osha'cho ega'ye ñama ccushaen.

Chigáne va ña dushundecuma ñotsse tsonjan cuintsu tsendeccu'ye ña inisema aqqe'pambitsse canse'faye;

toya'caen ña yayandeccu, Abraham'ye toya'caen Isaac'ye inisema'qqe in-jan'jen'faye.

Va dushundecuma ñotsse tsonjan cuintsu tsain'bie atapapa poi ande on'batsse canse'faye.”

¹⁷ Tsa'ma Josénejan tsa'caen tise yaya tansinfa'su tivei'ccu Efraín tsovema pporaen'choja ega qqen

in'jan. Tsa'caen in'jamba tise yaya tivema indi, Efraín tsove'ye itsapa Manasés tsovenga indiañe in'jamba. ¹⁸ Indipa su:

—¡Me'in, qquen tsonjama, yaya! Va tsu coenza. Vambe tsovenga tansinfa'su tivei'ccu pporaenjan.

¹⁹ Tsa'ma tise yayaja tsa'caen tsoñe in'jambipa su:

—¡Tayo gi in'jan, jaricho, tayo gi in'jan! Toya'caen tsa'qque tsu joccapitssia aindeccuve atapaya. Tsa'ma tise quinshin tsu tisema ti'tsse joccapitssiya. Nane tsambe omba'su dushundeccu tsu ti'tsse tsain'bitsse atapa'faya.

²⁰ Tsequi a'tayi Jacobja ñotsse tsoña'chone afapa qquen su:

—Poi israendeccu ñotsse tsoña'chone su'choma afaye in'jan'da tsu que'i inisema afapa qquen su'faya: 'Cuintsu Chiga Quitsaja Efraín toya'caen Manasésnga tsonqquia'caen quenga'qque tsoñe.'

Tsa'caen tsu Israelja Manasésma ti'tsse'tssia've Efraínma afa antte. ²¹ Omboe Joséma su:

—Que canjan, paye gi tson'jen. Tsa'ma Chiga tsu quei'ccu can'jemba toequi que tayopi'su coenzandeccu'ye canse'cho andeni angaya. ²² Toya'caen quenga gi que antiandeccuma ti'tsse'tsse afe. Nane Siquem canqquema gi quenga afe, tsa amorreo aindeccui'ccu ña iyiccopa itsa'cho andema.

49

Pasa'pave Jacob afa'cho

¹ Jacobja poi'ico tise dutssiyendeccuma ttu'sepa su: “Ñanga catse'faja ña que'inga condaye jai'ngae ma'caen daya'choma:

² Ñanga catse'faja Jacob dutssiyendeccu.
Catsepa paña'faja que yaya Israel su'choma.

³ **Rubén**, que qui ña dutssi'ye coenza.
Que qui ña quin'sui'ccu me'ttia'ye tetacho
naqquia'caen ña quin'sui'ccu aisheve
isu'cho.

Que qui o'tie joccapitssipa osha'choma oshacho.

⁴ Tsa'ma ja ñota qui tsa'cambi.

Jongoesu shave'pa'caen qui injansembe injangae
tsincon.

Nane tsa'camba qui ña ambian'choi'ccu ña
ana'jen'chonga ccuipa egae tsincon.

⁵ **Simeón** toya'caen **Leví**ta tsu antianaccu.

Tise'pa matichija faesuma dañoñe'ñi tson'jen'cho.

⁶ Minga'ni'qqe gi tise'pa tsa'onga fae'ngae boye
in'jambi.

Nane iyicca'yepa qui aindeccuma fi'tti'fa.

Aqquia injanga iyicca'yepa qui vaura tsu'ttema
uccasho'fa.

⁷ Ega tsu. Ñoa'me ega tsu que'i ttesia'caen iy-
icca'ye'fa'choja.

Ña gi que'ima metsse attufaeña poi Israel andeni
canse'faya'chove.

⁸ **Judá**, que antiandeccu tsu quema ñotsse
in'jamba afa'faya.

Tsifoye indipa patsuqquia'caen qui quema iyic-
cayesundeccuma patsuya.

Ñoa'me que antiandeccu'qqe tsu quenga ccarupa
dyai'faya.

⁹ Queta qui ttesi du'shua'can.

Que indipa an'choma catipa ansundepa ccuipa
ronda'je.

Nane rande ttesia'caen qui andenga ccui.

Tsa'caen ccui'ninda, ¿majan tsu quema
noñangiaña?

10 Ni majañi'qqe tsu Judá manda'je'choma it-
saya'bi.

Ni tise tiveni an'bian'cho coen quini'ccoma'qqe
itsa'faya'bi tsa quini'cco na'su jiya'ngae.

Tsama tsu poi canqqesundeccu paña'faya.

11 Tsa tsu tise boro du'shuma ofatsajanga tandaña.

Tise ondiccu'jema tsu vinoi'ccu ma'ppaña.

Nane bochoatsaja tsa'ccui'ccu tsu cashiya.

12 Tise tso'feta tsu vinoma ti'tsse si'an.

Tise tte'ttoja vaura chochoma ti'tsse tototssi.

13 **Zabulón**nda tsu mar otafari canseya.

Tse'tti tsu barco ccattufa'je'ttiya.

Nane tise ande utufaja Sidón andepi nepiya.

14 **Isacarta** tsu andu'choma andu'su boro'can.

Tise ñofaje'cho tsu oveja ttuccu enttinge.

15 Nane ande ñotssiamata tepepa tseña ño'faye
ñotssimanda tise sepacoma canjaen andupa
angaye.

Ni poini afambe'yi tsangae sema'suve da.

16 **Danda** tsu tise aindecuma mandaya fae'ngae
faesu Israe'su aindeqquia'caen.

17 Toya'caen Danda tsu iyoa'caen tsoña.

Nane iyo tsaiquini tsu ccui cavayo tsu'ttema sint-
tuye cuintsu tsani dyai'suja amppiye.

Tsa'caen tsu Danjan patsuya.

18 Ña Na'su, ¡ronda'je qui que ñama ccushaeñe!

19 **Gad**manda tsu sundarondeccu iyiccote ji'faya.

Tsa'ma omboe tsu tiseja patsupa mandiaña.

20 **Asera** tsain'bitsse panme an'biamba nasun-
deccunga'qqe anqqe'suma afe'jeya.

21 **Nefalíta** tsu shan'cco'caen opatsse jacan. Tise dushundeccu'qqe me'detssi'fa tsu.

22 **José**ta tsu quini'cco na'en otafani ccutsupa ñotsse namba ttuccu ccafanga'qqe furiqquia'can.

23 Battittiansundeccu tsu tise ma chi'gapa noñangiamba pa'cco a'ta battittian'jen'fa.

24 Tsa'ma Joséja tise tive quin'amba oyambitsse tise battittianccuma indipa poini battittian'jen.

¡Ñotssi tsu Jacobmbe Chiga Osha'choma Osha'cho'cho!

¡Ñotssi tsu coira'sumbe inise. Tise tsu israendec-cuma angacan!

25 José, ¡ñotssi tsu que yaya'yembe Chiga! Tsa tsu quema fuiteya.

Tsa Chiga Osha'choma Oshacho'cho tsu quema ñotsse tsoña'chone afaya.

¡Nane sefaccone tsu quema ñotsse tsoña!

¡Mar tsosine'qqe tsu quema ñotsse tsoña!

Toya'caen quema ñotsse tsonsi tsu que'su push-esundeccuja tsain'bio du'shuve isupa cho-choemba coeña'faya.

26 Ña que yayata gi ña yaya'ye ñama ñotsse tsoña'chove su'choma ti'tsse quema ñotsse tsoña'chove afa'je.

Nane Chiga Joséma tise antiandeccu'ye ttu'sesi tsu ccotta'cco sefaya'ngae va ñotsse tsoña'cho su'choja José aindecunga tsoña.

27 **Benjamí**nda tsu putsa'su ain'can.

Nane sinte tise indi'choma amba sime tise an antt-eye'choma attufaen.”

²⁸ Vandeccu tsu Israel aindecu'su doce naccu. Toya'caen tsa'caen tsu tise'pa yayaja poiyo'cco tise dutssiyendecunga tise'pa jai'ngae ma'caen daya'chove afa.

Jacob pa'cho

²⁹ Fae a'ta Jacobja tise dutssiyendecunga qqen manda:

—Ca'tsa tsu ña paya'cho nepiji. Ña pa'ninda ña tayopi'su coenzandecuyi'ccu pporotsse ñama'qqe a'tu'faja. Nane hitita'su a'i Efrón ande'su fattocco changonga ñama a'tu'faja. ³⁰ Tsa tsu Macpela fattocco chango Mamre canqqe isevetsse Canaán andeni. Abraham'ye tsu tsa fattocco chango, toya'caen tse'tti'su andema'qqe Efrómbema chava tise aindecuma tsanga atu'jeye. ³¹ Tse'ttinga tsu a'tu'fa Abraham, tise pushe Sarama'qqe, toya'caen Isaac, tise pushe Rebecama'qqe. Toya'caen gi ña'qqe tse'ttinga Leama a'tu. ³² Tsa ande toya'caen tsa changota tsu hititandecuma chava'cho.

³³ Jacobja tsa'caen tise dutssiyendecunga condase nanimba ccase ana'jen'chonga ccuipa pa.

50

¹ Tsa'caen pasi Joséja tise yaya ai'voma munsimba i'namba mocha. ² Omboe tise mandasi sejesundecuma manda cuintsu tise yaya Israel ai'voma tseni'su balsa'mo ñome'bai'ccu onjoen'faye junde congonsa'ne. Tsa'caen mandasi tsa'caen tsu tson'fa. ³ Nane tsa'caen pa'chombe ai'voma onjoene cuarenta a'ta tsa balsa'mo ñome'bai'ccu onjoen'jeña'cho. Nane tsa'caen tsu injienge.

Tsonsi egiptondeccuja setenta a'ta pa'cco Israelne i'na'fa. ⁴ Ina'jen'cho pasapa Joséja faraón tsa'o'su joccapindeqquiamas qquen su:

—Que'ija ñama ñotsse in'jan'da chigáne faraónga qquen conda'faja: ⁵ ‘Ña yayaja tise paya'cho nepiji tsu ñama su cuintsu ñajan ñoa'metsse su'choma afaye tise in'jan'chove tsoñe. Nane tiseja atu'ttima Canaán andeni tayo ñoñamba tseni a'tuyeye in'jansi gi ñoa'metsse su'choi'ccu tsa'caen tsoñe su. Tsa'camba gi ñajan chigáne ñama antteja ña yayama atu'ngaye. Japa mangae a'tu nani'da gi ccase vani jiya.’

⁶ Pañamba faraónjan su:

—Jujú, japa que yayama atungaja tise ñajanqquia'caen.

⁷ Faraón anttesi José tise yayama a'tu'su jayisi poi'i'cco faraónma shondosundeccu, Egipto ande'su coenzandeccu'qqe Joséma fuitete ja'fa. ⁸ Toya'caen Jacob dutssiyendeccu, nane José tsa'o'su aindeccu, José antiandecumbe aindeccu'qqe jaja'fa. Gosén andenijan jo'su dushundeccu toya'caen tise'pa aiña'chondeccuveyi cati'fa. ⁹ Toya'caen faesu aindeccu'qqe qquitssa'je'cho carongae majanda cavayongae japa tsain'bio a'i tsu Joséma fuite'fa. ¹⁰ Jordán na'ema chiga sombo'jefanga Atad trigo ttonoma qqesho'je'ttinga nepipa ñoa'me ñombi'yepa i'nañe ashaen'fa. Nane tse'ttinga tsu Joséja tise yaya pa'chone asi'ttaemba siete a'ta pa'cco ñombi'ye.

¹¹ Tsa'caen i'na'fa'choma attepa tse'tti'su canjaen'su cananeondeccuja su'fa: “Nane egiptondeccuja tise'pa'su joccapitssia pasi

tsa'caen i'namba a'tu'fa.” Tsa'caen supa tse'ttima inisian'fa Abed-mizraim, “Egiptondeccu ñombi'ye'tti” qquen suye. Tse'tti tsu Jordán na'ema chiga sombo'jefa.

¹² Tsa'caen tsu Jacob dutssiyendeccuja pa'cco tise'pa yaya ññajan'choma tson'fa. ¹³ Nane Canaánni angapa Macpela ande'su fattocco changonga a'tu'fa. Abraham tayoe tise aindeccuma atu'jeya'chove tsa fattocco changoma hitita'su a'i Efrómbema chava'chonga tsu Jacobma'qqe a'tu'fa. Tsa ande toya'caen changota tsu Mamre canquema chiga sombo'jefani. ¹⁴ Tise yayama a'tu nanimba Joséja tise antiandeccui'ccu toya'caen poi'ccu tisei'ccu jacansundeccu'qqe toequi Egiptoni ji'fa.

José condase tise antiandeccui'ccu

¹⁵ Tsa'caen Jacob pasi José antiandeccuja qquen in'jan'fa: “Isha tsu ja'ñonda Joséja ingima chi'gapa ccane'qqe ingi tisema egae tsonqquia'caenjan tsoña.” ¹⁶ Tsa'caen asi'ttaemba faesuma manda'fa cuintsu Josénga japa qquen condaye: “Toya pambi'te tsu que yayaja ingima manda ¹⁷ quenga qquen suye: ‘Quema gi ññajan chigáne que antiandeccu egae tsincon'choma aqqe'papa ñoquija. Nane ñoa'me tsu tsendeccu quema egae tson.’ Tsa'caen su'chosi gi quema ññajan'fa ingi egae tsincon'choma aqqe'paja. Nane ingita gi que yayambe Chigama shondosundeccu.”

Tsa'caen su'fa'choma conda'fasi pañamba Joséja i'na. ¹⁸ José ina'jen'ni ñoa'me tise antiandeccu'qqe jipa andenga cambia'jui'ccu puntssan ccuipa qquen su'fa:

—Que canjan, va'tti qui ingima an'bian tsangae quembe semasundeccuve.

¹⁹ Tsa'ma Joséja tise'panga su:

—¡Dyombe can'faja! Ñajan Chigambi gi injama'choma somboeñe. ²⁰ Que'ita qui ñama egae tsoñe in'jan'fa. Tsa'ma Chiga tsu tsa ega'ye cambiamba ñotssiave canjaemba tsain'bio a'ima ccushaen, ingi ja'ño a'ta atteqquia'caen. ²¹ Tsa'cansi dyombe can'faja. Ña gi anqqe'suma afe'jeya que'inga toya'caen que'i dushundecunga'qqe.

José pa'cho

²² José toya'caen tise yaya Jacob dutssiyendeccu'qqe bo'tsse Egipto andeni canse'fa. Joséja ciento diez canqqe'fave cansepa ²³ tise dutssi'ye Efraíne tercer omba'su dutssi'yema'qqe atte. Toya'caen Manasés dutssi'ye Maquirmbe dushundecuma'qqe tsu attepa mende'je.

²⁴ Fae a'ta Joséja tise antiandecunga su: “Re'ricco tsu shaca ña paya'cho. Tsa'ma Chiga Quitsa tsu jipa que'ima fuite'jeya. Toya'caen tise tsu va ande'ye que'ima somboemba Abrahamnga, Isaacnga, toya'caen Jacobnga afeye su'cho andenga que'ima angaya.” ²⁵ Tsa'caen supa Israel dutssiyendeccuma su cuintsu ñoa'metsse su'choi'ccu tise in'janqquia'caen tsoñe qqen su'faye: “Ñoa'me gi su Chiga Quitsa jipa tsu fuiteya. Tsa'caen ashaensi jayi'ta ña tsu'ttama'qqe somboemba anga'faya'cho.”

²⁶ Joséja ciento diez canqqe'fave an'biamba Egiptoni pa. Tsa'caen pasi tise ai'voma tseni'su balsa'mo ñome'bai'ccu onjoemba cafonga ppiña'fa.

Chiga Tevaen'Jema Atesuja 1, Aisheve Caña'cho

New Testament and Genesis in Cofán (EC:con:Cofán)

copyright © 2012 Wycliffe Bible Translators, Inc.

Language: Cofán

Translation by: Wycliffe Bible Translators, Inc.

Cofán

con

Ecuador

Copyright Information

©Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cofán

©Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 21 Feb 2024 from source files dated 29 Jan 2022

dac2c985-27da-5832-a781-3d6b3890f4c7